

STEPHANI 72.141
RODERICI
CASTRENSIS
LVSITANI,

Doct. Medici, necnon apud Pisanos
Profess. publ. primarij,

QVÆ EX QVIBVS.

Opusculum verè aureum, ac præcipua
Prognoseôs mysteria referans




72.141

LVG DVNI,

Apud IOAN. CAFFIN, viâ Mercatoria,
sub signo Nominis I E S V.

M. DC. XLV.

Cum Privilegio Regis.





Celeberrimo, Clarissimóque viro,
Domino

DE LA CHAMBRE:
Confiliario, ac Medico
Regio, necnon Illustriss.
Galliarum Cancellarij
Medico ordinario.



Q UOD nostram huius-
ce libelli editionem,
inclyto tuo nomine
(VIR CELEBERRIME, FAVOR
PLVRIMVM HONORANDE)
præmuniendam statuerim,
non leui de caussa vt facerem;
inductus fui. Etenim cùm à
† 2 multo

multo tempore auidissimè
sategerim, aliquam singula-
ris meæ erga Te observantiæ
tesseram in publicum expo-
nere, tam bonam oppor-
tunitatem insuper habere,
grāde mihi fuisset piaculum.
Et sanè mortalium nulli (si
rectè iudico) destinari aptius
potuissent, à Coò tripode
olim decantata οἷα Ἰὼ οἷων
tam pulchrè à perillustri isto
Scriptore Lusitano per quan-
dam velut anatomen expli-
cata, atque ob Philiatrôn
oculos constituta, quàm Ti-
bī, quem omniā illa, perin-
de ac digitos, in numero
habere constat, quémque
adcoò

adeò confido, huic Opusculo
Ζεὺς Ζευτέρῳ, non illiben-
ter commodaturum esse,
quod potes, quódque mere-
tur præsidium, vt hoc ipso
fretum, omnia sciolorum
cauilla, non aliter ac nocti-
luca siderum regina molof-
forum latratûs, aspernetur,
inque eruditorum hominum
manûs gratus perueniat. Mi-
ræ siquidem venerationi
tuum est nomen (VIR EXI-
MIE) non solum apud Χα-
ερεάτας, quosque Æsculapij
discipulos, sed etiam apud
omnes qui mitioribus cun-
que studiis operati, lupinos
& æra probè à se inuicem di-
† 3 stinguere

stinguere nōrunt. Neque id
profectò iniuriâ, cū tot
lucubrationes cedro dignif-
simas, & hæcenus euulgâris,
& in posterum euulgare me-
diteris, cūque tanto virtu-
tum, tanto optimarum ani-
mi dotum choragio pectus
instructum geras, vt iis enar-
randis non meum modò sti-
lum balbutientem longè im-
parem esse sentiam, sed &
feliciū quoque omnium
panegyristarum, quibus suas
amœnitates Diua Suadela
capacioribus, ac coronatis
(quod dixerit aliquis) cra-
teribus propinare non du-
bitat. Ebur atramento can-
defacere

defacere tentarem, si meis
ἀνδροβολίαις, tuorum meri-
torum magnitudinem æqua-
re, nedum augustiorem red-
dere susciperem: Quin gene-
rosiores, quàm vt huiusmo-
di alloquiis vacuas aures
præbere ames. Quo fit, vt
manum à proposita confe-
ctim summoturus sim tabu-
la, hoc vnum si notauero,
Amplissimum quippe G A L-
LIÆ CANCELLARIUM, gra-
uissimi iudicij Virum, ipsó-
que Epidauri dracone per-
spicaciorem, inter alia pro-
pemodum infinita, quæ à
multis retrò annis edidit ad-
mirandæ suæ Prudentiæ

exempla , non exiguum eius-
dem πολιορκημίων οsten-
disse , dum Temet vnum, ex
omni numero, tanquam hu-
ius æui Medicorum floscu-
lum elegit , cui suæ valetu-
dinis curam committeret. In
qua quidem Sparte peror-
anda sic te gessisti, vt nihil
suprà ab vniuersis Francicæ
Monarchiæ subditis exopta-
ri potuerit , qui tanti He-
rois salute publicam conti-
neri facilè intelligunt. Quo
loco facere non possum, quin
cum Hippocrate , *Epist. ad*
S. P. Q. Abderit. exclamem:
Μακάριοι γε δήμοι, ὅκοις
ἴσασι τοῦ ἀγαθοῦ ἀνδρός,
ἐν

ἐρύματα ἐαυτοῦ, καὶ εἰς οὐ
πίστευες, εἰδὲ τὰ τείχεα, ἀλλὰ
Θεῶν ἀνδρῶν Θεὰς γνώμας.

Perge, vt facis, (VIR CLA-
RISSIME) tam bene de patria
mereri, perge tam charum
omnibus caput ab ægritudi-
num tueri incurfibus, vt hoc
nomine gratiam non mino-
rem à tuis popularibus in eas,
neque breuiora ab ipsis fo-
lia merearis, quàm olim pro
feruato sapientiffimo Demo-
crito, ab eius Conciuibus
consecutus dicitur Hippo-
crates. Etsi verò non is sim
qui ignorem, Tibi tali tan-
tòque Viro longè præstan-
tius aliquod fuisse parandum
munus,

munus,quàm quod hîc obla-
tum accedo, non despero ta-
men , quin pro incredibili
quâ polles sempercomitate,
meum benignè sis interpre-
taturus consilium , ac mini-
mè dedignaturus propriæ
tenuitati consentanea dedi-
cantem : immò verò quin
passurus etiam sis , perpetim
ut audiam

Tibi ex animo addictissimus
IOAN. CAFFIN Bibliopôla.

INDEX.

XI. Epigenesis in morbum eiusdem speciei.	21
XII. Epigenesis in morbum alterius speciei.	22
XIII. Epigenesis in morbum toto genere diuersum.	23
XIV. Epigenesis inter symptomata eiusdem speciei.	25
XV. Epigenesis symptomaticis ad symptoma diuersarum specierum.	26
XVI. Epigenesis symptomaticis in morbum	28
XVII. Epigenesis morbi in symptom.	30
XVIII. Febris erratica.	31
XIX. Febris singultuosa.	32
XX. Febris horrida.	36
XXI. Febris anxiosa.	41
XXII. Febris lassitudinaria.	47
XXIII. Febris sudorifica.	49
XXIV. Febris pemphigodes.	53
XXV. Hydropis epigenomena.	56

LIBER SECVNDVS.

CAP. I. V ariæ metaptoseos species.	63
II. De metastasi.	68
III. De viis occultis.	69
IV. De transfusione.	72
V. De affectionum transpositione à venis ad arterias, ab arteriis ad venas.	76
VI. Ex	

I N D E X.

- VI. *Ex arteriis, & venis ad nervos, & ex nervis ad arterias ac venas affectus transfertur.* 77
- VII. *Res præter naturam, tam intra nos genitas, quàm forinsecus advenientes occulto quodam impulsu certa loca petere.* 80
- VIII. *A corpore ad animam, & ab anima ad corpus fit metastasis.* 84
- IX. *Metastasis à membro ignobili ad membrum nobile nunquam bona.* 98
- X. *Metastasis symptomatis ratione facta, aliquando bona.* 108
- XI. *Metastasis secundum rectitudinem fieri debet.* 116
- XII. *Damnatur opinio existimantium rectitudinem consistere in natura sanguinis.* 118
- XIII. *Altera opinio existimantium rectitudinem consistere in proclivitate fluxionis improbat.* 119
- XIV. *Opinio Fernely, & aliorum reducentium rectitudinem ad fibras reiiicitur.* 120
- XV. *Vera opinio rectitudinem consistere in meatibus.* 122
- XVI. *Possunt deperdita rectitudine fieri*

I N D E X.

<i>fieri metastasis laudabilis.</i>	124
XVII. <i>Communitas, & rectitudo que nam cui praeferatur.</i>	128
XVIII. <i>Quid, & quotuplex diadoche.</i>	130
XIX. <i>Derivationes.</i>	132
XX. <i>Exceptiones.</i>	133
XXI. <i>Successiones.</i>	135

LIBER TERTIVS.

CAP. I. A <i>Postasis quotuplex.</i>	138
II. <i>Differentia inter apo- stasin & metastasin quam Galenus tradit, an sit iuxta Hippocratis doctrinam.</i>	140
III. <i>Materia abscessuum.</i>	142
IV. <i>Futura crisis per abscessum cognitio.</i>	145
V. <i>Precognitio loci in quo futurus sit abscessus.</i>	157
VI. <i>Abscessus, qui boni, qui pravi.</i>	162
VII. <i>Quae crisis sit melior per effluxum, an per decubitum.</i>	172
VIII. <i>Parotides rarò prodesse possunt.</i>	174
IX. <i>Conditio quae requiritur ut parotides sint utiles.</i>	175
X. <i>Quid</i>	

I N D E X.

X.	<i>Quid habeant parotides ab aliis abscessibus diuersum.</i>	177
XI.	<i>In quibus parotides cum aliis abscessibus consentiant.</i>	181
XII.	<i>Neutra parotidum conditio.</i>	183
XIII.	<i>De bubonibus pestilentibus.</i>	184
XIV.	<i>Abscessus vniuersales, alij per modum plurium, alij per modum.</i>	186
XV.	<i>De morbillis.</i>	188
XVI.	<i>De variolis.</i>	189
XVII.	<i>Comparatio inter variolas, & morbillos.</i>	192
XVIII.	<i>De variolarum prauitate.</i>	195
XIX.	<i>De puncticulis.</i>	196
XX.	<i>Abscessus vniuersalis per modum vnius.</i>	201
XXI.	<i>De palindrome.</i>	206

LIBER QVARTVS.

CAP. I.	Q <i>ua mala supra mala necessario eueniunt.</i>	215
II.	<i>Quae mala supra mala consultò eueniunt.</i>	219
III.	<i>Quae mala supra mala fortuitò eueniunt.</i>	221
IV.	<i>An liceat Medico sterilitatem inducere.</i>	

ducere.

224

V. De sterilitate qua venarum sectione
inducitur.

229

VI. An liceat Medico abortum medi-
camentis prouocare.

242

VII. An Medico liceat febrem induce-
re.

250

VIII. Quando morbum morbo curare
conueniat, quando non.

256

IX. Morbus ex solutione continui mor-
bos alios curat.

262

X. Cur plurima septica remedia, qua
extra cuti imposita vlcus efficiunt,
intus sumpta, non exulcerant.

271

ОБЪЯВЛЕНІЕ



STEPHANI
 RODERICI
 CASTRENSIS
 LVSITANI;
 QVÆ EX QVIBVS.
 LIBER PRIMVS.

IN CAPVT. I.

Inscriptionis ratio.



VISQVIS obscuritatis
 inscriptionem istam in-
 simulas, Hippocratem te
 insimulare memento,
 cuius verba sunt 1. epid.
 sect. 3. ὅσα ἐξ ὅσων, quæ ex quibus: aut,
 ut alij codices habent, ὅσα ἐξ ὅσων εἰς ὅσα,
 quæ ex quibus in quos. Ita morborum

A

viciss

vicissitudines, successionésve significat, quas Medico, inter quamplurima alia, considerandas proponit. Accidunt morbi (vt *ibidem* testatur) *aliy in solutionem, aliy in perniciem*. In solutionem aliquando idemmet accidisse vidit, vt cum dysenterici, superueniente stranguria, sanabantur, 1. *epid. sect. 2.* quod quodammodo animaduertens ait, ἀλλὰ τῆς λύσεως ἄλλων ἄλλα, *sed his alia pro aliis*. Abscessus etiam, & fistulæ iuxta eundem 6. *epid. sect. 3.* Ἡ ἑτέρα δὲ ποσὶ κήλης, *aliorum medela sunt*. Propterea contemplatur 6. *epid. sect. 3.* Ἀνδ' οἷον αἰνέει, *pro quibus qui morbi*. Videlicet, qui morbi-utilitatem aliis morbis afferre possint. Morbīne, qui naturæ sunt hostes, naturam inuare queunt? quidni? nonne Plutarchus *de utilitate capiendæ ab inimicis*, libellum scripsit, & inscripsit? ita sanè: & quemadmodum rectum sequitur ex errore, sic ex morbo sanitas. Hócne perpetuum? minimè: iccirco Hippocratem dixisse animaduerto, *alios in solutionem, alios in perniciem*. Fertur ægrotans superueniente morbo, ad perniciem, si non ob aliam, saltem ob debilitatam. Sententia

est à magno dictatore in libello de affectibus promulgata: in morbis cum alter alteri succedit, plerumque occidit. Dixit plerumque, perpetuitatem auferens. Rationem adiungit, cum enim corpori à presente morbo debilitato, alius morbus accesserit, pra imbecillitate perit, priusquam alter morbus, qui posterior accessit, desinat. Nec verò sola imbecillitas causa est, cur posterior morbus interimat, sed plures aliae. Quare morbos post morbos, quando ad solutionem, quando ad perniciem accidunt, contemplari, praesens erit labor.

C A P. II.

Quid metaptosis, quid epigenesis.

MORBOS morbis alios κτ' πλὴν με-
ταπλοσιν per metaptosin, alios κτ'
πλὴν ἐπιγενέσιν per epigenesin accidere,
hypothesis esto. Quid inter utramque
intersit, si quæras, vocabula consule,
ipsa te manudent. Si morbus in al-
terum morbum, exutus priore pelle,
mutetur, Græci μεταπλῆσιν dicunt, &
inde μεταπλοσιν, metaptosin. Si autem,

utroque malo superstitie id fiat, Græci
ἐπιγένεσις, & inde est *ἐπιγένεσις*, epige-
 nesis. Nouit hoc Galenus 7. aph. 11.
 qui transmutatur, inquit, morbus, quando
 priore cessante, aduenit alter; superuenit
 autem, quando altero adhuc manente, al-
 ter adiicitur. Est itaque metaptosis,
 permutatio vnius in alterum, abeunte
 priore; epigenesis verò, propagatio,
 hoc est, id quod manente priore, denuò
 adnascitur.

C A P. III.

Metaptosis aliquando bona.

NON vnâ duntaxat metaptosis
 subit conditionem: interdum fit
ἐκ φαύλων εἰς ὑγιαινόντων, à prauis ad benigna,
 & in hac, quo maximè tempore (ut
 Galenus admonet 1. prorrh. sect. 1. com.
 12.) Medicis quoad infestantium, vel
 copiâ, vel qualitate humorum vacua-
 tiones, procedendum sit, ostenditur.
 Interdum autem *ἐξ ὑγιαινόντων εἰς μοχθηρὰ*,
 à bonis ad praua. Iuxta hanc si plenior
 aliquis (ut Celsus ait lib. 2. cap. 2.) &
 speciosior, & coloratior factus est, suspecta
 habere

habere bona sua debet. Nam (vt Hippocrates , à quo Celsus didicit , scriptum reliquit) *Habitus exercitatorum, qui ad summum bonitatis attingunt, periculosi.*

Dices fortasse habitus istos non esse bonos , ac subinde in eis non fieri metaptosin à *bonis ad praua*. Non esse autem bonos persuadebis, tum quia sunt periculosi , (nihil autem periculosum bonum) tum quia eos statim soluendos esse ait Hippocrates ; bonum autem non solui , sed conseruari iubetur. Sunt quidem boni , immò optimi , & quia optimi *non possunt in eodem statu permanere, neque proficere*. Adiungit ergo meritò diuinus Senex : *his de causis bonum habitum soluere expedit* , scilicet præseruationis, non curationis gratiâ.

Interdum etiam est metaptosis ἀδιάφορος, *indifferens* : sic appello eam, quæ nec est à *prauis ad bona* , nec à *bonis ad praua* , sed vel ἐξ ὁσμῶν εἰς ὁσμῶν , à *bonis ad bona* , vt si sudor conuertatur in urinam, aut vice versa , mictio transeat in sudorem : vtriusque enim est (inquit Galenus 10. *simpl. cap. de sud.*) materia eadem , & idem generationis modus. Similiter, si mictio, transeat in

deiectionem, aut è contrà si deiectione
in mictionem, ex aph. ult. lib. 4. *utrumq;*
bonum. Vel ἐκ μὲν θύρων εἰς μὲν θύρᾶ, à pra-
uis ad prava, vt quando ex vno delirio
in aliud fit transitus, *utrumque malum.*

C A P. I V.

Epigenesis nunquam bona.

DE epigenesi quid dicam: nisi sem-
per malum. Vade ad septimum
aphorismorum librum, qui ab antiquis
ἐπὶ τῷ ἐν γενέσει, *de epigenomenis*, seu
de superuenientibus inscribebatur, ibi
nihil reperies bonum. Praxagoras (vt
refert Galenus 6. aph. 35. & 7. aph. 15.)
volumen haud paruum etiam *de super-*
uenientibus scripsit; neque epigenesin,
nisi in morbis grauissimis, admisit.
Galenum quoque audire libet sæpe
hoc idem repetentem. *Superuenientium*
(inquit 7. aph. 11.) *consistentia*, neque
paruos, neque *mites* insequitur *morbos*,
sed magnos, atque *malignos*. Propterea
in eodem libro, *sententia* 15. à sanguinis
sputo puris sputum, non tanquam perpe-
tuum recepit: neque enim omne sputum
sanguine

sanguinis, sequens habet sputum purulentum, sed tantummodò quod malignum existit. Dices fortassis, à sanguinis sputo puris sputum esse potius metaptosin quàm epigenesin: quippe prior morbus, nempe sanguinis sputum, transit in alium morbum, videlicet puris sputum. Nihilominus epigenesis dicenda est, cùm utrobique sit idem educationis modus, & materia eadem, sed posterior peior priore, quod est epigeneseos proprium. Si autem epigenesis non esset, non collocaretur in eo libro.

Nec verò sufficit, ut morbi, qui epigenomena habere debent, sint suapte natura magni, verùm necesse est etiam, ut tunc cùm epigenesis aduenit, auctam habeant magnitudinem: ideò superuenientia ea esse statuit Galenus 7. aph. 17. quæ passionibus auctis, & iam deterioribus factis superueniunt: nam (ut idemmet testatur 6. aph. 35.) superuenire passionibus alias passiones, & casus prisci Medici dicere consueverunt, quacunque ipsius passionis aucta ratione contingere solent. Et meritò: quemadmodum enim animalia, nonnisi prouectioris ætatis, sunt apta gignere; ita

8 *Quæ ex quibus.*

etiam (vt Galeni verbis vtat 5. aph. 58.)
non simpliciter alterius passio alteri su-
peruenire apta est, sed iis quæ magnitudi-
nem habent effatu dignam.

C A P. V.

*Vrina interdum significant meta-
ptosis, interdum epigenesis.*

DVplex vrina meteorismum signi-
ficat: vna alba diaphana, alia
crassa confusa, velut iumentorum; hæc
per epigenesin, illa per metaptosis.
Libet utramque enucleare. Quod ar-
tinet ad crassam confusam, qualis est
subingalium, hæc epigeneseos est si-
gnum. Rem ita accipe: Hippocratis
sententia est 4. aph. 70. *Quibus vrina
perturbata, quales sunt iumentorum, is
dolor capitis vel adest, vel aderit.* Tu ta-
men doloris nomine, omnem laborem
accipito: nam vrina, quæ perturbata
mingitur, & talis diu permanet, non
solum cephalalgias significat, sed &
desipientias, & conuulsiones, & quic-
quid graue, vel in capite, vel à capite
potest euenire. Fit autem hoc per
epigenesin,

epigenesin, quoniam tanta est agitatio, ut procella ad cælum usque, hoc est, ad sacrum mentis domicilium attingat, sed inferiore regione non interim remanente liberâ, quæ est epigeneseos (ut sic dicam) conditio sine quâ non.

Quod verò spectat ad alteram urinam, nempe albam diaphanam, ea præter cruditatem, quam ut plurimum indicat, potest aliquando raptum humoris à venis, in quibus ichorem tinge-
bat, significare. Si hoc delirantibus accidere videas, viam cerebri accepisse, & rationis arcem occupâsse existima-
to. Quemadmodum enim fumus inferna domorum deferens tectum petit, quod nigredine inficit: Sic flava bilis, cerebrum, quod tecto domûs assimila-
latur, petens, illud suo flavo imbuunt colore. Propterea 4. aph. 72. inquit Hippocrates: *Quibus urina alba, & perspicua mala, præsertim, si in delirantibus appareant.* Vertunt alij in phreniticis. Alij aliter, ut videre est tam apud Galenum, tum apud alios expositores. Quod verò in præsens confert, est scire urinas fieri decolores, ex defectu biliosi succi, à quo flavum habent co-

lorem : quippe succus iste ad caput
serpit, vt indicat delirium, & infernas
partes deserit, vt ostendit priuatio co-
loris.

Nihilominus negaret aliquis esse
metaptosin, potiusque vellet epigene-
sin appellare : nam per has vrinas non
adest diminuta febris, sed sæpe aucta.
At scito, biliosi humoris qui sedem
mutauit, metaptosin esse : quoniam
autem locus, in quem se contulit, est
membrum princeps, nempe cerebrum,
ex cuius inflammatione febres vehe-
mentissimæ excitantur, fit vt quæ fe-
bris vna erat, duplex reddatur, & sub-
inde vehementior quàm antea. Est
namque febris prior, est & posterior,
quæ febris symptoma appellari debet :
nec quia symptoma est, existimes cum
Vallesio esse ephemeram. Decisa est
alibi hæc controuersia, & febres, quæ
ad inflammationes, aut alios morbos
consequuntur, eosque velut vmbra
corpus, sequuntur, symptomata omnes,
præter vnum Vallesium, appellant.

Adhuc non acquiescit forsitan ani-
mus, sed ex Galeno dubitandi ansam
accipit : quippe in *aphorismi com-*

mentario, aliam etiam recipit expositionem: *Aquosa urina mala sunt, præcipuè verò tales apparent in phreniticis, qui perniciosè se habent.* Si igitur non in omnibus, sed in iis quibus aucta est phrenitis, hoc fit, hæc est epigeneseos lex, non metaptoseos. At in primis isthæc expositio, à multis indigna quæ recipi debeat, censetur. Deinde si eam recipias, considera epigenesin fieri, priore malo aucto, phrenitidem verò in hac mutatione coloris urinarum, posteriorem esse morbum, qui meritò ingrauescit, propter augmentum materiæ à venis transmissæ. Itaque habent se perniciosè phrenitici non ante, quàm urinæ decolores appareant, sed tunc cùm tales apparent, immò paulo postquam tales apparent, ita ut coloris in urina defectum vel comiteatur, vel sequatur augmentatio phrenitidis. Epigenesis autem sequitur ad morbum iam priùs auctum.

CAP. VI.

Vrina etiam ut causa, & metaptofin, & epigenesin faciunt.

POtest vrina, non ut signum, sed ut excrementum quoddam est, epigenesin efficere, uti si quando *σπασμεία*, vrina stillicidium, vel *δυσουεία*, difficultas vrina, per epigenesin, hoc est, per propagationem mali, euadât *ισχυεία*, vrina suppressio. Aut etiam quando vrina multa, sed colorata, vertitur in vrinam multam, sed nihil in colore à potu diuersam, prior affectus multitudo vrinæ appellatur, posterior autem ex augmento prioris mali, dicitur *δίψασις*, & *διασπινος*, & *ὅδ' ὁρῶντες εἰς ἀμύδα*, & *δυσπύρρα εἰς ἔρα*, nos retento Græco vocabulo communiter *diabetem* nuncupamus.

Similiter vrina, ut causa, hoc est, ut euacuatio, metaptofin. facit, ut in illa tempestate, in qua dysenterici liberabantur per vrinæ, quas Hippocrates. 1. epid. sect. 2. text. 8. appellat *strangurias*, non *nephriticas*, quasi dicat mordaces, non renum vitio, sed quoniam bilis. acris.

aeris , quæ intestina corrodens dysenteriam excitabat, conuersa ad vesicam, ibique mordens , stranguriosum affectum præ se ferebat. Et hæc est metapto-
sis à prauis ad bonum, etiam in mor-
 bis qui sunt extra venas. In aliis etiam,
 qui intra venas sunt , & diuturnas ex-
 citant febres, potest *ad bonum* metapto-
 sis fieri : siquidem 4. *aph.* 74. materia
 harum febrium pituitosa , quæ pro-
 pterea abscessum apta erat efficere , ad
 vias vtinarias conuersa liberat.

C. A P. V I I.

*Eundem morbum posse in uno per
 epigenesin , in alio per meta-
 ptosin fieri, exemplo pleuritidis;
 & peripneumonia confirmatur.*

Illudit aliquando pleuriticos falsum
 salutis specimen : siquidem puncto-
 rio dolore euanescente , rem putant in-
 tuto esse , verum cum suo malo addi-
 scunt , difficultate respirationis adhuc
 manente , & febre in sua acutie perse-
 uerante , translatam fuisse materiam à
 membrana costas succingente , hoc
 est.

est, à pleura, ad pulmones, & ex pleurítico, non minore periculo factum esse peripneumonicum, & hoc per metaptosin, recessu materiæ à priori loco ad alterum. Verùm potest etiam pleuriticus per epigenesin peripneumonicus fieri, ita ut nec cesset dolor, & adsint noui morbi signa. Immo verò, quando Hippocrates 7. aph. 11. ait, à morbo laterali inflammatio pulmonis malum: Galenus, & per metaptosin, & per epigenesin posse fieri fatetur, inquiens, quòd morbus lateralis soleat in pulmonis inflammationem transmutari, vel morbo laterali pulmonis inflammatio superuenire. Attamen existimat aphorismum de epigenesi loqui, nam adiungit: verùm hoc in loco videtur Hippocrates de superuenientibus agere, quibus statim hoc inest, quòd mala sint, adeò ut etiamsi hoc verbum [malum] non adiciatur, vel subaudiendum sit, secundum modum à communi ductum, vel potentiâ ostendi existimandum. Itaque quoniam Hippocrates dixit malum, arbitratur Galenus eum de superuenientibus agere. Cæterum siue per metaptosin, siue per epigenesin fiat, semper est malum. Per metaptosin.

metaptosin quidem: nam cum transmutatio à pleuritide ad pulmoniam, sit ad gravius malum, non solum dicetur metaptosis *à pravis ad prava*, sed multo melius *à pravis ad peiora*. Per epigenesin autem, quoniam hæc semper est mala. Si verò quæras, cum à pulmonia ad pleuritidē vertitur ægrotudo, quo nomine sit designanda? Respondebo cum Galeno *ibidem*, hunc euentum rarissimum esse: siquidem ad inflammationem quidem pulmonis morbus lateralis non admodum consequi solet: quoniam si similis fuerit inflammatio, omnis humor noxius per sputum expurgatur; in perniciosis verò, antequàm costæ compatiantur, strangulat agrum. Si verò contingat aliquando ex pulmonia pleuritis, vel erit propter auctam in pulmone materiam, & pleuræ accedentem, & erit epigenesis; vel ob eandem transmutatam, & erit metaptosis *à pravis ad prava*. Nam si aliquantulum minus malum sit pleuritis, tamen hoc minus, incommoditate, quam secum affert posterior morbus, compensatur.

CAP. VIII.

Idem ostenditur exemplo rigoris.

Rigor etiam in ardentibus, & per metaptosin, & per epigenesin potest euenire: quamuis enim 4. aph. 58. dum Hippocrates ait: *à febre ardente habito, rigore superveniente, solutio*, utatur verbo *ἐπιγενόμενος*, nihilominus de transmutatione, iuxta Galeni mentem, debet intelligi: siquidem rigor iste, materiæ transmutationem secum fert, siue per deiectionem, siue per vomitum, siue per sudorem. Quando autem eodem 4. aph. 46. dicitur: *si rigor incidat, febre non deficiente, agro iam debili, lethale est*. Considero verba illa, *ἰσχυρὸν ἐμπιπλὲς πυρετῶς μὴ ὑστελείπων*, hoc est, *si rigor incidat febre non deficiente*: ut sit secundus morbus, non desinente priore, quod quidem iccirco *θανάσιμον*, id est, *lethale* est. Ita ut rigor possit fieri, mutatâ ad habitum corporis materiâ, vel eâdem propagatâ.

C A P. IX.

Idem, exemplo diarrhœa.

POTEST similiter alui fluxus pleurítico, aut peripneumonico interdum per metaptosin, interdum per epigenesin, superuenire. Metaptosis quidem erit à *prauis ad bona*, nempe transmutatâ materiâ à pulmone, aut pleurâ ad intestinorum vias. Epigenesis verò, suo more, praua erit, communicato scilicet iam hepatis malo: vnde Hippocrates 6. aph. 16. à morbo laterali, seu pulmonia habito, fluxus alui superueniens, malum. Quomodo ergo cognoscemus, num per metaptosin, an per epigenesin fiat? Ex affectus magnitudine. Iccircò Galenus considerat verbum illud *habito*, id est, *detento atque vexato*: quoniam, vt ipse ait, in mediocri morbo laterali atque pulmonia, profluvium alui superueniens potest interdum prodesse, ratione euacuationis.

C A P. X.

Idem, exemplo hydropis.

Est etiam in febre acuta epigenomenon, sanguificandi actio vitata, ad quam hydrops sequitur. Non est presentis negotij omnes hydropis species percurrere: hoc alibi præstiti, & aliorum etiam fuit labor. Solùm hîc considerandum offero, hydropem vel fieri primariò, de quo non opus est agere, vel secundariò: & hic vel fit per metaptosin, & est bonus, vel per epigenesin, & est prauus. Vtrumque reperies apud magnum Hippocratem. Nam in primis per metaptosin fit, mutato humore à capite ad partem inferiorem. Extat aphorismus quintus sectionis septimæ: *A furore difficultas intestinorum, vel aqua intercutem, vel mentis alienatio, bonum.* Galenus ibi metaptosin agnoscit, licet mentis alienationem bonam esse non recipiat, quia ibi nulla datur bona metaptosis. At in reliquis *difficultatem quidem, inquit, intestinorum, vel aquam intercutem, transmutationis*

tionis ratione, esse furoris sanationem, non est extra rationem, cum à capite noxi humores transferantur.

Per epigenesin autem aqua intercus est illa, quæ morbis acutis superuenit, dicente Hippocrate 2. *progn.* 1. *Aqua intercutem omnes, quæ ex acuto morbo existunt, mala sunt: non enim à febre liberant, dolorosæque sunt valde, & lethales. Incipiunt autem plurimæ ex partibus inanibus, ac lumbis, iecoræque. Vnum habet commune hydrops factus per epigenesin, cum aliis, quæ fiunt vel primariò, vel per metaptosin, videlicet quòd in omnibus iecur afficitur: neque enim potest sanguificationis actio deperdis, quin iecoris vitio, & culpâ hoc accidat. Accidit tamen nonnunquam ab aliis partibus vitium incipere, nihilominus, ut sit hydrops, necesse est iecur in consensum saltem trahi. Propterea incipiunt multi à partibus inanibus, ac lumbis, iecoræque. Quod à iecore incipiant, nulli dubium est; quòd autem à partibus inanibus ac lumbis, id quomodo fiat, explicatione indiget. Sunt partes inanes, Græcè ἀπὸ τῶν περιόντων, & hæc à Galeno appellantur τὰ λαπαρά, id est,*

est, flaccidæ partes. Sunt autem ab extrema thoracis costa usque ad ossa ilium, & comprehendunt totum id ventris molle & sine ossibus spatium, quod pertinet ad intestina tenuiora, ieiunum, & lactes, quæ sunt venæ mesaraicæ. Istæ autem partes, meritò inanes appellantur, ubi ad superiores, & inferiores comparantur, quæ omnes osseæ sunt. Cum igitur istæ partes iecori sint circumvicinæ, ex earum prava dispositione, prauè quoque disponitur ipsum iecur. Addit præterea Hippocrates lumbos, tum quia non valde à iecore etiam distant, tum quoniam lumborum nomine comprehenduntur renes, quorum debilis attractio, aquosi humoris retentioni, aggregationique occasionem præstat. Ex multorum aliorum viscerum affectibus, ut ex liene fit, hos tamen omisit, quoniam loquebatur de aqua intercutem, quæ acuto superuenit morbo. Non est tamen negandum, liene inflammato, iecur etiam, in suo sanguificandi munere plurimum deficere, ac propterea tractu temporis epigenesin ex morbo lienis fieri. Itaque hydropes per epigenesin

genesin non liberant à febre: quoniam, vt Aëtius *teir. 3. serm. 2. cap. 20.* inquit: *humor qui detinetur, falsus est, & putrefactus.* Dicuntur itidem dolorosi, non quod alios hydropes, qui primariò fiunt, dolor non comitetur, sed isti præ dolore ægrum rapiunt, quia scilicet illum à priore morbo confectum accipiunt.

C A P. X I.

Epigenesis in morbum eiusdem speciei.

PROpagari morbum in eadem specie infima contingit, vt si ignis facer, qui crus, aut brachium occupat, vel è crure ad abdominis regionem, vel ad thoracis ex brachio dilatetur, & extendatur. Aut etiam si *φλεγμονή κιονία* & *ἐν τριόδῳ*, id est, inflammationis gurgulionis, aut glandularum quæ sub lingua sunt, dilatetur adeò, vt deueniat in *κονδύχλω*, id est, anginam; vel quando tertiana, ex simplice fit duplex. In eadem specie subalterna, vt dum ex tertiana intermittente fit continua, aut

auctâ

auctâ ventriculi intemperie, iecur intemperiem contrahit, aut vice versa, iecore intemperie laborante ventriculus suscipit eandem.

C A P. XII.

Epigenesis in morbum alterius speciei.

PROpagatio autem in morbum alterius speciei, vt quando ex tertiana fit quattana, aut etiam quando ex febre diuturna fit hemitritæus, acuta quidem febris, & valde lethalis. Et ita accidere posse, colligitur ex Hippocrate 1. *epid. sect. 3. text. 5.* & ostenditur ratione quadam non contemnenda: quippe diuturnitate febris, facultas concoctrix debilitatur, ac propterea cruditates multæ congeruntur: Rursus febrilis caloris assiduitate adurit pars sanguinis, ideoque bilis coaceruatur. Tandem diuturnitate mali varia membra offenduntur, fitque crudis & biliosis succis in variis membris congestis, hemitritæus.

CAP. XIII.

*Epigenesis in morbum toto genere
diuersum.*

QVoniam febris morbus est in in-
temperie, bubo morbus in com-
positione, & hi duo morbi toto genere
inter se distant, quando ex bubone fit
febris, prorogatur morbus in alium
toto genere distantem. Prorogatur, in-
quam: nam ex bubone aucto fuligines
putres, atque malignæ cor petunt, &
prauam excitant febrem. Quod si sit
ephemera, suppurationi duntaxat de-
betur; quia *dum pus conficitur dolores,*
& febres fiunt, febrisque tunc ex spiri-
tibus excalfactis procedit. Itaque cùm
Hippocrates dicat 5. aph. 55. *ex bubone*
febres omnes orta male, prater ephemeræ,
sunt quidem *male* per epigenesin, pro-
pagatis scilicet putridis fuliginibus;
sunt autem ephemeræ per diadochen,
hoc est, per successionem partis ad par-
tem, de qua postea plura dicturi sumus.
Epilepsia & melancholia, si ad mor-
bos spectes, toto genere distant: quip-
pe

pe epilepsia est morbus in via, seu in numero, aut compositione, videlicet obstructio; melancholia morbus in intemperie simul cum materia. Symptomata verò aliquo modo in genere conueniunt: quandoquidem utrobique actio est laesa, in epilepsia motus, in melancholia sensus, nempe potentia interior. Atque hi duo morbi sese inuicem consequuntur, dicente Hippocrate 6. epid. sect. 7. in fine, text. § 4. iuxta Foësum. *Atrabilarij etiam comitiali morbo corripì plerumque solent, & vicissim comitiales fieri solent atrabilarij.*

Hoc autem per epigenesin fieri patet: tum quia nunquam melancholicus fit epilepticus, neque epilepticus, melancholicus, nisi aucto nimis malo; tum quia adueniente posteriore prior non cessat. Cæterum quomodo sese inuicem consequantur, alibi considerabo. Vnum duntaxat nunc inculcare est operæ pretium, quod Galenus adnotauit 3. loc. affect. cap. 7. nempe hanc vicissitudinem non esse perpetuam, sed ita magnâ ex parte accidere, quippe non solum melancholicus succus, verum etiam pituitosus morbum comitiale committit.

Igitur

Igitur is, quem melancholicus succus constituit, in melancholiam transit; qui verò à pituitoso ortus est, in aliam affectionem permuat, melancholiam verò haudquam efficit. Quamvis autem [permuat] dicat, ne propterea metaptosin intellige: quippe improprie est loquutus, quandoquidem permutatio in alium morbum, manente priore, impropria permutatio est.

CAP. XIV.

*Epigenesis inter symptomata
eiusdem speciei.*

PROpagatur etiam symptoma eiusdem speciei, ex: gr: in exeunte mutato. Habes apud Hippocratem 7. aph. 15. à sanguinis sputo puris sputum: neque enim cessat sputum sanguinis superueniente puris sputo, sed ex mero sanguine fit pus sanguini permixtum. Hunc autem aphorismum ad epigenesin refert Galenus inquiring, quòd omnis hac enumeratio sit eorum, quae proprie superuenientia vocantur, manifestum est: Et huius rei adducit rationem, quia

B epige

epigenesis non sequitur; nisi ad graue sanguinis sputum. Aliud exemplum epigeneseos ex symptomate ad symptoma eiusdem speciei, nempe in læsa actione, sumitur ex eiusdem *septimi libri aph.* 18. *In vigilia convulsio, & desipientia*: Cum namque vigiliæ crescunt, & durant, patitur cerebrum ex siccitate: vnde duo illa symptomata, alterum in læso motu, videlicet *convulsio*; alterum in læso sensu interno, hoc est, *desipientia* eueniunt, nec propterea vigiliæ cessant, sed valde horribiliores fiunt.

C A P. XV.

Epigenesis symptomatica ad symptoma diuersarum specierum.

SI verò quæras epigenesin inter symptomata diuersarum specierum, accipe vnum in actione læsa, alterum in qualitate mutata. Hoc tibi se offert eodem *7. aph.* 26. *In forti dolore ventris, (& est actio læsa) frigiditas partium extremarum, (& est qualitas mutata) malum.* Neque poterat non esse malum, id

id quod per epigenesin fit. Quomodo autem fiat istud *malum*, sic accipe. Contrahitur in forti dolore, pars dolens, & à vicinis partibus contractione sanguinem, ac subinde calorem ad se conuocat. Vicinæ etiam partes, doctrinâ quadam innatâ sanguinem, & spiritus in subsidium ad locum doloris transmittunt. At adhuc extremorum frigiditas nulla est, quippe (nisi in valde debilibus) calor tantus est, qui partim dolenti membro succurrat, partim membrum mandans non deserat. Cùm verò eò increuerit dolor, ut propter illum cor anxietudinem patiatur, (patitur ex vehemente molestiâ, vehementem molestiam dolor infert.) Tunc viscus istud princeps, & fons caloris, ab extremis Microcosmi regionibus ad centrum, hoc est, ad se (quippe in centro residet) calorem attrahit, propterea extrema priùs, utpote distantiora, frigent, & hoc dixit Hippocrates *malum*: Erit autem deterius, quò plura frigescent membra. Tandem deterri- mum, & pessimum, cùm omnia. Contingit autem hoc præcipuè, ut Galenus ait, *s. de loc. affect. cap. 1. quibus vitale*

robur infirmum est, animi verò affectiones, ob imperitiam, fortes. His anima [spirituum] essentia faciliè dissolui potest.

C A P. XVI.

Epigenesis symptomatis in morbum.

ETiam symptomata, si nimis augeantur, propagantur in morbos. Adsit v. g. diarrhœa, hæc si increascit febrem habet comitem: consentaneum enim tantæ agitationi febrile incendium est. Diarrhœam in numero symptomatum; quæ consistunt in excretis immodicè, constitue, febrem morbum appellato. Nam etiam quando febris pro symptomate habetur, morbus est; dicitur tamen symptoma, quia ad affectum priorem, more symptomatum sequitur.

Aliud exemplum, *Αποτυχία τῆς ἐνματώσεως* ἢ ἐργ, id est, *frustratū sanguificandi opus*. Læsa nēpe actio, & subinde symptomatice, tres multiplicat substantias naturę nostrę suâ multitudine aduersas, serum, pituitam, flatus; hinc tres emergunt

gunt hydropis species satis notæ. Est autem hydrops morbus in compositione, seu in figura.

Tertium exemplum. Dolor est symptoma, læsa scilicet actio, propagatur autem in morbum, hoc est, in inflammationem, quod luculenter exponit Galenus 3. meth. cap. 3: in hunc modum. *Vna est natura facultas, quam excretoriam dicimus: ea suo munere fungitur, cum triste aliquid sentit. Vnum verò quiddam ex iis, quæ eam contristant, ipsa quæ dolorem excitat causa, quæcunque ea sit. Hanc igitur eiicere dum properat, phlegmonem interdum in particula excitat: cum enim primis suis conatibus nihil profecit, vehementius aggressa, quod infestat expellere, sanguinem, & aliquid spiritus, ex superpositis partibus, in afflictam simul exprimit. Atque hinc fit, ut ex dolore, particula, pro portione fluentis humoris, in tumorem tollatur.*

Quartum exemplum ex 7. aph. 23. *A deiectione sincera difficultas intestinorum, malum. Quippe deiectio sincera, symptoma est in excretis immodicè: ab hac fit morbus in compositione, seu etiam in continui solutione, vide-*

licet vlcus in intestinis, hoc est, *dysenteria*, seu *difficultas intestinorum*.

C A P. XVII.

Epigenesis morbi in symptomata.

PRæter symptomata *παθognomonica* pathognomonica, quæ necessariò cum morbo adueniunt, & *ἐπιφανόμενα*, epiphanomena, seu mox apparentia, quæ eueniunt quidem simul cum morbo, non tamen necessariò, nec semper: sunt alia *ἐπιγενόμενα*, epigenomena, seu superuenientia, quæ ad magnitudinem morbi consequuntur. Hæc quamuis tam multa sint, vt comprehendi omnia vix possint, non inanis erit labor, plurima pertractare, tum quæ febrium calorem, & siccitatem consequuntur, vt sitis, quæ licet sit pathognomonicum ardentium, potest, si augeatur, inter epigenomena recenseri. Sic Philiscus 1. epid. sect. 3. agr. 1. febre ardente correptus, tertia die apparuit suibundus. Lactatio etiam in lecto, caloris implacabilitatem sequitur, vigilia siccitatem, delirium vtrumque. Alia etiam sunt, quæ

quæ essentia febris aduersantur, ut si in febre ardente calor non sit valde mordax, si æger cum linguæ ariditate non sitiat, si lingua non rubescat, si in lecto non agitetur. Hæc licet non sint symptomata, sed symptomatum priuationes, nihilominus non nisi malignis febribus superueniunt.

C A P. XVIII.

*Febris erratica, seu πυρετός
πλανώδης.*

Contingit aliquando, ut tertianæ motus, qui prius statutum seruabat ordinem, postea reddatur ἀτάκτος, & πλανημένος, id est, inordinatus, erraticus, & febris hæc πλανώδης appellatur. Est autem ista paroxysmorum incertitudo, significans vel varietatem humorum, cum scilicet febrile incendium vnum tantum, saltem præcipuè, mox verò plures, ferè principaliter, apprehenderit. Vel prædominium melancholici succi, qui in principio non ardebat, sed solus biliosus, postea ardere incipit, & pars eius mouetur putre-

facta, pars alia sine putredine manet immota. Hoc epigenomenon est ex iis, quæ materiam febris sequuntur.

C A P. XIX.

*Febris singultuosa, seu πυρετός
λυγώδης.*

EX iis verò quæ locum materiæ febrilis referunt, est λυγ'ξ, λυγίς, & λυγμός, id est, *singultus*, quo affecti dicuntur λυγώδεις, id est, *singultuosi*. Non autem quilibet singultus febrem facit, quæ λυγώδης, id est, *singultuosa* appellatur. Nam, *ut singultuosa vocetur* (inquit Galenus 4. acut. 69.) *permanere amplius debet singultus, vel etiam per totum morbum simul cum febre exacerbari*. Intellige tamen *per totum morbum*, id est, ex quo singultus cœpit ægrum corripere. Etenim potest aliquando simul cum febre adesse, & tunc est επιγινόμενον, id est, *mox apparens*; aliquando euenire post primos dies, & est υπεργινόμενον, id est, *superueniens*. At tamen debet perdurare, nam ex singultu qui facilè evanescit, non dicitur febris

febris *singultuosa* : Solet namque singultus facilis, vel spiritûs cohibitione, vel ex Hippocratis admonitu 6. *aph.* 13. sternutatione evanescere : vt contigit Aristophani, qui cùm singultiendo rumperetur, neque spiritum cohibendo, neque bibendo leuaretur, tandem ex præscripto Erisymachi Medici, citatâ sternutatione, singultuendi finem fecit. Itaque Galenus eos qui vomitu bilioso à singultu liberantur, febre singultuosâ detentos appellari vetat.

Porro singultus est ventriculi concussio, siue cõuulsio, quâ tunicæ ipsius, id à quo pertinaciter molestantur, excutere laborant : fitque ex Galeni sententia 4. *acut.* 69. & 6. *aph.* 13. quemadmodum reliquæ conuulsiones, aut inanitione, aut repletionem; fit etiam à re mordicante, idè Galeno singultus accidebat (vt ille refert 3. *loc. affect. cap.* 7.) quoties piperis immodicam quantitatem ingererat. Materia igitur siue aduena, siue indigena, in ventriculi ore consistens ac putrescens, febrem excitat singultuosam : febrem, (inquam) ob putredinem; singultum, ob irritationem. Quod si inde vel discussione,

vel euacuatione extrahatur, vtrumque cessat, nempe febris, & singultus, quippe hæc duo ab vna causa fiunt. Si non extrahatur, sed duntaxat ab eo loco remoueatur, cessabit singultus, (erat namque ratione loci) remanebit febris, remanente in corpore humore putrido. Si putredo corrigatur, maneat tamen tunicis ventriculi aliquantula materia impacta, cessabit febris, sed singultus *permanebit amplius*. Hanc febrem curat Hippocrates 4. *acut.* 69. rebus attenuantibus, incidentibus, abstergentibus. Cæterum in ea potest singultus statim aduenire, si statim materia mordeat, & erit symptoma epiphænomenon: poterit & paulo post auctâ cum putredine mordacitate superuenire, & erit epigenomenon.

Potest etiam, nullâ in ore ventriculi materiâ existente, sed duntaxat com-
 patiente illo ad alia, fieri singultus, idque dupliciter, primò ob *sympliciter*
gentilitatem, consanguinitatemve, cum scilicet parte aliquâ nervosâ affectâ nervosum genus, & nervorum origo. cerebrum, in consensum trahuntur; & quoniam os ventriculi plurimos, magnosq;

magnòsque participat netuos, concutitur, & conuèllitur, cùmque pars primò affecta febrem inducat, inducit similiter singultum. Et licèt singultus simul cum febre adueniens, sit febris epiphænomenos, nihilominus ratione passionis neruorum, quæ non nisi valde aucta stomachum in consensum trahit, erit epigenomenos. Ad calcis syderationem, dixit Hippocrates 2. *de fracturis, text. 23.* singultum sequi, verùm non statim, sed si diu iacuerit æger, quam rem appellauit *ὑπνίασµὸν*, id est, *supinitatem*.

Secundò, (& hæc est singultuosa, in qua singultus semper est epigenomenos) quando propter vicinæ alicuius partis inflammationem, ventriculus vel premitur, vel vritur, vel conspurcatur. Sic 7. *aph. 17.* In hepatis inflammatione singultus, malum: vbi Galenus in hunc modum. *Dixi & antea, quòd omnes hi seriatim aphorismi de causibus docent, qui passionibus auctis, & iam deterioribus factis superueniunt. Hoo modo igitur & nunc, singultus hepatis inflammationem patienti dicitur superuenire, non semper, neque quomodolibet patiente,*

tiante, sed quando in magnitudinem attollitur, feruente inflammatione: in quo feruore stomachus ad compassionem trahitur nonnunquam, communium nervorum ratione, qui sunt (ut ipse docuit 2. epid.) breuissimi, &c. Eadem etiam vel compressio ventriculi, vel eiusdem adustio, vel à vaporibus tetris conspurcatio, ex quorum quolibet fit singultus, contingit ex thoracis inflammatione, quod colliges ex 2. de morbis, ubi sic habetur: *Febris detinet vehemens, & rigor, & tussis, & singultus. & una cum saliva grumos sanguinis tussiendo reiecit, & septimâ die moritur.*

C A P. XX.

*Febris horrida, seu πυρελὸς
φριγώδης.*

Quidquid de horrore in præsentī dicam, de rigore similiter dictum putato: differunt enim iuxta magis & minus; quippe horror parvus est rigor. Febris horrida non est illa, cui initio accessionis horror adest: huic enim ἰδιὸν ἐστὶν αἰσθησιμότης, id est, proprium, &

& pathognomonicum signum est horror. Ut ex intermittentibus sunt quartanæ, quas non propriè (cùm eorum proxymum cum horrore incipiant) horrificas appellabis. Ex continuis hemittitæus, quamvis hemittitæum aliquo iure posses febrem horrificam nuncupare: quippe non solùm initio accessionis, sed per totam ipsam horroribus infestatur. Porro horrificæ febres sunt, quibus epigenomicè erebri horrores superueniunt. Contingit autem hoc imprimis in suppurationibus. Suppurationum nomine comprehendo, non solùm quando pus in thorace colligitur, sed in quouis alio abscessu, & vomica. Esse autem epigenomenon ex eo addisces, quod auctam febrem consequitur. Id Galenus agnouit 2. *progn.* § 8. primum enim diem suppurationis eum appellat, quo rigor una cum febre, vehementiore scilicet admodum, quàm anterior, existente, coincidit. Quænam autem pars suppurationem patiatur, ex propriis accidentibus, & aliis locorum affectorum signis cognoscitur. Est etiam epigenomenon auctæ inflammationis: siquidem Galenus

de trem.rigor.palpit.cap.7. inflammationem,cum in abscessum mutatur,rigorem,horrorémque comitari,ait.

Deinde ex qualibet putredine rigores,horrorésve excitantur: nam (vt Galenus eodem 2. *progn.* § 8. ait) *malignis ulceribus, aut cuidam putredinosa affectioni rigere & febricitare contingit.* Hoc tamen, dummodò adsint conditiones, de quibus 10. *meth. cap. 4. & 3. cris. cap. 11.* Prima est *multitudo*, nam multa paucis mordent magis; morsu autem mediocri horror fit, maiore rigor. Altera *acrimonia*, hæc quò magis insignis est, eò magis pungit. Tertia *motus celeritas*: quippe quæ velociter feruntur, vellicant magis, quàm quæ tardè. Quarta *virium infirmitas*, etenim vires si validæ sint, contemnunt omnia; si debiles à quolibet offenduntur. Rigent itaque ægri, vel propter humores biliosos in corpore contentos, vel propter pituitam illam quam Praxagoras vitream appellauit; hæc enim etiam mordere est apta. Propterea epialas, in quibus, vt Galenus ait 2. *de differ. feb. cap. 6.* ægri simul febricitant ac rigent, inter horrificas recenseo.

Nec verò humores solùm, sed & vapores etiam putridi rigere faciunt, & horrere. *Mordentem halitum, & succum, ubi per sensibilia corpora feritur, horrorem rigoremque excitare* dixit Galenus 10. *meth. cap. 4.* Dixit autem *halitum, & succum*, non utrumque simul, sed alterum eorum: multoties enim particula [&], disiunctiva est, non coniunctiva. Posse verò flatuosam substantiam per se solam rigores mouere, testantur tum Hippocrates in *libello de flatibus*, tum Galenus 2. *de sympt. caus. c. 5.* Quamuis autem Galenus dicat, aliquando naturam rigore ab excrementis biliosis exonerari, non ideò negare potest, putridas etiam fuligines rigorem facere, & hinc colliges, (quod Stephanus Atheniensis optimè annotauit) solas putridas febres rigorem comitem habere. Nam ephemeræ & hecticæ nec habent materiam irritantem, neque actium fuliginum effluxum. Ita tamen ut effluxu exoneretur natura, retentione autem agitati humoris vaporisve horreat, aut rigeat. Agitur autem non solùm per venas, quas non omnino sensu carere, ex Galeno aliquando

quando demonstrauiamus, vel per pancreas, & mesenterium, quæ est totius impuritatis sentina: quippe materia hæc continens in se putredinis rudimenta, facile ebullit, feritque membranas, dolorem cum horrore inducens. Potest etiam venenata quædam qualitas irrequietam tribuere conditionem, ob quam in corpore à cacochymia obstructo, materia hac illac fluitans sensationem tristem excitat; propterea natura refugit, & contrahitur; hinc horror, & à fortiore etiam causa rigor oritur.

An detur sine febre rigor, nihil ad præsens institutum attinet. Veteres cum non agnouerunt; agnouit Galenus. Sed cum etiam sine febre cacochymia dari possit, & rigor à cacochymia fieri, potuit quidem parsimonia veterum neque tantam cacochymiam, neque rigorem, qui ei accidit, videre; posteriores autem prauo victu vrentes, in hunc affectum inciderunt, vt adolescens ille, qui palmarum glandibus viridibus utebatur, *de trem. rig. palpit. cap. 7.* Si quæras, quomodo continuis, in quibus materia non fertur extra
venas

venas, rigor adesse possit? Respondeo, ordinatum solis contingere intermit- tentibus, quæ statuto tempore trans- missione humoris extra vasa, suas con- ficiunt reuersiones. At continuæ intra vasa habent fernorem, putredinémque, cuius aliqua pars redundans mordet, & rigori, horrorique occasionem præ- bet. Vt non simpliciter putridarum, sed malignarum quæ materiam irre- quietam habent, sit proprium, crebris horroribus ægrum vexare.

C A P. XXI.

*Febris anxiosa, seu πνευλιος
ἀσώδης.*

SAni homines siquando præsentibus molestantur, & ab vno nego- tio atque actione ad aliam transeunt, ἀλύειν, id est, *anxietudinem* habere di- cuntur: eodem modo (Galenus ait 7. *apb.* 56.) ægros illos anxios dicimus, qui decubitus non ferentes, iacendi figuram euaniant, quia semper præsens aggrauat eos. Iactantur aliqui in lecto, non ob aliam causam, quàm ob in-
gestum

gestum intempestivè cibum. Videbis apud Hippocratem 2. *acut. text. 22.* eos, qui consueti non sunt prandere, & prandent, si supercœnauerint, *σπάλιλω*, id est, *alui levitatem, siue humidam deiectionem* pati. Verùm in exemplaribus non paucis (teste Gal.) non *σπάλιλω* scriptum reperitur, sed *δαλω*, ut eo vocabulo *πίπλασμὸν*, id est, *proiectionem* intelligamus corporis hominis huius, qui ita cibatus est, corporis (inquam) ob cibi multitudinem *δαρωμήν*, id est, *graviter molestèque habentis, atque implacide, inquietèque dum in lecto iacet, sese permutantis.*

Hæc iactatio interdum etiam febres, quas Hippocrates 4. *acut. text. 47.* *αἰσώδες* appellat, comitatur, nempe in quibus ægri (ut Galenus interpretatur) *graviter afficiuntur, atque implacide habent.* Ut 7. *epid.* contigit Chariti, quæ *stragula reiciebat.* Significabatur amplius anxietas, quoniam somno non quiescebat, sed erat *sopor cum dolore.* Ita videbis anxiosos, etiam dum dormiunt, conqueri. Sic eodem libro Patmenisci status describitur, & anxietas eleganter in hunc modum: *Somni ade-*
xanti,

*rant, quandoque verò vigiliæ, & iactatio-
cun silentio, & anxietas, & manus ad
præcordia veluti dolenti. Quoniam au-
tem apud Hippocratem nonnunquam
anxietudo dicitur ἀλυσκ, seu ἀλυξι, sine
ἀλυσμός, seu ἀλύν, nonnunquam verò
ἀση. Inter hæc exiguam, vel nullam
differentiam reperio, nisi velis ita ac-
cipere, ut ἀση magis sit τῆς ψυχῆς, anima.
Alia verò τῆς σῶμας, corporis, nempe
ῥιπλισμός, id est, iactatio. Cæterum hæc
duo semper sese comitantur, aut sal-
tem cum aucta est animi anxietas, ne-
cessariò corporis inquietudo sequitur.
Parmeniscus ille adeò tædio sui tene-
batur, ut cuperet è vita discedere, hoc
tamen initio interpolatim patiebatur:
nam aliquando rursus laetus erat. Tan-
dem progressu temporis aduenit ei
ῥιπλισμός μὲν σιγῆς καὶ ἀλυσμός, id est, iac-
tatio cum silentio, & anxietas. Similiter
Chartadæ ἀση ἢ ἀπὸ τῆς καρδίας, καὶ
ἰδρωτίον σχεδὸν καθ' ὅλον τὸ σῶμα, id est,
anxietas circa os ventriculi, & sudor per
totam ferè corpore, sed progressu ἀση
αὐτοῦ, καὶ ἀλυσμός, id est, anxietas maior,
& inquietudo: Tandem aucto iam valde
morbo, ῥιπλισμός παλὺς, καὶ ὑπὲρ τὰ δεξιὰ καὶ
ἐπὶ τὰ ἀριστερὰ.*

ὅτι τὰ αἰσθητὰ, μεταρρίπτων ἑαυτὸν, ὅδε ἐκ χρόνον ἀταραξίαν. Δυσωλὸς δὲ, id est, iactatio multa, & ad dextra, & ad sinistra transformans seipsum, nullo tempore quiescere poterat. lactationem in lecto cognoscimus, si æger nudos habeat pedes, nec admodum calidos, 1. progn. 16. Nam qui calidos pedes detegit, nihil præter caliditatem significat, quâ oppressus æger refrigerari expetit; qui verò non calidos, huic aliunde hoc accidit, nempe ex inquietudine. Anxietatem istam, seu tædium sui, præter alios morbos, habuit patientissimus Iob: quippe cap. 10. dicebat, *tædet animam meam vita mea*. Latuit Pinedam hæc ægritudo, qui tot alias in sanctum hunc virum conguessit, ut nec morbum Gallicum omiserit, quo nihil ineptius dici potuit.

Inter omnes anxietatis causas, frequentissima est oris ventriculi affectus, immò huic magis propriè vocabulum ἀσση, siue ἀσση quadrare videtur: siquidem & fastidium, & nauseam, eo significant autores Græci. Diosc. lib. 1. cap. 184. ait χρόμνον ἀσσησῆναι, id est, *capam stomacho fastidium asserre*, seu *nauseosam*

nauseosam esse. Et Galenus eodem utitur 1. ad *Glauc. cap. 15.* ut cibi fastidium exprimat. Cæterum anxietatis, ex oris ventriculi affectu ortæ, mentionem facit Gal. 1. *prorrh. sect. 2. com. 44.* Fit igitur, quando os ventris à pravis mordetur humoribus, qui tamen non multi sint, neque in ventriculi spatio innatantes, sed in eius tunicis immerfi. Facile cognoscitur hæc anxietas; quia nauseam habet adiunctam, nauseam (inquam) ἀνυμίτως, id est, sine vomitu; nam qui sic anxiantur, ut Gal. notat, nauseabundi sunt. Contingit ista aliquando in longa ἀσιλίᾳ, inedia, propter quam ventriculus pravis ichoribus repletur: Sed hæc etiam citra febrem adest, ut illa quam diximus fieri propter ingestum intempestivè cibum. Ad hanc referri potest anxietas, quæ, ut narrat Hippocrates 7. *Epid.* Pausaniæ filiam ex fungi esu tenebat.

Itaque corpus ἀσώμῳρον, anxium redditur, vel præ nausea, & satietate, ut diximus, quæ præsentī negotio vix inseruit: siquidem vel sanis accidit, vel febrium est magis ἐμφανόμῳρον, mox apparens, quàm ὑπὸ μῳρον, superveniens:

ueniens : quia scilicet qui ventriculo scatente febricitat, & febrem, & anxietatem simul initio habet.

Vel præ caumate, non illo quidem, quod in paroxysmorū febrilium augmento, vigoréve fit : nam anxietas inde orta statim vomitu, aut deiectione quiescit, sed eo quod stabile est, & ebullitionem in vena caua, & arteria lumbari consequitur. Hæc anxietas nonnunquam mox apparens est, nonnunquam autem auctæ feбри superueniens.

Vel præ malignitate. Malignitatis etiam nomine ὀργασμὸν, id est, *turgentiam* comprehendo : quippe malignum est quod turgent, turgens autem materia, & irrequietè fluctuans, non finit ægrum quietum manere. Maligna cor obsidet, corde autem vitæ fonte pessimos insultūs patiente, totum animal commouetur, & tum animo, tum corpore anxiatur.

Vel præ debilitate : quippe ob virium debilitatem (inquit Galenus 1. prorrh. sect. 2. com. 44.) *virtus à corpore grauat, nullamque figuram facile sustinet*; sic affecti perniciosè afficiuntur. *lis-*
dem

dem ferè verbis D. Paul. *epist. 2. ad Corinth. cap. 1.* sic ait : *Non enim volumus ignorare vos, fratres, de tribulatione nostra, quæ facta est in Asia, quoniam supra modum grauati sumus supra virtutem, ita vt taderet nos etiam viuere.*

Omnes istæ anxietates, illam quæ ex ventriculi noxa fit, malitia superant. Id significauit Hippocrates 1. *prorrh.* damnans anxietates *citra vomitum* ; adde tu, & *citra nauſeam*, vt eum significes, qui citra ventriculi vitium, nempe vel ob cauma, vel ob orgasinum, vel ob malignitatem, vel ob imbecillitatem angitur.

C A P. XXII.

Febris lassitudinaria, seu πυρελὸς κοπώδης.

Est κόπωση, id est, *lassitudo* quædam, quæ dicitur ἀπλως, id est, *vulgaris*, seu *manifesta*, vtpote quæ à manifestis & vulgo notis oritur causis : nempe ab immodicis laboribus, & exercitiis. Hæc febres ardentes inducit : quippe ex valida agitatione ichores intra venas

nas consistentes incéduntur, & igneas particulas cordi communicant, vnde rursus in vniuersum corpus flamma diffunditur. Curatio istarum febrium valida refrigerantia expostulat. Est alia, quæ κίπ & αὐτόμαλ, id est, *lassitudo spontanea* dicitur, quia nempe non habet manifestam siue externam causam : quamuis enim vt illa ex negotio fit, sic ista ex otio, nihilominus negotium est causa proxima incendij, (nam inter causas aucti caloris reponitur motus) otium verò non est proxima causa, sed ex eo retinentur excrementa, aut augetur sanguis, & ex retentione excrementorum cacoehymia, ex sanguine aucto plethora gignitur : ad vtrumque si defluxus in membra sequatur, corporis fit, omniumque artuum conquassatorum molestia, ita vt nec quiescere quidem æger, sine fatigationis sensu, possit ; nec moueri sine dolore. Itaque lassitudo ἀπλῶς, quæ ex præcedente labore fit, febres ardentes antecedit, quarum causa est labor immodicus. Sic contigit Sileno, quem ex lassitudinibus, potationibus, & exercitationibus intempestiuis, ignis corripuit,

puit, 1. epid. sect. 3. agr. 2.

Lassitudo αὐτόμαλθ, quæ sponte accidere videtur, potest futuri morbi signum esse, unde Hippocrati 4 aph. 44. lassitudines spontanea morbos præ-
nuntiant. Potest etiam symptoma esse epigenomenon; si enim augescente febre sanguis liquatus, artus occupet, tunc sensatio erit τὸν ὥδης, id est, *tensiva*; si ingravescens cacochymia diffluet, ἐλκῶδης, id est, *ulcerosa*; si verò ytraque causa adsit, φλεγμονῶδης, id est, *phlegmonodes seu inflammatoria*. Itaque humorum πλῆθος καὶ ποικιλία, id est, *multitudo, & motus*, cum incrementum accipiunt, adeo ut plus nimio molestant, febris evadit κοπῶδης, id est, *lassitudinaria*, quam epigenomieë fieri dicam infra; cum de abscessibus loquar.

C A P. XXIII.

Febris sudorifica, seu πυρελὸς τυφώδης, καὶ ἐλκῶδης, καὶ ἰδρῶδης.

R Etinet apud auctores Latinos Græcum nomen febris illa, quæ continuis sudoribus stipatur, & appel-
latur

latur *typhodes* : sic dicta , quoniam sudantibus è toto corpore, simul cum sudore halitus siue fumus eleuatur: quippe fumus Græcè dicitur τυφός, & verbum τυφώω, fumum excito. Dicitur etiam ἐλκυστικός, id est, *palustris* : sudans enim quasi in palude immerfus videtur. A recentioribus ἰδρωδής appellatur, à verbo ἰδρώω, quod est *sudo*, & ἰδρῶς, id est, *sudor*. Porro tribus modis sudor exit: *excretionem, expressionem, & partium solidarum exolutionem* : siquidem succum, quo nutriri debent, assimilare non possunt, eúmque sinunt effluere. Hic ultimus, omnium est pessimus, neque confertim fit, potiúsque sudatiuncula appellatur, quàm sudor, & cum viriæ imbecillitate, lethalis est. Frigidus præsentem syncopen, calidus paulo pòst futuram indicat. Porro de isto sudore, qui propter partium colliquationem fit, loqui videtur autor *prorrhetic. lib. 1. sect. 3. text. 34.* dum ait : *Ex naribus exiguo cum sudore perfrigescentia, maligna, prænāque, id est, à profluvio sanguinis è naribus, paucus sudor cum refrigeratione, malum.* Cùm enim copioso sanguinis profluvio omnis humor eua-

cuetur,

cuerur, si insuper adest sudor, non fit ab humore, sed à partium solidarum effluxu, per resolutionem propriæ substantiæ, & alimentarij succi, qui deductus discutitur, vt Galenus ait in *prognostico*; & hic est sudor, qui diaphoreticus dici solet.

Expressione educitur sudor, vel in magnis doloribus, vel in angoribus, cum scilicet spiritus intus agitati incallescunt, rursusque ad cutim transmittuntur, & iuxta ipsam condensantur. Hæc agitatio, & transmissio adeò efficax esse potest, vt sanguineum sudorem moueat: sudorem autem sanguineum, exeuntem per diapedesin, possibilem esse, affirmat Aristoteles *lib. 3. de hist. anim. c. 19. & 3. de part. animal. cap. 5.* Assentitur Theophrastus in *libro de sudoribus*, ex sententia Monæ Medici. Hoc autem vt contingat, duo etiam contingere necessarium est, vnum, vt sanguis sit aquosus, ob cruditatem, quod *3. de hist. animal.* dixit Arist. alterum ex eodem *3. de partibus animal.* insignis pororum laxitas. Vtrumque Rhodiginus *lib. 5. cap. 2.* considerauit, nempe nimiam sanguinis aquositatem,

ob caloris debilitatem, à quo decoqui condensarique debuit, & meatuum corporis laxitatem. Autor verò *libri de utilitate respirationis*, ad eandem meatuum dilatationem, à multo fetuidoque spiritu factam, sanguinem fluere posse ait, sed reuerà non sanguinem, sed sanguineum ichorem exire, dicendum censeo. Cardanus *de natura hominis*, sudorem sanguineum tum fieri posse admittit, cum præ molestia animi, tenuis sanguis igneo calore extenuatus, exprimitur. Potest quidem anxietudine sanguis ad interna reuocari, reuocatus incallescere, caliditate attenuari, & ad externa detrudi. Dixi autem sanguineum sudorem, non sudorem sanguinis, tum quia sanguis ob suam crassitiem non habet transitum per meatus; tum etiam quia à natura tanquam thesaurus retinetur. Porro cum huiusmodi sudor tum ex parte materiæ, quæ excluditur, tum ex parte constitutionis corporis, præternaturalem statum arguat, meritò in Christo Domino à Sanctis patribus, & Concilio Tridentino, supernaturali causæ attribuitur. Nam temperatissimum
eius

eius corpus, & ab omni causa morbifica prorsus alienum, non potuit hoc excreto, quod toto genere præter naturam erat, infestari, nisi maior vis eum mouisset. Dico, toto genere præter naturam: quia sanguinis fuit sudor adeò copiosus, ut guttæ illius in terram caderent.

Excretionem sudores possunt esse optimi, vel saltem boni, iuxta conditiones, quas scripsit Hippocrates 3. progn. 26. sudores optimi sunt per omnes morbos acutos, si per diem decretorium eueniant, & integrè sedent febrem. Boni etiam sunt, si ex toto corpore prodeant, faciuntque ut agri faciliùs ferant morbum. Verùm hos proficui sudoris gradûs exactè in nostra syntaxi prædictionum medicarum percurramus, præsens locus non plura in hanc rem exposulat.

C A P. XXIV.

Febris pemphigodes, seu πυρετός πεμφιγώδης.

HÆc etiam febris nomen Græcum apud Latinos retinet, & appellatur

pellatur pemphigodes, quasi bullosa. Autor definitionum medicarum: Pemphigodes, inquit, febris est, quæ per caloris intensiorem pustulas in ore, quæ Græcis phlyctides dicuntur, generat. Cæterum cum Hippocrates 6. epid. sect. 1. text. 29. diuisionem febrium in hunc modum constituat: *alia arida, alia salsuginosa, alia pemphigodes, aspectu terribiles, alia tactui humecta.* Memini me in meo de *Meteoris Microcosmi* lib. 3. c. 10. ita hanc diuisionem accepisse, ut pemphigodes dicerem ephemeræ, nempe quia attenuatione spirituum, qui in ephemeris excalescunt, corpus quodammodo inflatur: dicuntur enim pemphigodes, hoc est, inflatæ & tumidæ: & hanc interpretationem duobus neotericis, Ioanni Brauo, & Christophoro à Vega acceptam refero. Vallesius pemphigodes, id est, ampullosas febres vocat, quæ cum ampullis eueniunt, quales sunt febres variolarum. Porro pemphigodes Galenus 6. epid. citato existimat esse febres pestilentes cum tuberculis, ut in pestilentia quæ tempore Thucydidis fuit peruagata. Constat hoc, eiusdem Thucydidis testimonio, dicentis, *exte-*
rius

rius quidem tangenti, corpus neque valde calidum erat, neque viride, sed subrubrum, lividum, tuberculis exiguis & ulceribus efflorescens. An verò hæc sit febris, quam recentiores purpuram dicunt, habes inferius *lib. 3. cap. 19.*

Hæc autem omnia, quæ dicta remanent, non varias constituunt febrium species, aut differentias, sed vnam & eandem specie febrem variis induunt superuenientibus symptomatibus. Nam alias si varias febres multiplicarem, in Gnidiæ scholæ errorem inciderem, quem Hippocrates *in iussu operis de victu acutorum* in hunc modum reprehendit. *At numeros morborum singulorum planè declarare studentes, non rectè scripserunt. Neque enim quis facile numeret, si quis ex eo agrotantium morbum aestimet, quòd ab altero re quadam differat, neque eundem esse morbum reputet, nisi eodem nomine nuncupetur.*

CAPUT XXV.

Hydropis epigenomena.

INfinitum propemodum esset, omnia
 morborum epigenomena percurrere;
 omnia rursus omittere nimis esset in-
 curiosum: propterea ad ea, quæ in fe-
 bribus consideravi, aliqua adiungam,
 quæ in hydrope considerationem me-
 rentur; quippe ex huiusmodi exem-
 plis non parum utilis acquiritur doctri-
 na. Porro inter hydropis epigenome-
 na, præcipuum statuo *sitim*, quæ in hoc
 morbo iam aucto ægrum solet vexare.
 Hanc duas arbitror habere causas, una
 est aquei humoris abundantis, & per-
 moram adustionem patientis salsedo,
 non aliter ac in mari: est enim hydro-
 picorum venter, abyssus multâ aquâ
 redundans; ubi calor putrefaciens, &
 adurens exhalationes attollit, propter
 quas & in stomacho sitis, & in ore tum
 siccitas, tum amaritudo percipitur. Al-
 tera omnimoda exsiccatio, & ariditas,
 quæ hydropicis accidit, consumptis
 omnino carnibus, & humido primige-
 nio,

nio , & corpore atrophica laborante.

Alterum est *tussis*, & hæc potest esse symptoma , aliquando epiphænomenon, hoc est, mox apparens, aliquando superueniens , seu epigenomenon. Et hoc ab Hippocrate possumus addiscere : nam quando 2. *progn.* 3. ait , tusses fieri in hydropicis , statim adiungit à *iecore* , significans tussim in his , qui à iecore hydropem patiuntur , duntaxat esse signum mox apparens ; quemadmodum mox apparens est eadem tussis in iecoris inflammatione. Nam Galenus 5. *loc. affect.* cap. 7. inter signa inflammati iecoris tussim reponit : & idem cum inuisit Siculum Medicum, quem cognouit iecoris inflammatione laborare , nihil narranti dixit tussim eum vexare ex interuallis, exiguam, aridam, & quâ nihil spuebat. Sed cur iecore inflammato adest tussis ? nempe quia in hac inflammatione, propter auctam iecoris molem, fit diaphragmatis compressio , ac notharum costarum compressio, tussisque excitatur eo modo, quo excitari solet per affectus patium respirationi inseruientium ; nihil tamen notatu dignum expuitur, quoniam

niam causa comprimens est extra thoracem, & pulmonem. Dices forsan, non in omni hepatis inflammatione tussim contingere: nam ea quæ in parte sinistra iecoris fit, non communicatur membris respirationi seruientibus, quibus adiacet gibba pars, ut sinistra ventriculo, & intestinis. Hanc dubitationem tibi soluit Galenus: quippe magis quidem tussim excitabunt inflammationes gibbæ, quàm sinistræ, cæterum in utraque tussis aderit, cum totius iecoris partes inter se continuentur, & affectus unius in altera sentiatur. Hæc igitur tussis in hydrope, quæ est symptoma mox adueniens, neque mala est, neque bona.

Verum si tussim hydropis, quæ epigenomenon symptoma est, consideres, hanc pravam esse dixit Hippocrates 6. aph. 31. *Aquâ intercurrentem laborantibus, tussis superveniens, malum.* Vbi Galenus: *supervenire passionibus alias passionibus. Et casus, præsci Medici dicere consueverunt, quæcumque ipsius passionis adauctæ ratione contingere solent.* Itaque tussis adauctum hydropem significat: contingit namque, quando iam aquosa humiditas asperas occupat arterias, quo
tempore

tempore non longè abest suffocatio. Vnde 7. *aph.* 47. *Aquâ intercutem laborans, si à tussi habeatur, desperatus est.*

Ob eandem etiam augmenti rationem, hydropici difficultate respirationis premuntur, coarctato scilicet, ut Galenus ait, *de utilit. respir. cap. 4. & de diffic. respir. lib. 1. cap. 11.* septo transverso, quando tumor ventris aded increvit, ut septum transversum opprimat, vel etiam, quoniam aqua in respirationis membra redundans, spatiumque thoracis occupans, non finit respirationis officio instrumenta respiratoria liberè fungi.

Inter hydropis epigenomena recensetur etiam epilepsia, recensetur & alui fluxus, quod in *Coacis* reperies. De alui fluxu nihil dicam, nam per epigenesin factus, extremæ debilitatis est tum soboles, tum parens, & velut phthisicis in extremis laborantibus, ita hydropicis iam sub finem mali, alui fluor, & signum, & causa est appropinquantis interitus; licet si non sit per epigenesin, possit aliquando, effusâ per aluum aquâ, sanationis causa esse,

quod Hippocrates non sinit in *Coacis*,
& in *aphorismis*, 6. *aph.* 19. & 7. *aph.* 15.

Epilepsia etiam flatuosam materiam per dorsum in cerebrum irruentem demonstrat, præcipue in anasarca, in aliis vero hydropis speciebus, magis est vaporum mordacium & putrida materia exhalantium signum: hos vapores ut expellat cerebrum, concutitur, & epilepticos crebro excitat insultus, quo nil deterius homini languore virum laboranti accidere potest. Porro epilepsia ista est epigenesis non solum causæ hydropem facientis, sed ipsius hydropis. Causa propagatur in epilepsia, uti quando sanguis retinetur in mulieribus, quibus menstrua cessant, & in omnibus qui hæmorrhoidas habuerunt, & non amplius habent: tunc enim sanguis iste refluens non solum recurrit ad secus, & hydropem inducit, sed propagatur ad caput, & excitat epilepsiam. Hydrops propagatur, aucto tum intemperamento frigido, tum aquosâ, flatulentia, pituitosave materia, cuius augmentum capiti accedens noxam infert.

Aliud epigenomenon hydropis est,
urina

vrinæ paucitas, quæ in omni hydropis specie damnatur, tam generali quadam ratione, quàm unicuique peculiari. Generalis ratio est, quia semper stranguria est malum; homini verò grauitè ex graui affectu laboranti longè deterius. Singulares rationes unicuique speciei accommodantur. In ascite minuitur vrina, transeunte sero in abdomen: quòd si ita auctum iam sit malum, vt vix suppetat serum, quod per vrinam deducatur, deficit ferè vrina, & stillatim fluens perterret ægrotantem & Medicum. In anasarea serum simul cum multa pituita sanguini se insinuans, in venis stabulatur, & vias urinarias deferit, tantò autem magis deferit, quantò magis malum pergit in perniciem. In tympanite grauius vrina sistitur: quippe nec serositas in abdomen, nec in venas abit, sed vel dolor, qui grauissimus in tympanite esse solet, impedit meiendi actionem, vel flatulenta materia meatûs obturans transitum ad urinarias vias occupat. Similiter si hydropico febrienti pauca illa, quam mingit, vrina, sit veluti subingalium, quid nisi putredinem, & ebullitio

ebullitionem, & malum in venosum genus propagatum potest significare: sin rubra, imbecillam prorsus sequestrantem facultatem in renibus esse arguit; sin versicolor, ita vt suprâ rubeat, infrâ liuescat, aut nigrescat, ostendit variam materiæ naturam, bilis adustionem, & partium *εἰσρροήν*, mortificationem.



STEPHANI



STEPHANI
 RODERICI
 CASTRENSIS
 LVSITANI,
 QVÆ EX QVIBVS.
 LIBER SECVNDVS.

CAPVT I.

Varia metaptoſeos ſpecies.



B epigenesi ad metaptoſin libet ſermonem mutare. Metaptoſeos plures ſunt differentiæ, pro varietate cauſarum, quarum

plurimas nunc percurrant.

Prima, ſit vno eodẽmque humore varias ſubeunte conditiones; vt ſi ſanguis

guis in cerebri vasis modò excafactus
splendescat, & desipientias cum risu
concitet, modò vltiore adustione
obscuretur, ac nigrescat, ex quo metus,
& mæror accidunt. Iccircò, *Dealcis*
uxor plorabat, & rursus ridebat, 3. epid.
sect. 3. agr. 15.

Altera, diuersis humoribus vnum,
eundémq; locum occupantibus. Non-
ne si in cerebro pituita adsit, cuius
narcotica vis somnos conciliat, adsit
& bilis, cuius aculeus vigilare facit,
oritur affectus ex somno, & vigilia
compositus, quem propterea coma vi-
gil appellant Medici? Aut si vterque
humor putrescat, sit *τυφομανία*, *typho-*
mania, nempe lethargus & phrenesis
simul? Similiter ex Galeni relatu i.
prorrhæ. sect. 1. com. 27. *Audacissimi in-*
terdum tempore aliquo visi desipientes,
post timidi, & perterriti videntur: nem-
pe *audacissimi*, propter aliquod biliosi
humoris prædominium in corde, quod
huic visceri calorem auget, quippe
in *arte medica*, cap. 29. calidi cordis
signum est audacia. Dixi aliquod prædo-
minium: nam multum, magis furorem,
quàm audaciam parturire potest. Red-
duntur

duntur postea *timidi*, & *perterriti*, ob frigidum humoris in eodem viscere, nimirum in corde, praesentiam: obstat namque audacia, quoties *Frigidus obstitit circum praecordia sanguis*. Iam ergo liquet, diuersis humoribus in eodem loco vicissim dominantibus, fieri metaprosin.

Tertia, diuersis humoribus in diuersis locis, modò vno, modò alio praua-
lente. Vt in praenominata *Dealcis uxore sermones multi*, & *rursus quiescebat muta*: utrumque ex delirio, sed *loquacitas*; ob vapores sanguinis titillantes leniter in faucibus; *taciturnitas*, ob vapores melancholicos mentis sedem obscurantes: neque enim erat aphona, ut posset eius silentium ad loquendi impotentiam referri: nam statim postea loquebatur liberè & sine noxa.

Quarta, ex causarum intensione, & remissione. Ex remissione accidit, ut delirus nonnunquam siti non prematur: quia scilicet non est valde magna. Ex intensione, nam si eadem sitis in eodem augeatur, quantumvis delirus sit, potum appetit, & ingens poculum exhaurit. Idem etiam de mictione: Etc-
nim

nim pauca vrina non affert mingendi cupiditatem, multa vrget, & reuocat in memoriam mingendi opus. Sic etiam phlogosis duntaxat, in cerebro efficit simplex delirium; si verò intendatur, vt ex phlogosi phlegmone fiat, iam erit phrenesis. Rursus si ventriculi frigiditas magna sit, stupore illius partis oborto, inappetentia efficitur; si parua, corrugans oris ventriculi tunicas, appetentiam auget.

Quinta, ex facultatis in aliquo membro extinctione, vt sitis *ἄλογος*, nempe si æger mente constet, & calor, linguæque ariditas sitibundum esse proclament, ille tamen qui prius siti cruciabatur, manente eadem ariditate, cum calore, non ampliùs siciat, mutatio est praua: propterea dictum arbitror 1. *prorb. sect. 2. text. 22. sius qua non ex ratione in acutis morbis soluitur, mala est.* Soluitur etiam appetentia, quando extincta est in ore ventriculi, quasi sphacelato, appetendi facultas, & inappetentia tanta est, vt dicat Gal. *plurimi verò mori, quàm comedere quicquam, prius duxerunt.*

Sexta est ob malignitatem, cui Galenus

lenus tribuit celerem in vtramque partem mutationem: inquit enim 1. *prorrh. sect. 2. com. 8.* In summè malignis permutatio istorum (nempe caloris , & frigoris) horâ vnâ ad contraria efficitur, interdum quidem, ut tanquam hyeme frigescent, interdum verò tanquam æstate calefcent. Atque malignitati tribuit quod Hippocrates dixit, *summa corporis partes si celeriter in vtramque conditionem permutentur, malum.*

Septima, ob irrequietam humoris conditionem, cum suapte naturâ habet orgasmum, & à Medicis materia turgens appellatur, quæ stare loco nescit, sed nunc ad partem vertitur, in qua nos perterret, nunc ad aliam, in qua nos consolatur.

Octaua, quando causa licet non sit suapte naturâ turgens, tamen est adhuc instabilis, sed paulo post firmabitur, & hinc oritur metaptosis, vnde Galenus 1. *prorrh. sect. 2. com. 17.* cum affectio sit, & nondum facta est, breuiter separatâ efficiente ipsam causâ sedatur.

Nona, propter naturæ conatum, & contentionem, quâ materia morbum faciens si non expellitur, ac saltem à quibusdam

quibusdam partibus recedere cogitur, ad quas, propter naturæ impotentiam, denuò reuertens interimit. Et hæc est vna ex causis, cur multoties moribundi videantur meliùs habere, sed intra paucas horas gaudium conuertitur in mœrorem.

C A P. II.

De metastasi.

INter has métaptoseos species, tres ultimæ, nempe, propter materiæ orgasmum, propter causam nondum firmatam, propter naturæ conatum, species infimæ sunt, & continentur sub vna subalterna, quæ *μετάστασις*, *metastasis*, hoc est, *humoris transmissio* appellatur. Hæc autem non solùm per vias manifestas, sed per occultas etiam fit. Nam præter vias unicuique cognitæ, per quas, quicquid fluxibile in corpore est, fertur, sunt aliæ incognitæ, quatum nos contemplatio in admirationem deducit. Porro metastasis vel à natura fit, vel à morbo, seu meliùs à causâ morbi, vel ab utroque: & sic comprehendimus

hendimus omnes tres metastaseos species initio adductas. Nam quæ fit propter materiæ orgasmum, fit à sola causa morbi; quæ verò propter naturæ conatum, à natura; quæ ob instabilitatem materiæ, ab utroque: neque enim sufficeret instabilitas humoris, nisi illum natura detruderet; neque ita facile à natura detruderetur, nisi instabilis esset.

C A P. I I I.

De viis occultis.

CUm metastasin per vias incognitas fieri audis, intelligito incognita nobis, naturæ verò, quæ licet cognitione non utatur, dirigitur tamen à cognoscente, cognitas. Unde Hippocrates 6. epid. sect. 5. text. 2. Adinvenit, inquit, natura sibi ipsi accessus, non cogitatione, partim quidem ut conuincere, partim vero & lingua subministrat, & id genus alia quæque. Inerudita natura, & indocta, quæ opus sunt, efficit. Galenus accessus exponit vias, aut impetus ad agendum, ut scilicet natura cum ex signis sine

sine consilio, vel indocta, in eas actiones feratur, quibus exequendis accommodata habet instrumenta. Hoc argumentum latissimè prosequitur, 1. de usu part. cap. 3. & eiusdem operis lib. 15. cap. 7. & 6. de loc. affect. cap. 6. Cæterùm Hippocrates, apud quem prius φύσις φύσις ἰστέοι, *natura morborum medicatrix* dicitur, adiungit paulo post, ἀνεύρεσθαι ἢ φύσις αὐτῇ τὰς ἰσόδους, *adiuenit natura sibiipsi accessus, nempe vias.* Quapropter non solum loqui videtur de admirandis actionibus, sed de viis etiam per quas natura ista *medicatrix* metastasi humorum efficiens, morbis medetur. Constat hoc, quia utriusque rei exemplis utitur. Etenim palpebrarum motus, linguæ in proferendis vocabulis agilitas, ad actiones pertinent, quas φύσις πάντων, vel φύσις ζώων ἀσίδακτοι, *natura omnium, seu naturæ animalium, sine doctore* edunt. Quis enim docuit puerum recens natum nitare? quis clamare? & postea, cum loqui incipit, verba proferre tanto mouentis se linguæ artificio, ut si in vnaquaque litera proferenda, quid præstandum sit, ab alio addisceret, vix totum

tum vitæ tempus huic operi sufficeret. Atque hæc de actionibus, de quibus pro coronide adiungit, ἀπαιδεύθη ἢ φύσιν ἰσῆα, ἢ ἢ μαθησῆα ἰδὲ δέοντα ποιῆαι, *inrudita natura, & sine doctore, qua conveniunt, facit.*

Alia verò exempla spectant ad vias, per quas diximus fieri metastasin, ut sunt *lachryma, narium humor, sternutamenta, auris sordes, oris salina reiectio, spiritus introitus, exitus, oscitatio, tussis, singultus.* Adde alias occultiores. Nam melsaraica vasa, ad intestinorum cavitatem non dehiscunt, sed per latera sugendo, puriorem chyli partem trahunt. A dextro ad sinistrum cordis ventriculum cæcis ductibus sanguis permeat. Urina quoque per solidorum renum carnem excolatur. Sanguis à porta ad cavam per hepar. Animalis spiritus per cerebri substantiam. Semen per testium molem. Menstruus sanguis ad vbera conscendit, non vasorum ductu, sed per interstitia, transcolatione partium. Ossa aluntur, & membra maximè ex parte, per insensiles meatûs nutrimentum alliciunt. Nullus tamen viarum ductus maiore admiratione est dignus

dignus, quàm ille, quo potentia generatrix, potius formatrix, similitudinem quandam & vestigium parentum ad testes & vasa seminaria deducit, de quo nunc non est agendi locus.

CAP. IV.

De transfusione.

INter vias occultas recensendæ sunt hæc, quas *μεταξώπου* transfusio suscipit. Eius autem quæ inter arterias, & venas fit, meminit Galenus libell. de plenitud. cap. 11. quàm tamen crassis, & glutinosis humoribus intra venas collectis, non facilem esse ait: at etiam ex istis partem aliquam calore attenuatam transfluere, est consentaneum. Connexionis præterea nervorum cum venis, arteriisque magnam vim esse profitetur, 2. caus. puls. cap. 12. pulsuum namque quos convulsorios appellat, causam reddens, inquit; *Singulis arteriis fibræ à nervis deductæ, in societatem veniunt, per quas se sinunt mutuo in consensum venire, non modo actionum, sed affectionum etiam.* Multis aliis in locis eandem

eandem connexionem admittit, ut
conspirationem omnium ab Hippo-
crate, in *libello de alimento*, decantatam,
ad eam referat, quam melius ad vnus
animæ ministerium referret. Illum ali-
quis excusaret, quia animæ unitatem,
quod scilicet tota sit in toto, & tota
in qualibet parte, non agnouerit. Ita
est, agnouit tamen temperamentum
totius, quod animam esse existimauit;
temperamentum autem, & calidum
innatum, & natura apud eum, immò &
apud Hippocratem, vna eadēque res
sunt: Nam 2. *aph.* 32. ex multis naturæ
significatis accipit illud, quo Hippo-
crates multis in locis vsus est, & in
toto *libro de natura hominis*, in quo eam
quæ ex primis elementis fit, tempe-
raturam, naturam nominat: quam
etiam calorem naturalem frequenter
appellat, ut *lib. de marasmo*, cap. 3. *de*
trem. rigor. & *palpit.* cap. 6. *lib. 4. aphor.*
37. & eiusdem operis *lib. 5. aph.* 22. Igitur
cū temperamentum, siue calidum
innatum, siue natura, vices animæ ge-
rat, ut pro anima, ab iis qui animæ
substantiam ignorant, habeatur, cū-
que per vniversum corpus indiuisum
escribitur

dispergatur, ei potius quàm membro-
rum connexioni, omnium conspiratio
tribuenda est. Iuxta hoc totius tempe-
ramentum, dictum arbitror ab Hippo-
crate in *lib. de locis in homine*: Corpus
porro ipsum sibiipsum idem, ac simile est, &
ex iisdem compositum est.

Cæterùm membrorum colligantiam
constanter agnouit Galenus, nec est
cur à Bartholomæo Eustachio reus
contradictionis apud iudices constitua-
tur, quòd *lib. 1. de placit. cap. 6. & cap. 7.*
aliter sentire videatur, dum Aristote-
lem, & Praxagoram refellit, qui vaso-
rum mixtionem statuebant. Non me-
ruit quidē istam accusationem, in qua
neotericus iste, non intellecta tanti
auctoris mente, magnas turbas excita-
uit. Existimabant tum Aristoteles, tum
Praxagoras nervos arteriis esse conti-
nuos, hoc est, nervos esse arterias factas
exiles, cùm ad eam angustiam peruene-
rint, ut tunicis inter se coëuntibus ca-
uitatem amittant, & proinde in ner-
vum euadant, quod Galenus reprehен-
dit; sed hoc quid commune habet
cum textura facta ex omnibus va-
sis, quam libens admittit? Meliori iure
Andreas

Andreas Laurent. (vt obiter dicam)
lib.4. quest.8. reprehendit Reusnerum,
 qui *exercitatione prima*, existimat ner-
 uum nihil aliud esse, quàm extrema-
 tem aortæ, quæ quatenus in caput as-
 cendit, in cerebro naturam nervi in-
 duit : vnde nervi, cerebri propagines
 dicuntur ; quatenus verò ad crura, &
 articulos corporis dispergitur, suis aliis
 propaginibus, pelliculas ossium, ten-
 dones, & ligamenta constituit, quæ
 omnia nervosæ substantiæ deprehē-
 duntur.

Forſitan aliquis considerans com-
 mutationes affectuum ab arteriis in
 venas, à venis in nervos, & vicissim à
 nervis in venas, & arterias, arbitrabitur
 hæc non posse fieri, nisi verà sit Aristo-
 telis, & Praxagoræ opinio : verumta-
 men vt hæc accidant, non necesse est
 vt nervus cum venis, & arteriis sit vna,
 & eadem res penitus continua, sed suf-
 ficit contiguam esse.

CAP. V.

De affectuum transpositione à venis ad arterias, ab arteriis ad venas.

Quoniam transfusionem humorum, halituum, spirituumque possibilem esse constat, possibile quoque sit oportet, ut affectus etiam, qui ex his fiunt, transponantur. In primis venæ arteriis communicant plethoram, dicente Galeno *lib. de plenitud. cap. 11. Plurimum vena cum arteriis, ob eorum vasorum mutuam confluentiam, quam sæpe alibi ostendimus, plethorâ simul arripiuntur.* Communicant etiam putridos vapores: quare in bubonibus, & inflammationibus, arteriæ à venis putridos accipiunt vapores, quos cordi offerunt; ideo ex bubonibus febres oritur, male.

Arteriæ venis vices rependunt: Nonne si per arteriarum cauitates conspurcati ferantur spiritus, his venalis etiam sanguis conspurcatur? qui si veneni naturam sapiant, sanguinem liuescere

liuescere faciunt, & ex sanguine in corpore apparent liuores. Calefacto præterea sanguine arteriali, (calefit enim priùs) calor ad venas extenditur; vnde phlegmonæ oriuntur.

C A P. VI.

Ex arteriis, & venis ad nervos, & ex nervis ad arterias ac venas, affectus transfertur.

VEnatum quoque arteriarumque transfluxum ad nervos, & nervorum ad arterias, & venas, agnoscit Galenus 6. apb. 26. his verbis: *Sicuti igitur in febre ardente translatio, sic in omni aliâ febre potest fieri, & omnino ex arteriis, & venis ad nervos transfluxus humorum, sicut rursus ex nervis ad has.* Et quidem ex arteriis, & venis fit transfluxio; Hippocratis decreto in eodem aphorismo: *Quibus in febribus ardentibus tremores fiunt; delirio solvuntur.* Febrium namque causa in venoso, arteriosoque genere existens, quando ad nervos transfertur, primùm tremores facit; compatiante verò principio,

etiam deliria. An propter istam metastasin febres solvantur, & quæ sit huius aphorismi veritas, inferius *cap. 9.* innotescet.

Itē ex venis, & arteriis metastasis fit ad nervos, per convulsionem: licet eadem convulsio, si aliquas habeat condiciones, per metastasin facta iudicetur, & febrem soluat. Sententia hæc est: *Convulsio in febre mota, febrem solvit eadem die, vel alterâ, vel certè tertiâ. Quod si tempus transgrediatur, quo ab initio tenebat, nec acquiescat, malum.* Nempe primis diebus eueniens, non ab inanitione, sed à repletionem fit, transfusâ materiâ febrili à venis ad nervos; & postea, convulsivæ motionis vi, à nervis expulsa. Quod si hæc expulsio non sequatur, sed convulsivi motus perseverent, malum est: quippe fixa materia, nec excussa, doloribus, & vitalium actionum interceptione, miserum ægotantem fatigat.

Verum si contingat, ut vel ex repletionem, aut morbo, convulsio fiat, etiam post tertium febris diem, semper erit utilis, dummodò non perseveret; nam semper potest materiam transmutare, & febrem

& febrem soluere. Hoc in variolis , & morbillis , & interdum ante sudorem obseruatur: nam subfilire videtur æger, & vel in ipsa exanthematum apparitione , vel paulo antè , conuulsiones conspiciuntur, siue sit in principio, siue postea in diebus criticis, septimo, nono, & sequentibus.

Ex nervis ad venas transmissio fit, quoties conuulsio, accedente menstruorum euacuatione , sanatur , vt *mulieri morosa* contigit, 3. *epid. sect. 3. agrot. 11*. Eadem ratione conuulsiones non solum diarrhoea , sed perirrhoea etiam sanat. Diarrhoea quidem , transmissâ materiâ à nervis, non ad venas , sed ad aluum & intestina , per vias naturæ cognitæ. Perirrhoea , confluxu vrinæ crassæ, albæ, mucosæ, à nervis ad venas, à venis ad vrinarios meatus. Sic *Pythion* 3. *epid. sect. 1. agrot. 1*. tremiscens, per vrinarum euacuationem , euasit: Vnde in *Coacis* : *Conuulsiones copioso mictu vrinarum crassarum albicantium, sanantur*. Neque verò incredibilis est metastasis à nervis ad vasa , quando etiam ab ossibus facta conspicitur, vt Hippocrates est testis, 2. *epid. sect. 1*.

C A P. VII.

Res præter naturam, tam intra nos genitas, quàm forinsecus aduenientes, occulto quodam impulsu certa loca petere.

VEnena, quæ nobis innascuntur, (vt Galenus 3. de loc. affect. cap. 7. & 6. eiusdem oper. cap. 5. & experientia satis testantur) in locis, in quibus fuerunt genita, quasi connaturalia illis, nihil nocent: postea, si quauis occasione agitentur, vel eor petunt, & occidunt; vel cerebrum, & epilepticos insultus excitant. Vidi iuuenem subito mortuum, cui statim post obitum, extrà in regione cordis, syderatio, seu liquor ingentis latitudinis apparuit, intus (vt per *ἀπορροή* videre licuit,) nihil mali fuit repertum. Hoc quid aliud fuit, quàm venenata quædam aura per longum tempus delitescens, quæ tunc demum vel syderum influxu, vel quauis alteratione, quasi è somno suscitata, nullum sui vestigium in parte in qua fuit orta, & conseruata relinquens, proprio,

proprio, sed occulto impetu, cor vitæ fontem, cum quo venæna inimicitias gerunt, est aggressa? Sed non solum cor, verum & cerebrum huiusmodi hostilibus incursionibus est obnoxium. In memoriam reuoca historias à Galeno narratas 3. *loc. affect. cap. 7.* duorum adolescentium, quibus aura ad caput ascendebat, quam sentiebant *ex tibia initium capere: mox illinc rectè ascendere per femur, & superposita illi ilia, ac per latera ad cervicem, donec ad caput perueniret, quod cum primum tangeret, ipsi haudquaquam sibi constabant.* Esse autem, ex Pelopis sententia, poterat, vel qualitas aliqua, quæ alteratis per continuationem partibus, hoc iter peragrabat; vel substantia tenuis, quæ in singulis subiectarum partium recipiebatur, mox ex illis, in alias continuas, atque iterum ex iis, quæ afficiuntur in alias, cūque ad dominantium partium aliquam petuenerit, tum homini mortis instat periculum. Simile in phalangiorum, & animalium quorumcunque venenatorum ictibus, accidere conspicitur. Non leuem tamen infert dubitationem, cur fortius no-

xam suam membro principi, cui maior resistendi vis adest, inferre soleat: cui dubitationi dupliciter respondeo: vel fortem cordis v.g. resistantiam augere per antiperistalsin veneni energiam; vel noxam cordi illatam, exigua licet sit, magis in illo viscere, in quo vita consistit, quàm in aliis ignobilibus, sentiri.

Non est tamen negandum, medicamenta quædam esse, quæ peculiaria membra iuuant, & venena quæ aliqua priuatim inuadunt: sic Galenus de *theriaca ad Pison. cap. 4.* & *1. de compos. medicam. sec. gen. cap. 1.* & *13. meth.* Nonnulla, inquit, deprehendimus, quibus proprium est partem aliquam corporis solum offendere: quæmadmodum lepus marinus pulmonem, cantharides vesicam exulcerant. Et rursus quibus insitum est, ut aliquod membrum ex omnibus inuent, unde male affectum iecur eupatorium herba plerumque valde confirmant, & unguentaria glans lieni pluries contulit, & saxifraga, atque betonica renibus multoties profuit. Rîsum mihi mouet Vallesius, qui damnans quosdam, qui ad occultam proprietatem (quam sacram barba

barbarorum anchoram appellat) confugiunt, deinde suam interponens sententiam, ait, causam huius rei esse analogiam, quæ est inter medicamenta, & membra; & hanc analogiam esse similitudinem, quam similitudinem se ignorare fatetur, vtpote quæ sensibus non est conspicua. At similitudo, quam quid sit ignorat, nonne causa occulta est? Libenter assentior Scaligero, exercitat. 218. numer. 8. sic dicenti: *Ad manifestas omnia deducere qualitates, summa impudentia est; id quod Alexandrèi multi, & frustra conati sunt, & temerè instituerunt.* Tunc post pauca addit: *Iidem isti, qui sese putant cuncta ad certas causas reducere manifestas, tandem huc deoluuntur, ut dicant, in oculis hominis, & catoblepæ esse principia contraria.* Sic ille. Itaque recentiores aliqui in externa rerum signatura inueniunt analogiam istam cum membris nostri corporis. Legendus est in hanc rem, ingeniosissimus tractatus Osvaldi Crollij, adiunctus suæ *Basilicæ rhymicæ.*

CAP. VIII.

A corpore ad animam, & ab anima ad corpus fit metastasis.

Quamvis Galen. in animæ cognitione multoties hæsitauerit, quod non semel fateatur; quamvis rursus 3. loc. affect. cap. 7. animam dicat, aut esse temperamentum æliuarum qualitatum, aut ab ipsarum temperamento alterari, & lib. quæd animi mores, cap. 3. Animæ substantiam quodammodo temperiem esse quatuor si qualitatum dicere velis, humiditatis, siccitatis, frigoris, & caloris, si corporum humidi, calidi, frigidi, ac sicci. In quo ab Hippocrate non dissentit, qui calidum innatum, naturam, temperamentum, & animam solet inter se confundere. Nihilominus, tam Galenus, quam Hippocrates aliquando altius sapere videntur. Galenus quidem nam præterquam quod lib. an animal sit quæd in utero est, cap. 4. Animam è celesti choro delapsam, scientiam suscipere, ait, & semper viam quæ ad simile ducit, sequi: quare terram quidem superat,

ab

ab erroribus aque se auertit, transcendit
aërem, sit igne superior, & caelestem diu-
nitatem attingit, sapēque trans caelestem
lacum intuetur, rerum omnium Domino
assistit, superas res circumlabitur, saepe
occurrit iis, quibuscum commune genus
habet, nouit unde sit, quamuis in corpore
sit, ipsūque rerum omnium patrem uni-
uersis rebus inesse, his, in quibus ab illo
locata est, utens oculis. Præterquam quòd
etiam Platonis, & Aristotelis placita,
circa animæ cognitionem, non reiecit,
& animam substantiam, non accidens
esse fatetur, lib. quòd animi mores, cap. 4.
Quæ omnia coniecturam faciunt, il-
lum, cū animam à temperamento
non separat, medicè tantum loqui.
Vnum mihi persuadet, hunc Philoso-
phum, & Medicum celeberrimum al-
tius quidpiam ac diuinius de anima
existimasse, nempe quia 9. de placita
cap. 9. Postquàm probabile esse dixit,
id quod Plato de anima asseruit, ad-
iungens ait: Quocirca ego temerè de his
pronunciare non audebo: & lib. 6. eiusdem
operis cap. 9. Conuenientius est Medico
de corporis instrumentis, Philosopho, de
anima facultatibus doctrinam instituere.

& 6. epid. sect. 5. com. 5. Medicis quoque
supervacuam de anima substantia noti-
tiam esse arbitror. Ex quibus sic confi-
cio argumentationem. Si existimas, ô
Galene ! animam esse temperamen-
tum, si temperamenti cognitionem ap-
primè te tenere, & ad Medicum perti-
nere, tam certum est, quàm quod cer-
tissimum, cur de animæ substantia nihil
statuere audes ? cur hanc doctrinam à
Medico alienam esse ais ? Profectò ni-
hil magis Medico convenit, quàm age-
re de temperamento ; nihil tibi magis
est cognitum, quàm temperamentum,
de quo, & seorsim, in peculiari opere,
& spatim, in singulis operibus, multa
pulchra, & erudita nos doces. Quare
quamvis, dum animam temperamen-
tum esse dicis, non ultra medicos fines
velis transcendere, & ea quæ ad medi-
cos usus spectant, duntaxat tractare,
eum tamen seriò rem tantam conside-
ras, eius pondere oppressus nihil pro-
nunciare audes. Tandem, cum hanc
considerationem Philosopho relin-
quas, & optimum Medicum Philoso-
phum esse, in peculiari opusculo præ-
dices, iam tibi optimo Medico, &
subinde

subinde Philosopho non inconuenit, de animæ substantia disputare. Fateor: disputationem hanc magno indigere otio, quo fortassis, in medicina facienda occupatus, carebas.

Ad Hippocratem accedo, cum breuiloquo breuiloquus: neque enim loca adducam, in quibus modò naturæ, modò calidi innati, modò etiam animæ nomine vnā, & eandem rem significat. Hoc cum medica auscultatione congruere est arbitratus. Attamen, vbi philosophicè magis loquutus, extulit se supra se, diuinius quidpiam de anima se in animo concepisse ostendit. Sit mihi sententia vna, & optima, instar multarum, in libello *dedicta. Anima quidem semper similis, & in maiore, & in minore: non enim alteratur, neque per naturam, neque per necessitatem; corpus autem nunquam idem in vello aliqua est, neque secundum naturam, neque ex necessitate.* Quid clarius dici potuit, vt animæ immortalitas insinuetur? Nam cum generatio, & corruptio sine alteratione fieri nequeant, si alterabilis non est, nec generabilis est, nec corruptibilis, sed immortalis.

Cæterum,

Cæterùm, si alterabilem esse negamus, quomodo morbos pati dicemus: ut possit scilicet fieri ab anima ad corpus, & à corpore ad animam morborum vel metastasis, vel epigenesis. Consulito Aristotelem, ipse te manu-ducet: quippe præter alia 1. *de anima*, text. 65. sic ait: *Quare senectus non est, quia anima quicquam est passa, sed quia id in quo est, aliquid passum est. Quod igitur Aristoteles de senectute, idem de omni ægritudine dicendum est; senectus namque ipsa est morbus.*

Quemadmodum enim aqua, vel quivis alius liquor, propriæ figuræ incapax est, dicitur tamen eam habere, iuxta figuram vasis, in quo includitur: ita anima alterationis incapax, alterari dicitur, iuxta corporis, in quo est, alterationem. Ne tamen in exemplo omnimodam veritatem quæras, & existimes me existimare, animam in corpore, velut aquam in vase, contineri, quod Platonis errorem sapit. Continetur quidem anima in materia, dum eam informat; sed aliter quàm aqua in vase: quippe aqua nil facit ad vas; anima verò materiam ad actum reducit.

cit. Non potest tamen hoc facere, nisi à materia contineatur; ideo Deus formalis causæ concursus supplet efficiendo potest, informando non potest: quippe informare nequit, quin contineatur; contineri est pati; divinæ autem naturæ pati non convenit. Sed hoc obitet, sit dictum.

Anima hominis, de qua loquimur, corpori ligata, non nisi per instrumenta corporis agit; si autem instrumenta non rectè se habeant, animæ actiones erroneæ quidem sunt, manente tamen animâ omnino inalteratâ. Actiones viventis non sunt solius animæ, sed totius: dicuntur autem aliquæ pertinere ad animam, quoniam in his, magis quàm in aliis, animæ assistentia splendescit. Hoc tibi demonstrabo in illa Hippocratis sententia, 6. epid. sect. 7. cuius expositionem in hunc locum reservavi: *Atrabilarij etiam comitiali morbo corripì plerumque solent, & vicissim comitiales fieri solent atrabilarij. Uterque verò morbus magis fit, prout ad alteram partem inclinârit: Siquidem enim ad corpus inclinârit, comitiales fiunt; si verò ad animum, atrabilarij, melancholici dicti.*

dicti. Galenus 3. *loc. affect. cap. 7.* hæc verba interpretatur, vt verti morbum ad animam, sit verti ad temperamentum, & sic fit melancholia, quæ est intemperiei morbus; verti ad corpus, sit verti ad compositionem, & ita fit epilepsia, quæ est morbus in compositione, nimirum ab obstructione pendens.

Mihi tamen videtur Epilepsia, quæ præcipuè in vitiatis motibus consistit, magis ad corpus pertinere, (sunt fateor motus totius compositi, sed qui magis corpori, quàm animæ tribuuntur) Quamvis autem sensuum priuatio adest, hæc minùs præcipuè considerata, & tandem quia priuatio sensuum est, ad sola instrumenta corporea impedita refertur. Hac de causâ humor epilepsiam faciens, ad corpus magis conuerti dicitur.

Rursus quoniam in affectu melancholico nulla corporis pars apparenter læditur, sed laborant duntaxat potentiae rectrices, quæ animam repræsentant, dicitur melancholia fieri, conuerso humore ad animam.

Adeo autem melancholica deliria ad animam pertinere censentur, vt ab

Hippocrate

Hippocrate in eâdem sect. 7. lib. 6. epid.
 sit dictum: *Mentis intelligentiam ipsam,
 per ipsam citra instrumenta ac negotia
 tristari, latari, timere, considerare, sperare,
 desperare: velut Hippothoi domestica
 famula mentis suæ per seipsam gnara erat,
 & quæ in morbo acciderant, sciebat.* Num
 reuerà citra instrumenta? hoc quidem
 impossibile est: nam dum anima cor-
 pus informât, nil sine corpore, hoc est,
 sine instrumentis corporeis agit. In-
 strumenta autem corporea appello,
 non solum ea quæ sensuum externo-
 rum sunt, sed quæ internorum etiam.
 Nihilominus sine externa sensatione
 potest homo intelligere, non tamen
 sine interna: *Oportet enim intelligen-
 tem speculari phantasmata.* At quando
 sine præcedente externa sensatione in-
 telligit, videtur quodammodo citra
 instrumēta corporea intelligere: quip-
 pe sensationes internæ propiùs acce-
 dunt ad spiritualem quandam natu-
 ram. Hinc Hippothoi famula mentis
 per seipsam gnara erat, & quæ in mor-
 bo acciderant, sciebat: quippe mens
 ab externâ sensatione abstrahens, se in-
 tus colligebat, & acutiùs intelligebat.

Propterea:

Propterea melancholici intra seipsos collecti, multoties vaticinari dicuntur, non quòd futuros euentus prospiciant, sed quòd, & circa præterita, & præsentia, atque etiam futura, profundius quàm alij, nullo exteriorum obiectorum impedimento oppressi, imaginentur. Ideò dicit Hippocrates, mentem *citra instrumenta ac negotia*, hoc est, nihil impeditam, per seipsam tristari, lætari, &c. Est namque negotio mentis, corporis otium aptissimum; ideo ab Hippocrate *cogitatio, mentis deambulatio censetur*, nempe quia ut corpus motu, ita mens cogitatione exercitatur.

Dioscorides, quem Galenus recipit, hanc repudiat sententiam, atque ubi *περί παντός*, *deambulatio* legitur, legendum putat, *περί παντός*, *de omni*, ut loquutio talis sit, *animæ de omni cogitatio hominibus*, hoc est, in qualibet re homines vim rationis exercitare debent. Sed hæc prætereunda sunt, illud verò mente tenendum, quod ad præsentem rem facit, nempe animam sua habere exercitia quibus valet, ut corpus suis. Interrogabis tamen, si exercitatio mentis

ris confert animæ valetudini, cur *animus* (quod dici solet) quiescendo fit sapiens ? An quoniam quies , quâ animus fit sapiens, est quies corporis? confert namque studiis otium. An etiam quia ut mens, hoc est , rationalis anima sapientiâ acquirit, necesse est eē quiescere à passionibus, à quibus perturbatur?

Hæ passiones sunt *animæ morbi* , de quibus *cognoscendis* , & *curandis* Gale- nus *libellum* scripsit ; ad quos etiam à corporis morbis, sicut etiam vice versa ab illis ad corporis morbos fit meta- stasis. Exemplum tibi sint insanix, eas animæ morbos appellat Hippocrates, in *epistola ad Senatum* , *populumque Abderitanum* , & Plato in *Timæo* , qui rationi metum mœstitiâque inducunt; si autem longo tempore hæ animi ægritudines durent, *melancholicum tale est*, ut Hippocrates ait 6. *aph.* 23. Pos- sunt videlicet homines, melancholico succo non prævalente , ab aliqua cau- sa manifesta timere, aut tristari ; si ve- rò timor iste, & mœstitia perseverave- rint, melancholicum succum in corpo- re augebunt. Ita fit metastasis, ab anima ad corpus , hoc est , ab ani-
mæ

mæ passionibus ad corporis humores. Nonne multoties medicinam facientibus contingit, hominibus mederi, qui aut ex obitu amicorum, aut ex damno aliquo affligi cœperunt, progressu autem temporis in aduersam valetudinem lapsi, Medicum vocârunt? Hos autem quibusnam medicamentis tractant? nempe iis, quæ melancholicum succum corrigunt, & euacuant.

Rursus aliquis affuctus cibis melâcholicis, melâcholicos præter debitâ proportionē, humores accumulet, nūquid non laborat corpore, hoc est, cacochymia melancholicâ? maximè. At si ex huiusmodi atra bile in cerebro collecta, incipiat in cogitationes multas delabi, ac tandem deliret, nonne erit morbus animi, in quem transmutationem fecit corporis morbus?

Plato in *Timeo*, hanc vicissitudinariam metastasin inter morbos animæ, & corporis, diuino quidem, quo pollebat, ingenio prosequutus mihi videtur. Nimius essem, si omnia, quæ ibi in hanc rem scripta leguntur, huc transferre vellem. Quærisne morbum corporis ab animo deriuatum? sic accipe.

Quando

Quando anima corpore admodum potentior est, exultatque in eo atque effertur, totum ipsum intrinsecus quatiens languoribus implet. Quando etiam ad discendum inuestigandūque, collectis in unum viribus, vehementer incumbit, liquefacit protinus corpus, & labefacit. Denique cum ad docendum, differendūque priuatim, & publicè ambitiosa quadam concertatione contendit, inflamat corpus atque resoluit. Nonnunquam etiam destillationes fluxūque commouet. Vis autem vice versā morbum animi transmissum à corpore:en tibi rursus. Quando corpus grande, & pigriori mole superexcedens pusilla exilique cogitationi animi copulatur, cum gemina sint in homine secundum naturam cupiditates: una quidem per corpus alimentorum, altera verò per id quod suum est, adaugent; quod verò animi, hebes, indocile, obliuiosum reddunt: atque ita infirmitatem maximam, videlicet imperitiam, generant.

Insuper anima morbum patitur, nempe libidinis æstum, quoties homo lasciuas concipit imagines, tum ob spectacula, quæ illas mouere possunt, tum ob illarum rememorationem.

Tandem

Tandem ab hac animi ægritudine in
 pudendis morbus adnascitur, nimirum
 priapismus, gonorrhœa, & similes affe-
 ctus, atq; ita ab animo transit ægritudo
 ad corpus. Hoc fortasse cōsiderauit Ga-
 lenus in amico, qui præter eam, quam
 antè habuerat consuetudinem, à con-
 cubitu abstinuit, & subinde in satyria-
 sin incidit; cui consuluit vt collectum
 iam genitale semen excerneret, postea
 verò, & à narrationibus, & spectacu-
 lis, & meditationibus libidinem exci-
 tare potentibus, summopere caueret,
 vt videre est apud eum *lib. 6. de locis af-
 fectis, cap. 6.* Sic & corporis, & animi
 morbo medicamentum adhibuit: cor-
 pori, excretionem seminis; animo, à
 lasciuis spectaculis, & venereis sermo-
 nibus abstinentioniam. Crediderim Ga-
 lenū hanc methodum à Platone didi-
 cisse, qui curationem vtriusq; affectus,
 animi, & corporis, ita inquires docet:
*Vna demum est ad vtrumque salus, & con-
 seruatio, vt neque animam sine corpore,
 neque corpus absque anima moueamus; vt
 in mutua contentione exaquetis inuicem
 viribus insurgentia, bonam totius valetu-
 dinem tueantur.* *in Roualli de med.*

Porro non est inutilis isthæc consideratio, immò in praxi valde necessaria, & ab Hippocrate commendata. *Mentis*, ait ille, *memoria*, *aliorumque instrumentorum*, & *appetentia*, *Medicocura*, & *meditatio* sit. Quia cum hæc omnia ad animi morbos referantur, manducunt ad instituendam morborum corporis curationem: immò aliquando morbi animi, morbis corporis remediosunt. Iram prouocamus iis, qui lethargo, vel alio simili morbo frigido laborant, & lacrymatio cerebri humiditati medetur.

E contrario morbo corporis, morbus animi curatur, ut accidit melancholico, qui accepto vulnere in capite resipuit, sanato vulnere iterum delirauit. Verum de hoc, latius in fine tractatus agemus, quando de iis quæ ad Medicum spectant, erit sermo.

C A P. I X.

*Metastasis à membro ignobili ad
membrum nobile, nunquam
bona.*

Sive propter materiæ ergasium, si-
ue propter naturæ molestatæ im-
pulsu metastasis fiat, nunquam ab
ignobili loco ad membrum princeps,
cum ægrotantis vtilitate accidit. Iccir-
cò natura principalia membra multis
quasi satellitibus circumpositis muni-
uit, eadèmq; innato robore ad hosti-
lium incursum expulsionem donavit.
Quòd si principes istæ partes vincan-
tur, & collum iugo submittant, corrui-
t vniuersum. Hanc doctrinam, cui nemo
vnquam se opposuit, videtur quodam-
modo labefactare sententia Hippocra-
tis 6. aph. 26. *Quibus in febribus arden-
tibus tremores fiunt, delirio solvuntur*, qua-
si delirium, quod quidem sit transmis-
sione materiæ ad membrum princeps,
nempe cerebrum, liberet à febre, &
hæc est Musæ interpretatio. Nam hu-
more (qui in venis putrescens, febris
causa

causa erat) ad nervos transmissio , cessat febrilis morbus , & oritur tremor ; ab eodem verò humore in auras tenues resolato caput occupatur , & delirium fit. Ut hic sit ordo : tremor ardentem febrem soluit , & delirium tremorem , atque febrem. Galenus propagationem quandam unius mali in aliud esse arbitratur. *Quæ enim hanc febrem efficiunt causa, in venoso genere existentes , quando ad nervos transferuntur , primum tremores faciunt ; compatiante verò principio etiam deliria.* Propterea non recipit verbum λύει, id est , *solvuntur* ; nam ea supervenientia solvere alios morbos dicuntur , quæ prorsus ægotantem liberant, non quæ alteram generant passionem, nihilo minùs priore periculosa.

Hæc itaque Galeni divisio , videlicet , passiones aut superveniunt non minùs periculosa quam sint priores , & tunc non propriè dicuntur morbi priores soluti ; aut superveniunt quidem , & hominem omnino liberant , & hæc propria est prioris morbi solutio. Hæc (inquam) divisio valde peccat , omittens tertium membrum, nimirum

aut superueniunt quidem passiones, sed minùs periculosa, quæ ægrum nec omnino liberant, nec in deterius trahunt. Hæ autem passiones soluere priores morbos, iuxta Hippocratis œconomiam dicuntur. Sic 6. aph. 21. *Varices, aut hæmorrhoides si suboriantur, μανίας λύουσιν, mania soluitur*: En prior morbus *mania*, soluitur à minore, hoc est, ab hæmorrhoidibus. Similiter 4. aph. 57. *A conuulsione, aut distensione neruorum vexato, πυρελὸς ἐπιγρνούμενη λύει τὸ νόσημα, febris superueniens soluit morbum*. Nonne febris epigenomenon est minoris periculi quàm sit conuulsio? maximè, & tamen febrem morbum soluere dixit. Ex his, & multis aliis Hippocratis locis cognosces, cum verbo λύει, *soluit*, uti non solùm abusivè, quando remanet morbus peior priore, nec solùm propriè, quando nullus remanet affectus; sed etiam tertio modo, quando remanet quidem ægritudo, sed priore mitior.

Existimat Cardanus tremores per vniuersum corpus fieri, offenso neruorum principio, nempe cerebro, non tamen cerebri ventriculis adhuc mali quicquam

quicquam patientibus. Vbi verò malum ad ventriculos cerebri conuertitur, desinit influere in nervos, ac proinde cessant tremores, pullulat verò delirium. Hanc fictionem damno: quoniam enim fieri potest, cerebrum affectum aded esse, ut totum nervosum genus in perniciem trahat, & ad cerebri ventriculos nullum adhuc peruenisse malum?

Heurnius, *soluuntur* exponit, hoc est, *resoluuntur*: quasi dicat Hippocrates, ad tremores & deliria, sequi totius corporis resolutionem. Cæterum longè petita interpretatio est, & quæ necessitatem eventûs secum non importet: neque enim necessariò tremens delirans, resolutus obit. Quid memorem varia multorum sensa? Sanè omnes in huius delirij expositione delirare mihi videntur. Forsan delirare videbor & ego, qui post tot declarationes, nouam nunc excogito; nihilominus periculum, cui sit obnoxius ille qui in publicum prodit, subire libet.

Tremor propriè dictus, qui fit ex pugna inter debilem facultatem, & membri pondus, morbus est chroni-

cus, à causa frigida. Motum autem qui in acutis contingit febribus, ob pungentis materiæ acredinem factum, magis ad convulsivas motiones, quàm ad tremorem referam. Platonem reiicit Galenus *de tremor. rigor. palpit. cap. 6.* quòd tremorem cum rigore confundat. In hoc ego Galeno assentior: nam rigor sine refrigeratione non fit, tremor refrigerationem non exoptulat. Attamen cùm idemmet Galenus *ibidem* aliundè etiam differentiam statuatur inter rigorem, & tremorem, nempe quòd *tremor, nisi partem mouere velis, non accidat; agitatio autem quæ rigorem comitatur, adeò violenta est, & necessaria, ut quiescere non liceat, nisi strenuè admodum renitaris.* Hæc differentia mihi ostendit, motiones, quæ per febres eueniunt, non esse tremores: siquidem in his vibrantur, & excutuntur membra, etiam renitentibus ægrotis. Quapropter convulsui sunt motûs. Et hoc magis ex crebro euentu constare potest: quippe quòd post huiusmodi vibrationes, sæpe æger convulsus moritur. Demonstrat etiam hanc veritatem causa, ex qua vibrationes istæ fiunt,

ea est mordicatio humoris biliosi, putridi, maligni. Vnde patet hanc esse convulsionem illam, quam Avicenna ab impropotione materiæ appellare solet.

Itaque phrenitici *τρομώδεις*, *tremuli*, ab Hippocrate dicuntur, non qui ob facultatem debilem tremunt, ut sunt Senes aut quomodocunque debiles: nam sic non magis phrenitici, quàm quovis alio morbo in extremis laborantes, tremuli dicerentur. Sunt igitur *τρομώδεις ἐν τῷ λαμβάνειν*, *tremuli in apprehendendo*, ob eximiam siccitatem communicatam à nervorum principio, hoc est, à cerebro inflammatione laborante. Sic etiam ex calcis sideratione, *τρομώδεις πυρετοὶ*, *febres tremulae* fiunt: num ob pondus membri, & facultatis debilitatem? minimè. Sed ob nervorum principium affectum, à quo in consensum, nervosum, musculosumque genus trahitur. *Sequuntur enim febres*, inquit ibi Hippocrates, *acutæ admodum, continentésque cum tremore, singultu, mentis alienatione, quæ paucis diebus hominem precipitant.*

Sit igitur ratum, tremorem, in ceco-

nomia Hippocratis, ad eas motiones se extendere, quæ tremorem quidem imitantur, sunt tamen non partim à facultate, partim à membri pondere, sed prorsus à morbosa causa. Accedamus nunc ad propositi aphorismi expositionem.

Febres quæ cum tremore fiunt, idem est ac si dicamus, *febres quæ fiunt cum moribus convulsivis*, hæ periculosæ sunt, si motus isti adueniant post febres: quippe *febribus convulsiones supervenire, malum est*. Sed quæres, nonne potest esse bonum, si metastasis fiat à venis ad musculos: nam sic febris desinet propter istam metastasin. Profectò nunquam metastasis à venis ad nervos adeò copiosa esse potest, quæ febrem soluat, immò potius magis est epigenesis quædam, hoc est, propagatio mali, quàm eiusdem metastasis, siquidem tremore succedente febris non desinit.

Ad tremores istos, seu ad motus convulsivos, si delirium sequatur, vel erit metastasis à nervis ad cerebrum, quæ tremores quidem soluet, non tamen febres, sed eas deteriores reddet;

vel

vel erit epigenesis, scilicet affecto iam grauius quàm antea cerebro: antea namque solum neruis in suo principio communicabatur, nunc autem etiam domiciliis potentiarum rectorum. In hoc casu delirium nec febres, nec tremores soluit, sed in deterius morbum pergere indicat. Quis enim aliquid bonum augurabitur, ubi vel nerui offensi cerebro suam noxam communicant, vel cerebrum læsum læsionem suam auget? Altero ex his duobus modis, potest conuulsiones delirium sequi, atque ita manifestum remanet, metastasin à membro ignobili ad membrum princeps, vel à membri principis parte ignobiliore ad nobiliorem, nunquam posse esse bonam.

Cur ergo Hippocrates dixit, febres, & subinde tremores delirio solui: nempe quia febres ardentes, acutæ, vehementes, cum materiæ transmutatione à venis ad neruos, si soluantur, non nisi per crisin possunt solui: quippe (vt Galenus ait, 2. *cris. cap. 11. in fine*) eas quæ cum magno, & citò se inclinante certamine fiunt morborum solutiones, (quæ præcipuè crises nominantur) februm ea-

rum. quæ ex calidis humoribus accenduntur, proprias esse est existimandum: post has, earum, quæcunque membrorum sunt principatum habentium facile mobiles, & calida dispositiones. Ephemera verò, & hectica febres, & sine magna perturbatione, & minimè subitas faciunt mutationes. Igitur ex hac sententia Galeni, colligo, febres ardentes, quibus conuulsui motûs superveniunt, esse illas, quarum crises sunt propriæ. At ægrotantibus, quibus crisis futura est, ex Hippocratis decreto 2. aph. 13. iis nox qua antecedit, est gravis. Idcirco tunc multa horrenda symptomata eveniunt, quæ Galenus 3. cris. cap. 2. & cap. 10. enumerat, ubi inter alia, delirij mentionem facit; delirium autem sive quæ alia crisis secum ferat, præcipuè ea est quæ ad febres ardentes cum conuulsivis motibus advenit: quippe in his iam priùs cerebrum inceperat pati.

Fit autem delirium in hac crisi, non ex metastasi prava, hoc est, ad membrum princeps, sed naturæ crisis molientis perturbatione. Quasi mens fuerit Hippocratis, admonere Medicos, ut in febribus ardentibus, cum tremoribus,

bus, si delirium superueniat, considerent, an id fiat eo tempore quo crisis futura speratur, & tunc solvendum esse morbum poterunt prædicere, ut scilicet aphorismus iste, sicut alij multi, ad prognosin pertineat.

Persuadeor ad ita intelligendum, quia solet magnus Senex multoties, post vniuersalem propositionem, aliquam peculiarem animaduersionem adiungere. Dixerat itaque in superiore aphorismo: *Erysipelas ab internis ad externa ferri, bonum, ab externis ad interna, malum.* Nunc peculiarem casum affert, in quo videtur fieri conuersio ab externis, nempe à musculofo genere, ad interna, hoc est, ad ventriculos cerebri, & tamen non esse mala, estque hic aphorismus quasi exceptio quædam superioris. Denique (quæ erat nostra præcipua intentio) delirium soluit febrē, nec propterea metastasis ad membrum, princeps est bona; quia hoc delirium quod est symptoma criticum, ad quod mox sequetur celebris aliqua euacuatio, non est stabile. Ac propterea solum in iudiciariis si-

gnis, & accidentibus, potest malum accedere ad membrum princeps, sine noxa; hæc autem, nec est metastasis, nec epigenesis, sed quædam ex naturæ conatu perturbatio, atque violentia.

C A P. X.

Metastasis, symptomatis ratione facta, aliquando bona.

MOrbi, qui & sine magna perturbatione, & minimè subitas faciunt mutationes, non nisi abusuè crisi solui, à Galeno. 2. *cris. cap. 11.* dicuntur. Crisis autem per excellentiam, 3. *cris. cap. 1.* hoc est, sine addito, est permutatio omnino ad salutem, confer-tim à natura vincente, quæ, præcedentibus coctionis signis, in die decretorio contingit. Huic opposita crisis est, cum addito, *prava*, quando scilicet morbus, cum pravis signis, præcipite lapsu ad mortem terminatur. Inter has, duæ sunt mediæ, proinde imperfectæ appellatæ, altera ad melius, ad deterius altera.

Præter has euacuationes, vel à vincente,

cente, vel à victa natura factas, sunt etiam aliæ ab eadem irritata, quæ quoniam symptomatis ratione fiunt, symptomatiæ appellantur.

Harum nomine audito, cane peiùs. & angue, vulgus Medicorum perterretur. Cæterùm non adeò vniuersalis in eas sententia promulganda est, quin aliquis relinquatur excusationi locus. Varij varia in hanc rem scripta reliquerunt, instituti mei ratio in præsentibus non postulat, vt longam conficiam disceptationem, propterea aliorum sententiis omissis, dicam duntaxat quid sentiam, & dicam breuiùs quàm res tanta dici possit, curabo tamen ne quidpiam ad huius difficultatis enodationem necessarium omitтам.

Omnis euacuatio, symptomatis ratione facta, in tempore peccat; si enim debito fieret tempore, hoc est, in die decretorio, non ampliùs symptomatiæ, sed critica diceretur. Nihilominùs, vel peccat in solo tempore, vel simul cum temporis vitio, habet vitium qualitatis, aut quantitatis, aut vtriusque. Si *qualitate, & quantitate simul* sit vitiosa, omnino damnanda est. Si *quantitate*

tantum, vel quantitas excedit, & tunc est inhibenda; vel deficit, & tunc an sit supplenda, certant artis proceres, & adhuc sub iudice lis est. Causa huius controuersię est Galenus, qui 1. *de art. cur. ad Glauc. cap. 14.* alui fluxum non aliã insuper euacuatione suppleri vetat, *quamuis non sit pro multitudinis ratione.* Cæterum in *tractatu de complexu morborum*, huic dubio videor fecisse satis, circa quod nunc etiam aliquid inferiùs attingam. *Si qualitate peccauerit*, decreto Hippocratis 1. *aph. 2.* damnabitur. Nec est, cur Ioannes Baptista Siluaticus posse hanc esse proficuum, si virtutis adsit tolerantia, existimet. Nam meminisse debuerat, dictum esse ab Hippocrate, *cum non purgantur talia, qualia purgari oportet*, (quod idem est ac si diceret, quæ peccant in qualitate) *nec conferre, nec leniter tolerari.* Profectò si non conferunt, non sunt proficua; si non tolerantur, non fiunt cum virtutis tolerantia. Vanum igitur est, & præter magni Dictatoris mentem, dicere euacuationes posse has aliquando conferre. Quòd si dicat, posse etiam cum materia quæ morbum non facit,

facit, aliam morbum facientem educi. Respondebo, tunc non esse euacuationem qualitate absolutè peccantem, sed aliqua ex parte. Hanc autem quis prorsus damnabit? Si tandem *solius temporis peccatum adsit*, non autem omnino qualitatis, neque valde magnum quantitatis, tunc posse aliquando iuare tam certum est, quàm quod certissimum,

Insurget fortasse aliquis ex iis, qui à Galeno ne latum quidem vnguem volunt discedere, & eius verbis suffultus, 4. *aph.* 2. euacuationes anticipatas improbabit, siquidem symptomaticas istas euacuationes, & vt causam, & vt signum prauas esse contendit, inquit: *Cum itaque natura superfluum euacuat, iuuatur animal: cum verò aliqui excernitur, casus ratione: neque inde utilitas vlla provenit, & talis euacuatio prae dispositionis est signum.* Multò autem efficacius hoc repetit, eodem libro 4. *aph.* 22. his verbis: *Quando incipit morbus, siquid excernitur, nihil tunc excernitur, natura ratione, sed sunt omnia casus earum, quae praeter naturam sunt in corpore dispositionum. Quo enim tempore, à cau-*
sis

sis quidem morbum facientibus natura grauat, adest autem cruditas humorum, tunc aliquid bene euacuari est impossibile. Dixit esse impossibile, ut raros etiam euentus excluderet, ne cui locus esset confugiendi ad id, quod communiter dici solet, nempe medicæ artis placita non esse perpetuæ veritatis, sed ut vera dicantur, sufficere, si contingant secundum plurimum.

Libenter tamen quærerem à Galeno, an cùm hæc scripsit, è memoria illi exciderint non pauci ægrotantes, quos Hippocrates testis fide dignus, euacuatione factâ citra coctionem, & extra diem criticum saluatos fuisse narrat? Nonne Metoni *septimo agrotosectionis tertiæ libri primi, Die quinto, è dextra nare sanguis affatim profluxit merus?* At Galenus ipse, tum in istius historiæ commentario, tom 2. *de difficult. respir. cap. 10.* euentum hunc, utpote præter opinionem, & qui accidere non soleat, miratur. Cæterùm sic licet admiratione dignus, iam constat posse accidere: aliud enim est, rem esse ex iis quæ rarò eueniunt; aliud, impossibilem esse. Præterea virgo Larissæ, cuius

cuius fit mentio. 3. *epid. sect. 3. agr. 12.*
copioso sanguinis fluxu è naribus, &
menstruis prouenientibus, sanitatem
fuit assequuta. Quid alios commemo-
rem, qui nullis præeuntibus coctionis
notis, euacuationes utiles habuerunt?
Quin, ut Galenus ipsemet fateatur, *sect.*
3. in prorrh. com. 18. Expurgantes corpus
euacuationes, principium quidem à synce-
ris interdum habent, sed desinunt in be-
nignas, mitèsq; deiectiones. Synceræ,
prauæ sunt, & nunquam nisi sympto-
maticè eiiciuntur: quòd si in crisi
exeant, in praua crisi exire dicendum
est; & tamen synceræ istæ excretiones
possunt utiles esse, quasi naturam quo-
dammò ad aliorum humorum ex-
pulsionem stimulantes. Ego verò exi-
stimo, ab Hippocrate *ibi dictum, ex*
synceris purgationibus desistentibus paro-
tides exurgere, quia per illas euacuatio-
nes, licèt prauas, natura aliquantulum
subleuata potuit aliorum euacuatio-
nem per parotidas moliri. Sunt autem
synceræ, prauæ, non ratione causæ,
nam morbifica sunt causa, & utiliter
euacuantur; sed ratione signi: quippe
magna est adustio, quæ bilem synce-
ram

ram reddit ; syncerum autem de bilio-
so humore ab Hippocrate dici solet.

Verùm, quoniam (vt Galenus. 1.
cris. cap. 9. ab Hippocrate edoctus ait)
materia cruda non facile expulsionì cedit.
Existimabit aliquis, magnam violen-
tiam naturam pati, si aliquid in princi-
pio educatur. Cæterùm scire expedit,
longè minorem ægrotanti vim inferri,
si vacuationem moliatur natura, quàm
si medicamentum : & tamen Hippo-
cratis consilio, 2. *aph. 29.* *cùm morbi in-*
choant, siquid mouendum videtur, moue:
vbi Galenus, *melius esse,* ait, *in principiis*
euacuare, quò minorem iam factam ma-
teriam faciliùs natura possit concoquere.
Sic ille. Si igitur euacuatio in principio
confert ad futuram coctionem, sanè
isthæc euacuatio ante coctionem fit:
si autem fieri potest cum vtilitate ab
arte, à qua maiorem agitationem pa-
titur corpus, multò meliùs fiet à natu-
ra, à cuius operibus minor contingit
agitatio.

Quòd autem euacuatio materiæ
crudæ ad futuram coctionem sit vtilis,
in nulla re meliùs ostendi potest, quàm
in humore, qui concoqui nequit, quo
euacuato,

euacuato, alij humores qui concoqui possunt, concoquuntur. Aqua hydro-
picorum coctionem non admittit, ni-
hilominus in *Coactis* laudatur, *aqua hy-*
dropicorum in principio sine cruditate.
Sed cur dicitur *sine cruditate*? potestne
aqua isthac sine cruditate esse? mini-
mè: sed quoniam ad aquæeductio-
nem sequitur, ut fæces, quæ prius erant
liquidæ, sint compactæ, & vrina quæ
aquea erat, colorem substantiamque
melio-rem acquirat.

Si verò quæras, cur laudetur isthac
eductio aquæ *in principio*? Dicam, tunc
temporis naturam adhuc esse minùs
debilem, & posse ab euacuata aqua
subleuari, quod non posset fractis iam
morbi diuturnitate viribus. Ut hinc
agnoscas, euacuationes siue à natura,
siue ab arte, meliùs tolerari primis
morbi diebus, cum natura adhuc est
sui compos, quàm postquam ægritu-
dinis longinquitas vires omnino labe-
factavit.

CAP. XI.

Metastasis secundum rectitudinem fieri debet.

LAudatissima est, apud Hippocratem, ea metastasis, quæ fit κατ' ἴξιν, è *directo* : contrà verò ea damnatur, quæ accidit κατ' ἀνάπαλιν, id est, *ex aduerso*. Interpretatur Galenus 6. epid. sect. 1. com. 1. prim. de vict. acut. com. 18. 2. de humor. com. 17. de rat. cur. per sang. miss. cap. 15. 1. aph. 20. istud κατ' ἴξιν, quasi dicamus κατ' εὐθυρίαν, hoc est, *recto tramite*, & in aphorismo 21. primæ sectionis, κατ' εὐθὺ τῇ πεπονθότῃ μορίᾳ, id est, è *directo partis affectæ*. Hæc significatio ex multis Hippocratis sententiis colligitur : quippe non solum à natura κατ' ἴξιν, hoc est, è *directo* euacuationes factas laudat, sed etiam ab arte, ut quando 4. acut. 73. inquit : Si dolor sursum penetraverit, vel claviculam, vel mammam, vel brachium, venam cubiti internam secare oportet, quâ dolor affuit parte. Quod si è contrariis ductum argumentum aliquid valet, profectò cum

cum in *Coacis* damnetur, 1. *prorrh. sect. 3. text. 33.* hæmorrhagia facta κατ' ἀναπαλιν, ex aduerso, & in multis aliis locis, laudetur ea quæ fit κατ' ἴξιν, tenemur fateri κατ' ἴξιν esse è directo.

Siquis autem à Galeno quærat, cur euacuationes è directo conueniant: confugit ille, 1. *prorrh. proximè citato*, ad experientiam; immò & Hippocratem hanc veritatem ab experientia didicisse vult. Neque enim vera fuit opinio veterum Hippocratis interpretum, existimantium, vt ex hepate vena caua sursum per thoracem fertur, ita etiam aliam è liene enatam sinistris partibus distribui; quippe lien nullam ad sinistra venam mittit. Rectitudinem ergo seruandam commendat magnus Dictator: nec solùm in hæmorrhagiis, in quibus manifestum præbet exemplum cucurbitula applicata hypochondrio eius lateris, ex quo è naribus fluit sanguis; sed in omni etiam naturæ opere, in omni mutatione, *per rectum*, inquit ille, *fiunt morborum mutationes, & crises, & abscessus.* Si hepar incaluit, dextra auris rubescit, & perseueranté huius visceris calida intemperie, dextra manus

manus, & pes vlcerantur; si lien, sinistra; si caput ex vtero dolet, vertice dolet, quoniam è directo vertex vtero superponitur; si ex ventriculo, frons; ex iecore, dextrum latus vrgetur; ex re, sinistrum; ex renibus, occiput. Partes vteri dextræ, propter rectitudinem cum hepate, tantò sunt calidiores, vt propterea in dextris oculis mares gigni, sit opinio ab Hippocrate deriuata.

C A P. XII.

*Damnatur opinio existimantium
rectitudinem consistere in
natura sanguinis.*

HAnc rectitudinem ineptè quidam ad igneam sanguinis naturam, semper recto tramite ad superiora tendentem referunt: sed quid dicent de rectitudine, quæ sit ad inferiora? Deinde si sanguis igneæ conditionis motum sequeretur, ita faceret naturæ suæ relictus. At natura, quando euacuat, non sinit sanguinem naturæ suæ leges sequi, sed vel illum impellit, vel attrahit; similiter etiam ars operatur.

CAP. XIII.

*Altera opinio, existimantium re-
ctitudinem consistere in pro-
cliuitate fluxionis, im-
probatur.*

Vana est etiam imaginatio eorum,
qui putant rectitudinem consiste-
re in procliuitate fluxionis humorum,
iuxta situm, quem intra venæ cavitatē
obtinet:quemadmodum enim in flumi-
ne (dicunt isti) pars dextra ad dextram
suum ductum seruat, & sinistra ad si-
nistram, ita sanguinis in vena conten-
ti partes seruant suos ductus, & fluxio-
nis proprietatem secundum hanc, vel
illam partem. Cæterum duplici no-
mine damnandi sunt: tum quia si-
tum spectant in corpore, quod perpe-
tuo mouetur, velut in flumine quod
super terram stabilem fertur: tum quod
in solis venis reperiant rectitudinem,
cū tamen in lienis inflammatione,
vena quæ secatur in brachio, & pede,
sit à caua, vel ascendente, vel descen-
dente procedens, cum qua nihil com-
mune habet lien: quippe non à ca-
ua,

ua , sed à porta suscipit nutrimentum.

C A P. XIV.

*Opinio Fernelij , & aliorum red-
centium rectitudinem ad
fibras , reiicitur.*

ALiorum opinio est , quam Fernelij 2. meth. cap. 5. amplectitur, rectitudinis rationem ad fibrarum re-
ctarum opem referens ; quod quidem nullâ consideratione dictum videtur. Nam si ille fatetur rectas fibras attra-
ctioni , obliquas expulsionioni esse desti-
natas , cur magis tractioni , quàm
expulsioni humorum , & præcipuè
sanguinis, euacuationem tribuit ? Pro-
fectò ea quæ venæ sectione fit , ne-
que tractione , neque expulsionione
opus habet , sed sanguis, aperto ori-
ficio, quâ data porta ruit ; ea verò quæ
fit à natura , expulsionione fit. Quis enim
dicat , fluxum sanguinis è naribus at-
tractione fieri ? Addit ille. *Laudantur
humorum cursûs , quicunque in directum
feruntur : qui verò obliquè in transuer-
sum,*

sum, vitio dantur, tanquam violata natura, & perturbationis indices: Sed cur? nonne in obliquum facti sequuntur fibras obliquas, vti in directū rectas? Deinde, cum liene affecto, sanguis è nare sinistra fluens rectitudinem sequi dicatur, quænam sunt filamenta, & fibræ venarum inter lienem, & nares? Præterea cum omnes venæ superiores cum inferioribus, in hepate confundantur, quænam erit rectitudo inter manum dextram, & pedem dextrum? & tamen in iis quæ sursum, & deorsum fiunt, rectitudo etiam commendatur.

Plures sunt rationes, quibus isthæc opinio conuellitur: omnium tamen instar, vna duntaxat sit, nempe, quando verum sit expulsionem fieri per venarum rectas fibras, (quod tamen falsum esse deprehenditur) nihilominus humorum, vaporumque decursus, immò & qualitatum propagatio, quæ omnia fiunt extra venas, vndènam habebunt, vt rectitudinem seruent? quam tamen seruant, vt experimento est comprobatum.

C A P. X V.

*Vera opinio, rectitudinem consistere
in meatibus.*

VEra rectitudinis ratio consistit in meatibus, quibus vniuersum corpus est perforatum. Sunt enim alij conspicui, alij inconspicui in rectum protracti, magnâ naturæ prouidentia, quæ rerum conseruationis sollicitâ, non solum viuentium caducitati seminum creatione, prospexit, vt pro iis quæ perierunt, alia denuò substituuntur, sed animalia ipsa, & semina quàm plurima duplicia constituit, vt si ab externis iniuriis vna pars pereat, altera supersit. Iccirco gemini sunt oculi, aures, brachia, crura, & reliqua, ita vt duo quasi animalia in vnum coniuncta videantur. Seminibus etiam duplicitate consuluit: fabæ, cicera, triticum, & cerealia ferè omnia manifestam separationem habent, vel per intercedentem membranulam, vel per solam appositionem sine agglutinatione, ita vt duo latera non sint inter se continuat

& hæc duplicitas in solis iis deficit, in quibus paruitas diuisionem non tolerat; diuisionis tamen defectum multiplicitate compensauit: apparet hoc in milio, & in piscium seminibus. Propter hanc duplicitatem, vnaquæque medietas suos habet ductus, ab alia distinctos, qui propterea in rectum protrahuntur.

Hæc meatuum rectitudo, per *αστερίαν* fit manifesta: nam in cerebri, testiumque medulla, ductus quidam, tanquam alueoli sanguine pleni conspiciuntur, existimantibus nonnullis, vasa esse, quæ tamen non sunt, sed secundum rectitudinem foramina alendis partibus, communicandisque per rectum materiis, creata. Hos ductus in tabula contemplaberis: quæ facilius in rectum, quàm in transversum secatur. Si præterea aquam dispergas, secundum meatuum longitudinem fluat.

Est tamen Galeni autoritas 3. *de fractur. com.* 10. quæ hanc doctrinam euertere videtur: siquidem *κατ' ἕξιν* Hippocratem semper intelligere, ait, *ἐν regione, modò in longitudinem corporis, modò in latitudinem.* Gorræus, vt hunc

modum soluat, hos meatûs inquit non vnus generis à natura esse factos, sed multiformes, alios secundum longitudinem, alios secundum latitudinem corporis, alios verò ab anterioribus ad posteriora tendentes. Verùm ista meatuum multiplicitas ad libitum est assignata. Melius, & rationi magis consentaneum erit, dicere, si euacuatio vnâ corporis quadram non transeat, posse quidem fieri secundum latitudinem, per meatûs in longitudinem exporrectos. E. g. si ex iecore, aut ex costis lateris dextri, ad manum dextram metastasis fiat, fieri dicetur secundum corporis latitudinem, siquidem à manu ad latus, latitudo spectatur; nihilominus fiet per meatus in brachio in longitudinem exporrectos.

C A P. XVI.

*Possitne deperditâ rectitudine
fieri metastasis laudabilis.*

Aliud est communitas, aliud rectitudo: quippe communitas per communia fit vasa, hoc est, per vasa
inter

inter se communicantia, videlicet propagines vasorum iuxta affectam partem excurrentium; rectitudo autem per meatûs. Cæterum quando utraque seruari potest, id sine dubio præstare operæ pretium erit, E. g. sanguinis missio in pleuritide si fiat à brachio lateris affecti. Quando verò altera necessario omitti debet, satis est vnam duntaxat obseruare, nempe eam quæ magis ex usu esse videatur. Galen. 13. *meth. cap. 4.* *Manu laborante, inquit, scarifica crura; altero crure male habente, reliquum.* Ut hoc exemplo tibi pateat, quid faciendum sit in eligenda communitate, aut rectitudine, iubet enim ut à manu ad crus rectitudo seruetur: quippe ibi nulla potest esse communitas, & humor promptè descendit. A crure verò sursum licet natura rectitudinem moliatur, (ut in hæmorrhagia è naribus, quâ iecoris, & inferiorum partium affectûs soluuntur) quod contingit ob efficacem naturæ contentionem; hoc tamen rarum est, & in arte, quæ à natura in energia superatur, impossibile. Propterea si in crure est affectus, præstat ad vasorum communitatem con-

fugere. Est autem communitas vasorum in vno crure ad alterum: bifurcatur namque vena utrique cruri alimentum deferens.

Neque hæc vasorum communitas à natura contemnitur: siquidem in Herophonte, 1. *epid. sect. 3. egr. 3.* prius rectitudine seruata, ex lienis inflammatione, in sinistram inguen recto tramite transposuit materiam, & (quoniam hoc non erat satis) iecur, cuius sanguinem lien, inflammatione impeditus, non suscipiebat, per venam cavam descendantem, misit ad utrumque crus materiam, ita ut ad crus sinistram, & totum id quod erat in inguine, fluxerit per rectitudinem; & ex vena cava non rectitudinis ratione, sed communitalis, aliqua portio fuerit transmissa.

Sed quoniam diximus, à supernis ad inferna facile esse rectitudinem sequi, non verò ab infernis ad superna: videmur Hippocrati aduersari, qui ita 6. *epid. sect. 2. text. 13.* inquit: *Virum igitur omnium, aut quæ quidem ab inferis sursum, qualia iuxta maxillas, aut etiam oculum, aut aurem. Quæ verò à superis deorsum, non secundum rectum.* Atqui, &

in angina rubores, & costarum dolores secundum rectum. Nonne ex his verbis constat, ea quæ tendunt deorsum, *non secundum rectum* procedere; ea verò quæ tendunt sursum, *qualia iuxta maxillas, aut oculum, aut aurem, & in angina rubores, & costarum dolores, secundum rectum*, hoc est, in his omnibus quæ sursum tendunt, rectitudinem seruari?

At non ita intelligi debet Hippocrates: quippe longè alia eius mens est. Videlicet ostendere, rectitudinem, quando ab infernis ad superna spectatur, optimè conspici posse: ut si hepar laboret, & sanguis ex dextra nare fluat; si lien, ex sinistra; si ex hypochondrio dextro materia ascendat, parotis fiet iuxta dextram aurem; si ex sinistro, iuxta sinistram. In iis verò, quæ à supernis ad inferna fiunt, multoties rectitudinem discerni non posse, E.g. in melancholia, varices, aut hæmorrhoides ad inferna humorem deducunt tam dextræ, quàm sinistræ. Tussis antiqua testium tumore evanescit, dextrine testiculi, an sinistri, cognosci nequit. Menstrua à supernarum partium morbis liberant, neque

an dextrorsum, an sinistrorsum inclinent, contemplamur. Quoniam ergo in his, & similibus rectitudo non agnoscitur, ex qua iudicemus procedatne suo iure euacuatio, recurrimus ad tria quæ Hippocrates illic proponit; nempe *quò, unde, propter quid*. Videlicet *quò*, ad quam partem: num ad eam, in qua fiat damnum peius priore: an ad eam quæ utilitatem afferat. *Unde*, an à membro nobili, & ab eamet parte, quæ prius vexabatur. *Propter quid*, num propter victoriam, an propter molestiam. Quod magni momenti est scire.

C A P. XVII.

*Communitas, & rectitudo quanam
cui præferatur.*

IAm dixi optimum esse, si & communitas, & rectitudo simul concurrant, simulque vel à natura, vel ab arte seruentur. Pergo nunc, si vna tantum potest seruari, & Medico detur optio assumendi quam velit, vtram eliget? Crediderim Galenum id nobis decretum reliquisse, 13. *meth. cap. 11*. his verbis;

bis : Ergo pariter tum reuellendus , tum educendus , qui ad iecur fluit sanguis est , internâ in dextro cubito sectâ venâ , propterea quod è regione , & amplâ viâ , cum vena qua caua dicitur , societatem habet : hac non apparente ; media secanda est ; quòd si nec ea se ostenderit , reliqua ac tercia incidenda. Sic ille : Quem vides ab vna vena , si non reperiatur , ad aliam transire , semper tamen in eodem brachio persistere , potius quàm in alio opposito venam , quam non reperit , quærere. Nonne est hoc rectitudinem communitati præferre ? Profectò non omnes venæ sectæ æqualiter prosunt , dicente eodem 2. acut. com. 10. *Vacuationes ab vniuerso animalium corpore fieri ; quanquam neque celeriter , neque similiter ex omni vena fiant.* Nihilominus succedaneas venas eligimus , dummodò in rectitudine persistamus ; præstat enim in vna quadra persistere ; licet venas non habeamus communicantes , quàm propter venarum communitatē ad diuersam quadrā transire. Corpus diuidito in quatuor quadras , duas supernas , infernas duas. Sit E. g. in quadra dextâ , hoc est , in costis

F s dextri

dextri lateris, inflammatio; melius est in brachio dextro, id est, in eadem partis affectæ quadræ; si axillaris vena non reperitur; quamlibet aliam secare, quàm accedere ad axillarem venam quadræ oppositæ; nempe lateris sinistri. Ut hinc iam addiscas, rectitudinem communitati esse præferendam.

ΕΑΡΧ. XVII.

Quid, & quotuplex diadoche.

Existimant nonnulli inter *διαδοχὴν*, *diadochen*, & *μετάστασιν*, *metastasin*, differentiam esse, quod *diadoche* *κατὰ λόγον*, hoc est, secundum rationem fiat; *metastasis* autem *ἄνευ λόγου*, nempe prater rationem. Verūtamen, ut ex Hippocratis, & Galeni scriptis coniectari licet; in aliis hæc differentia consistit: videlicet *μετάστασις*, *metastasis*; naturā validè impellente; at verò *διαδοχὴ*, *diadoche*; ut eas appellat Hippocrates, seu *διαδέχου*, *diadexies*, ut Galenus; tunc fieri dicuntur; cum debili impulsa transmutatio accidit; Hippocratica sententia est valde celebris, 6. epid. sect.

2. text. 28. Αἱ δὲ ἐξ ἑκ τῶν ὑποχονδρίων, ἐξ οἷων οἷα ἄλλοις, καὶ τῶν σπλάγχνων τῶν φλεγμονῶν, οἷα δύνανται, εἴτ' ἐξ ἡπατοσπλυνῶν, καὶ τῶν ἀντιῶν, καὶ ὅσα τοιαῦτα, id est, *exceptiones*, siue *successiones*, siue *derivationes*, (has tres interpretationes vocabulum *diadexies*, seu *diadochæ* patitur) *hypochondriorum*, ex quibus, & quales fiant expectanda sunt, atque etiam alia, & in viscerum inflammationibus quantum valeant, siue ex iecore in lienem, siue contrà ferantur, & quæcunque sunt huiusmodi. Sic ille. Sanè consentaneum videtur, vt quando promptitudine fluxionis *diadochæ* fiunt, *derivationes* appellantur; quando imbecillitate recipientis membri, *exceptiones*; quando autem successiuè vnum ab altero ob sympathiam, ratione vicinitatis, affinitatis, aut officij patitur, *successiones*. Has tres acceptiones seorsim libet illustrare.

CAPVT XIX.

Derivationes.

Sive per manifestos ductus, siue per obscuros meatus, eò materia derivatur, quò promptitudinem habet. In hac classe catarrhos collocare memento. Nam cerebrum, quod in libello de corynibus, seu de principiis, Metropolis a sedes frigidi, & glutinosi appellatur, cum in superiore sit aree, facilis ex eo in subiectas partes fit lapsus: unde triplex accidit destillatio: Si enim ad nares fluat, Græcis dicitur κόρυζα, coryza, Latinis *grædo*; si ad fauces, Græcis βράχας, brachos, Latinis *raucedo*: si verò ad thoracé pulmonésve, κατάρρως aut κατάρρως, catarrhus, & apud Latinos nomé idem servat; quamvis interdum etiam pro omni fluxione accipiat. Demum fiunt derivationes, quotiescunque viarum commoditas adest: sic & gonorrhœas, & omnes muliebres fluores, per diadochen, quæ derivatio quædam est, fieri dicemus; similiter etiam & lapis, quando sensim à renibus in vesicam cadit.

cadit. In his omnibus nec vehemens
cernitur impulsus, nec partis suscipien-
tis vel attractio, vel imbecillitas.

C A P. XX

Exceptiones.

Imbecillitas suscipientis loci si adsit,
diadochen; appellatione exceptio-
nis significabimus, quia scilicet ex
fluente materia effectus, seu potius af-
fectus, ad exceptionem refertur. In
hoc genere constitue imprimis arthri-
ticos: sunt enim humore in arti-
culis recepto: quia, vt Galenus ait
*4. aph. 3. latiora ipsorum spatia promptè
se habent ad superfluitates suscipiendas.*
Est etiam alia ratio, nempe quoniam
dum articuli simul cum musculis mo-
uentur, motu concalescunt. Denique
quia loca ignobilia cum sint, & langui-
da, vtpote à caloris fonte valde remo-
ta, facile admittunt fluxionem: quæ
omnia Princeps 22. 3. tract. 2. cap. 5.
paucis verbis est complexus: Et non
quidem multiplicantur dolores in iunctu-
ris, nisi quoniam ipse sunt magis vacua,
quàm reliqua membra; & plurimi motus.

& debilioris ac frigidioris complexionis, & situs earum in extremitatibus, est longinquus à rectore primo.

In eadem serie mihi statue omnes tumores, qui fiunt in adenibus, seu glandulis, quarum natura (ut ait Hippocrates libello de glandulis) spongiosa est: sunt enim rare, & pingues, & neque carnes sunt reliquo corpori similes, neque aliud quid simile corpori, sed friabiles sunt, & venas multas habent. Si verò disseces, sanguis largus erumpit, specie albus, & velut pituita. Tangenti autem velut lana apparent. Et si muli à vi ipsas digitis compresseris, glandula humorem oleosum remittit, qui & ipse conteritur ut plurimum, ac disperit. Sunt autem illæ, quas ad recipiendum paratas propriè emunctoria solemus appellare, præcipuè tres, tribus membris præcipuis expurgandis dicatæ: retrò aures, cerebro; sub alis, cordi; in inguinibus, iecori. Est autem hæc caro spongiosa, pituitosa, rotunda, in oblongum producta; quare tum figuræ, tum substantiæ merito, facile materiam aliunde suscipit.

CAP. XXI.

Successiones.

Morbi morbis succedunt, propter
vnius membri cum alio sym-
thiam. Hanc triplicem agnoscit Sabi-
nus apud Galenum 3. epid. sect. 1. in
agrotum I. Prima est propter viciniam:
nam vicinæ partes, facile vicinarum vi-
tia contrahunt, & mala vicini pecoris
contagia ledunt. Altera, propter generis
conformitatem, vt quando neruosum ge-
nus cum neruoso, arteriosum cum ar-
terioso consentit. Tertia, propter operis
familiaritatem; quomodo consentiunt
maxima cum utero.

His alias tres potes addere, quarum
prima est *rectitudo meatuum*: iccirco in
hemisrania, si consensus sit cum ieco-
re, dolet pars dextra; si cum liene, fini-
stra; si cum ventriculo, synciput; si cum
renibus, occiput; si cum utero, ver-
tex. Secunda *vasorum communitas*: ideo
ventriculus capiti, hepaticque consen-
tit, nimirum capiti, ob neruum sextæ
coniugationis, vnde vicissim ex capitis
dolore

dolore subuertitur ventriculus, ex ventriculi subuersione caput dolet. Tertia *partium continuitas* : continuatur tunica, quæ interiùs ventriculum vestit, & est eadem cum vestiente exterius linguam, fauces, palatum, & cum ea quæ interiùs vestit intestina. Propterea ab Hippocrate 6. *aph.* 32. Balbi dicuntur *alui profluuium maximè capi* : quia debilitas tunicæ in lingua, efficit vt litera R. difficulter proferatur ; eadem verò debilitas eandem occupans tunicam in ventriculo, & intestinis, efficit vt fæcum fiat diminuta retentio, & subinde facilis elapsio.

Non est præter rationem, prædictis sympathiæ speciebus aliam adiungere, cuius causa ignoratur. Ob hanc in diaphragmatis inflammatione delirium continuum accidit. Non quidem ob neruosam naturam, quam habet, nam in aliarum neruosarum partium inflammationibus, non contingit idem. Non propter motum : nam pulmo qui in motu perpetuo est, cum inflammatur in peripneumonia, non secum necessariò delirium affert. Non propter vicinitatem, nam magis vicinum diaphrag-

mati est cor quàm cerebrum, nec tamen ex diaphragmatis inflammatione, sequi videmus palpitationem, deliquiúmve. Manet igitur, vt sit causa quæpiam occulta.

Nec verò solùm per *συμπάθειαν*, *sympathiam*, succedunt morbis morbi, sed etiam per *δωλοπάθειαν*, *deuteropathiam*, siue *ὕσπαθειαν*, *hysteropathiam*; hoc est, per affectum secundarium, vel posteriorem: Vt sunt phymata post variolas; lienis tumores post quartanas; hydro pes post tertianas; & plerique alij affectus, quos etiam subsequentes possumus appellare. Hi omnes si hominem à priore malo valde languidum accipiant, hac vel maximè de causa, ab Hippocrate in libello de affectibus perniciosi iudicantur.

Spēi hūgē dē. n. a. t.
dē. n. a. t. dē. n. a. t.
dē. n. a. t. dē. n. a. t.
dē. n. a. t. dē. n. a. t.
dē. n. a. t. dē. n. a. t.
dē. n. a. t. dē. n. a. t.



STEPHANE



STEPHANI
RODERICI
CASTRENSIS
LVSITANI,

QVÆ EX QVIBVS.
LIBER TERTIVS.

CAPVT I.

Apostasis quatuorplex.



N V E N I E S apud Hipocratem, apostasin, seu abscessum, multipliciter acceptum. Interdum abscessum vocat transitum vnius febris in aliam, vt quando. i. epid. sect. 2. text. 21. ait : *Ex febris, & aliis morbis abscessus in quartanas fiebant.*

Non

Non ratò hoc vocabulum ad omnes euacuationes extendit, quod Galenus animaduertit 6. epid. sect. 3. com. 39. in-
 quiens : *Sæpius Hippocrates non solum ea, quæ in aliquam corporis partem depo-
 nuntur, sed etiam ea quæ expelluntur, ab-
 scessus nominat.* Atque etiam 1. epid. sect. 2. com. 8. *Vult Hippocrates ipse non solum decumbendo, sed etiam effluendo fieri ab-
 scessum.* Cùmque in quadam constitu-
 tione dixerit Hippocrates 1. epid. sect. 2. text. 35. 36. *His succedebant abscessus, aut maiores quàm ut ferri possent, aut minores quàm ut prodes-
 sent quicquam, sed redierunt, & deteriores euaserunt.* Quæ autem hos infestabant, hæc erant : dysenteria, tenesmi, lienteria, & fluxiones alui. Galenus in comment. notat, stranguriam quoque abscessum esse, licet per effluxionem, non autem per decubitum. Itaque cùm euacuationes abscessûs nomine significa-
 mus, non dicitur simpliciter ἀπόσας, id est, abscessus, sed cum additamento, ἀπόσας καὶ ἔκρυν, id est, apostasis, seu abscessus per effluxum. At propriissimè, & simpliciter abscessus appellatur ἀπόσας κατ' ἀνάθεον, Apostasis, vel absces-
 sus per decubitum. Idcirco quoties hic
 simpli

simpliciter, & sine addito abscessum legis, de eo, qui fit per decubitum in aliquam partem, me loqui intelligito. Dicò *in aliquam partem*, accipiens partis nomine, non solum emunctoria, articulos, & quemlibet peculiarem corporis locum, sed etiam vniuersam cutim: & hæc plurimis potest scatere abscessibus, qui ad vnum reducuntur, vti sunt variolæ, morbilli, scabies, & omnia exanthemata; vel occupatur per modum vnius, vt in ictericia: quippe Galenus etiam 3. *epid. sect. 1. in hist. Hermocratis, agr. 2. in fine*, auriginem, *abscessum icteriosum* appellauit.

C A P. II.

Differentia inter apostasin, & metastasin, quam Galenus tradit, an sit iuxta Hippocratis doctrinam.

EX vi vocabuli, μεταστασις, *metastasis*, transitum & migrationem significat; ἐποστασις autem, *apostasis*, interuallum seu digressionem. Placuit tamen Galeno, legislatorum more, ali-

ter has voces accipere : sic enim 4.
 acut. 68. ait : differunt inter se , quia
 ὁρσασαί, (id est , abscessus) indicatio-
 nem infert, agrumque à molestiis omnibus
 liberat ; μετασασαί, (id est , commutatio)
 aliarum habet principium accessionum, of-
 fensionumque, ut & aliud exigat tempus
 ad coctionem mali , corporis locus , ad
 quem infestantium humorum facta fuit
 commutatio. Sic ille : vbi abscessum ad
 perfectam crisin , metastasin ad sym-
 ptomaticam euacuationē refert. Opor-
 tuerat tamen, priusquam hanc consti-
 tueret differentiam , magni Hippocra-
 tis oraculum consulere , apud quem
 nihil tale inueniret, immò prorsus op-
 positum : siquidem quando ait : Ὡμὰ ὅ,
 καὶ ἀσπλά, καὶ ἐκ κακὰς ὁρσασαί, καὶ ἐκ πύμα,
 id est , cruda verò , & inconcocta , & in
 malos abscessus cōuersa, ibi ὁρσασαί, abs-
 cessus , pro symptomatica , non critica
 transmutatione accipit. Similiter in
 Coacis. δυσεντερία ἀναίρεσις ὁρσασαί, ὁρσασαί
 καὶ, id est, dysenteria iniepestinè suppres-
 abscessum facit ; non quidem criticum,
 quia intempestinè. Fortasse Galenus vo-
 luit metastasin intelligere humoris in-
 tra corpus manentis , & hanc aliarum
 habere,

habere, ait, principium accessionum, offensionumque. Abscessum verò intelligit per effluxum, & hunc indicationem inferre, inquit, ægrumque à molestiis omnibus liberare. Verùm neque sic eum omnino culpâ vacare dicemus: siquidem abscessum dixit simpliciter, cùm tamen per effluxum debuisset addere. Sed quemadmodum sæpe laudandus est, quòd multa in arte medica scitè explanavit; sic aliquando obiurgandus, quòd aliqua parùm curiosè inuoluta reliquit.

C A P. III.

Materia abscessuum.

EX Hippocratis decreto 4. aph. 74. *Urina multa crassa, & alba, si exeat, liberat ab abscessu*, euacuatâ scilicet per urinarias vias, materiâ, quæ in abscessum abitura erat. Quænam materia per urinas crassas, & albas educitur? nempe pituitosa. Hæc igitur est, quæ ut plurimum facit abscessus. Quòd si Galenus de rigor. & palpit. cap. 7. & 2. ad Glauc. cap. 7. erysipelata, & inflammationes

mationes in abscessus mutari ait, ne hinc addiscas ex materia calida abscessus fieri, sed euaporatis tenuioribus partibus materiam in alteram naturam degenerare, quod *de simpl. med. facult. lib. 7. cap. de coriandr.* expressit, ita inquit: *Neque enim erysipelas etiam vocari debet, posteaquàm inflammatio eius, & feruor, ac biliosum illud abierint.* Potest aliquis adhuc non acquiescere: quippe in *Coacis* ita habetur: *Ex suppressa intempestiuè dysenteria abscessus fit: sive biliosa, in articulis; sive sanguinea, in lateribus, & visceribus.* Vnde patet, inflammationem ex sanguine, in lateribus, & visceribus; erysipelata ex bile, in articulis abscessus appellari: sunt quippe inflammationes in visceribus, & lateribus, recurrente sanguine ad illas partes, vti flumina ad suum abyssum. Erysipelata verò in articulis, quoniam bilis suâ tenuitate longissimè perreptat. Hanc autem sententiam fusiùs explicabo infra *cap. ultimo huius libri.*

Solve tamen hoc dubium, in mentem reuocans, dysenterias siue à sanguine, siue à bile incipiant, paulo post, ventriculo intestinis consentiente, admixtam

admixtam habere pituitam; quod indicant mucositates, quas dysenterici solent excernere. Si igitur *intempestivè* fluxus supprimatur, & sanguineus fuerit, secum defert pituitam, & ubicunque firmatur, abscessum pituitosi humoris participem facit. Biliosus pituitæ est vehiculum, proinde eam ad articulos defert, ibique abscessum ex materia mixta producit. Memineris tamen, me initio pituitam *ut plurimum* materiam abscessibus præstare dixisse. Dixi *ut plurimum*, innuens hoc præceptum, sicut pleraque in arte medica, non esse perpetuæ veritatis. Galenum etiam habeo fautorem, qui 4. *acut. com.* 17. *per abscessus*, inquit, *magis quàm per excretiones; solui febres ex pituita putrescente ortas*; apposuit *magis*, hoc est, *maiore ex parte*, quod aliquando aliter fieri posse non impedit. Quando igitur idem Galenus 1. *epid. sect. 2. com.* 35. ait, *ubi multa sit inconcoctorum humorum copia, abscessus fieri*; intelligito *magis*, quàm si sit copia biliosorum; id enim quod frequens est, non excludit oppositum, sed eius raritatem significat. Itaque dixit abscessus fieri ab incon-

coctis,

coctis, insinuans id quod frequenter accidit, contemnens quod raro.

C A P. I V.

*Futura crisis per abscessum
cognitio.*

COMMUNISSIMA signa sunt, quæ futuram crîsim significant. Communia vocat Galenus 3. *cris. cap. ult.* quæ per abscessum; propria, quæ per quem locum fieri debeat ostendunt. Hoc ordine mihi videtur Hippocrates procedere, 6. *epid. sect. 2. text. 17.* prius enim signa futuræ crisis commemorat, ut sunt *vena temporum non firmata*: quippe Galenus 1. *de art. curat. ad Glauc. cap. 15.* inter signa iudicationis, *venas temporum pulsantes* recenset, cui adstipulatur Paulus lib. 4. *cap. 9.* Addit Hippocr. *neque viriditas splendens.* Alibi idem, nempe 4. *epid.* hæc eadem signa iudicationis statuit, inquit: *vena temporum, & contractiones, & colorum mutationes ante iudicationes, ex rubro ad viridem, ac pallidum.* Adiungit aliud iudicationis signum, *si spiritus intus re-*
G *linquitur,*

linguitur, hoc est, difficultatem respirationis, quam Galenus *lib. 1. ad Glauc. cap. 15. & 3. cris. cap. 11.* inter futuræ crisis signa connumerat. Porro hæc tria commemorata, idè futuræ crisis signa sunt, quòd perturbationem, & subinde pugnam naturæ cum morbo ostendunt. Nam perturbationes, quæ in particularium accessionum initiis fieri solent, eadem initio iudicationis, quæ particulari accessioni correspondet, accidunt.

Postquam verò futuram crisin significantia signa attulit, vnum apponit signum significans decretorium abscessum: illud est *tussis sicca non ferina*, quam etiam commemorat eodem *6. epid. sect. 7.* Si verò huius signi rationem quæras, accipe pro hypothese, tussim istam fieri ex materia crassa, & lenta, quæ expurgari quidem nequit; aut ex aquosa, quæ etiam tussis impetum effugiens non proicitur; (quod enim proiici debet, resistat oportet) tunc adde, si nihil excreatu, aut copiosâ mictione effundatur, abscessus necessariò fiet, & hoc vel maximè fiet, si tussis non solum *sicca* fuerit, sed etiam

non *ferina*, hoc est, non *maligna*, etenim si *maligna* est, iudicatio aliter quàm per abscessum fiet: quippe (vt mox dicemus) abscessus sperantur in morbo salubri. His signis Hippocrates, suum seruans ordinem, postremò adiungit signum loci, in quo futurus est abscessus, de quo in *capite sequente*. Interim conditiones tibi offeram, quas recipere est opus, vt crisis per abscessum præcognoscatur.

Prima conditio, vt morbus, in quo expectatur crisis, sit saluber: *quis enim* (inquit Gal. 1. ad Glaucl. citato) *bonam crisin in morbo pernicioso expectauerit?* Morbi omnes vel coctu facilem habent materiam, & subinde sunt salubres; vel difficilem: & isti vel salubres sunt sed diuturni, vel perniciosi. Qui coctu facilem materiam habent, vel iudicantur κατ' ἐξελὼν, id est, per effluxum, vel soluantur, hoc est, per simplicem transpirationem terminantur. Qui verò difficilem, & sunt perniciosi, possunt quidem habere abscessus, sed non bonos; qui verò difficilem, & salubres sunt, abscessus salutare habere possunt, ac proinde per abscessus iudicari. Hæc

igitur erit prima conditio ad expectandam crisin per abscessum, nempe ut morbus sit ad salutem proclivis: eam reperiens apud Hippocratem 3. *progn.* 23. his verbis: *Si quæ verò febris prorogetur, salvo facto homine, nec dolore decinente aut ob inflammationem, aut ob aliam aliquam occasionem evidentem, expectare oportet abscessum, &c.* Vbi noto dictum, *salvo facto homine*, quod consonat cum iis, quæ iam in alio prognostico scripserat, nempe 2. *progn.* 65. enumerans enim conditiones futuri abscessus, adiungit, *promittitur verò salutaris* (nempe febris) *ab omnibus aliis signis salutaribus; his tales fore abscessus sperandum est*: intelligito tamen abscessus bonos, & iudicatorios; nam pravi, & symptomatici etiam in perniciosissimis apparent, ut de pestilentibus dicemus.

Sed quænam sunt isthæc signa salutaria? nempe quæ desumuntur ex facili tolerantia, bono decubitu, somno, sitis priuatione, pulsu bono, & tandem *mente constare, & bene se habere ad ea quæ offeruntur*. Multa ex his affert Hippocrates in prognosticis, 2. *prog.* 65. &

66. Aduerte tamen , signa,quæ ex facili respiratione,& hypochondriorum salubritate,assumuntur,non solùm abscessum, sed etiam (vt dicemus) abscessus locum præostendere. Non autem quærenda sunt signa , quæ morbi discessum significant : nam hæc non possunt conuenire cum vrina cruda,quam futuros abscessus significare dixit Hippocrates 2. progn. 34. his verbis : *Qui tenues , crudasque diutius urinas mingunt , si cætera vt in conualituris indicia fuerint, in iis abscessum ad sedes infra præcordia expectare oportet : vbi noto, si cætera vt in conualituris, hoc est, si reliqua salutaria sint.*

Ex huiuscemodi vrinis , quæ cruda diutius minguntur, accipitur secunda futurorum abscessuum conditio : nempe morbi longitudo. Tales enim diuturnitatem morbi ostendunt : & morbis diuturnis abscessus fiunt ; nam (vt Galenus 3. cris. cap. 10. & 3. aph. 36. dixit) acuti morbi per excretionem , longi per coctionem , & abscessus indicantur : longi (inquam) & faciles per coctionem , hoc est , sine crisi ; longi & difficiliore crisi facta per abscessus.

Didicit hoc ab auctore magno, cuius hæc est sententia 3. *aph.* 23. *Quibus febres longæ, bis tubercula, vel labores in articulis fiunt* : idem intelligit, cum ait 4. *aph.* 44. *Siqua febris prorogetur, salvo facto homine, &c.* Longitudinis mensura ab eodem addiscenda est : nempe ut vigesimam diem morbus transeat. *Vbi morbus* (inquit ille, 3. *progn.* 25.) *vigesimum diem transiit, abscessus expectare licet* : quippe ultra hunc terminum frigidior morbus esse incipit. Verùm opponēs, ex *lib.* 4. *aph.* 51. *In febribus abscessus, qui ad primas iudicationes non solvunt, morbi longitudinem significant.* Unde colligitur, abscessûs fieri in primis diebus iudicatoriis, ac proinde non expectandam longitudinem febris, quæ eos significet, verùm ipsos longitudinem significare. Varij variè hanc sententiam explicant, & quidam *solvunt* actiue, alij *solvuntur* passivè legunt, utrumque tolerante verbo λύωμαι, id est, *redimo, libero, solvo.* Ceterùm actiue legendum puto, cum bonis expositoribus, & solutionem non abscessûs, sed febris intelligendam. Per primas autem iudicationes, intelligi

primas

primas in quibus fiunt, hoc est, si abscessus v.g. contingens die vigesimo non soluat tunc febrem, sed solutio differatur, iam non potest non esse cum morbi diuturnitate: quippe est decretorium non decernens, quod quidem, quatenus abscessus est, fit in morbo salubri, propterea non potest mortem significare; significabit ergo difficile iudicium, hoc est, longitudinem.

Tertia conditio, ut febris sit κοπώδης, hoc est, *lassitudinaria*, iuxta alium aphorismum, 4. aph. 31. *Lassitudinem habentibus in febribus, in articulos, & circa maxillas potissimum abscessus fiunt.* Sunt autem hæ febres κοπώδεις, lassitudinales, vel lassitudinariæ appellatæ, non quæ à labore fiunt immodico, siue assuetus sit, siue insuetus, hæc enim lassitudo ἀπλῶς dicta, sæpe ardentium febrium causa est, atque comes, febris autem ardens (ut dixi) magis iudicatur κατ' ἐκρουω quàm κατ' ἀπόθεσιν: Sed quibus coniunctus est κόπῃ αὐτόματῃ, lassitudo spontanea, atque hæc quidem non quæ febrem præcedit, sed quæ eiusdem est epigenomenon. Accidit autem, cum materia à venis ad mus-

culos propagatur. Et hæc interpreta-
tio Galeni interpretationi aduersatur,
qui voluit frequentiores fieri abscessus
in febribus, quas lassitudo à causa ma-
nifesta orta excitauit; quippe in his
caliditas adest articularum, quâ ad se
trahunt materiam, vnde abscessus fiunt;
aliam verò febrem, quam lassitudines
spontaneæ præcesserunt, communi
duntaxat ratione, per abscessus termi-
nari censet; nempe quia ampla articu-
lorum spatia promptè se habent ad
abscessus recipiendos. Verumtamen
considerare debuerat inprimis ideam
febris: quippe in ea quæ à præceden-
te labore accidit, acuta cùm sit, at-
que ex magna tum iecoris, tum cor-
dis, & omnium membrorum phlo-
gosi procedat, biliosa materia abun-
dans excretionem exoptulat. Dein-
de etiam lassitudinem spontaneam
quandam esse, quæ futuros morbos
prænuntiat, & hæc vel est *τονάδης*,
id est, tensiva, quam plenitudo facit;
vel *έλκιδης*, id est, vlcerosa, & fit à ca-
cochymia; vel *φλεγμονάδης*, & ab utrâ-
que causa fit. Alia est quæ superuenit
febribus, vt plurimum à fluxione pu-
tridorum

tridorum humorum , & calore liqua-
torum genita , quæ tantò laboriosior
est, quantò ægrum magis defatigatum
suscipit ; tantò etiam curatu difficilior,
quantò iam causam magis impressam
habet.

Quarta conditio est , vt sit febris
continua, quod etiam ex magni dicta-
toris decreto habemus , sic enim 3.
progn. 27. pronuntiauit : *Oportet autem
talem expectari abscessum per febrem con-
tinuam: in quartanam verò discessuram
esse, quoties intermittat, prebendamque er-
rabilem in modum.* Hoc Galenus tum in
commento , tum 3. *cris. cap.* 11. libenter
recipit. Si autem quæras, cur continuis,
non autem intermittentibus , accendant
abscessus, in promptu causa est. In con-
tinua, humor intra vasa inclusus con-
tinetur , quem si natura euacuare ne-
quit, saltem ad ignobiles partes satagit
detrudere , vt venas ab ea sarcina exo-
neret: abscessus autem ita fiunt, nempe
humoribus à vasis ad partes ignobiles
depulsis. In intermittentibus , extra
vasa , & subinde in loco ignobili pu-
trescit materia , quam naturā in alium
locum transferre non laborat , sed ibi

eam vel discutere, & sic febris simplice solutione terminatur; vel coquere, ut ita morbus, aliquâ evacuatione per loca conferentia factâ, iudicetur.

Quinta conditio, Anni tempus: quamvis enim omni tempore per abscessus morbi possint iudicari, nihilominus non ita commodè, nec ita frequenter in aliis, sicut in hyeme. Ideò ab Hippocrate est dictum 3. progn. 29. *Abscessus hyeme sunt magis, tardiusque desinunt, ac minus recurrunt*, quod humoti tunc dominanti, videlicet pituitæ, convenientissimum est. Iam enim diximus, pituitam, magis quàm alios humores, abscessibus materiam præstare. Quod autem tardius desinant, pituita etiam facit; sicut etiam quod non recurrant. Sed de recurso, seorsim dicemus.

Accedit ad facilem abscessuum exitum, non exiguum adiuventum ætas. Siquidem 3. progn. 24. & 28. *Talis abscessus magis, ac minore tempore evenit iunioribus, quàm trigesimum annum agentibus*. Et quamvis in Coacis iubeat expectari abscessus, in iis qui trigesimum annum superârunt: non magni momenti

menti contradictio est ; neque enim omnes æqualiter suarum ætatum terminos transcurrunt , sed alij tardiùs , alij verò citiùs : ideo Galenus *primum terminum conuersionis* , ait , *ad habitum frigidiorum esse trigesimum , nouissimum verò trigesimum quintum.*

Sed si ante trigesimum annum , vel saltem circa trigesimum , expectari abscessum iubet , cur 1. *progn.* 33. & 3. *progn.* 12. sanguinis fluorem è naribus in iunioribus , & trigesimum quintum agentibus annum , iubet expectari ? Ad decernendum hoc , non solùm ad ætatem , hoc est , ad robur , nec solùm ad humoris naturam , sed ad vtrumque simul respicere oportet. Nam vbi facultas iuuenilis fuerit , hoc est , robusta , & humor calidus , excretio fit , nempe vel sanguinis è naribus , vel alterius humoris , per destinatas à natura vias. Si frigidus , vel concoquitur , & ita simplex accidit solutio , vel abscedit , & fit abscessus. Et en tibi in iuuenili corpore abscessus , videlicet ex humore frigido. Si virtus sit debilis , qualis in ætate senili , rarò humor calidus prædominium habet ; si verò aliquando

habeat, tunc morbus aut erit saluber, aut perniciosus: in pernicioso, nihil bonum expectato; in salubri, abscessum: & ecce abscessus ex humore calido, ob virium infirmitatem, in ætate senili. Cum audis ex humore calido, & ætate senili, ne calidissimum tenuissimúmque consideres, sed eum qui seni est calidus, talis autem iuueni forsitan non foret. Restat adhuc humor frigidus in senibus: hic in valde senibus coctionem non admittit, propterea 2. aph. 40. *raucedines, & grauedines in valde senibus coctionem non admittunt*; at in senibus, quibus cruda adest, viridisque senectus, concoquetur, sed tardè. Media ætas cum frigidis humoribus, si valenter agat, abscessum facit; cum calidis, licet valenter non agat, abscessus emerget.

Dènum signis futuram crisin per abscessum indicantibus, (nequid in hanc rem deesse videatur) adiunge signum ex pulsibus, quod Galeno acceptum refertur: inquit enim, in sua *synopsi, ad finem: Vbi autem pituitosior morbus sit, quando ex inæqualibus pulsibus mutatio in plures, vehementes, & magnos fit, per abscessum erit crisis. Cæterum*

terùm (vt ingenuè loquar) non video, cur magis pulsus isti crisi per abscessum , quàm per euacuationem significant.

Pro coronide etiam adiiçito signa sumpta ex cessatione dolorum sine excretionè. Adiunge etiam suppressionem aliarum euacuationum. Et peculiariter si abscessus futuri sunt parotides, horum signa esse coma , aut surditatem. Tandem si futuri abscessus signa quæpiam adsint, nec abscessus sequatur , malignitati id tribuito, idèd in
Coacis, Quæ signa futuri abscessus, si ab iis non sequatur abscessus, malignum.

C A P. V.

Præcognitio loci , in quo futurus sit abscessus.

PROsequitur Hippocrates in 6. epid.
citato , & postquam signa futuræ crisis , & signa crisis per abscessum aliqua recensuit, accedit ad signa, quæ locum futuri abscessus præmonstrant, inquit , *expectare oportet secundum dissentionum rectum incessum, quæ in ven-*

ere sunt. Hoc est, ut Galenus in com.
ait: *Verùm in dextram corporis partem,
an in sinistram morbi abscessus futurus
sit: huiusmodi namque distentiones secun-
dum ipsarum rectum situm, abscessus fore-
nunciant.* Cùm enim (ut idem Galenus
4. de pres. ex puls. cap. ult.) spectandas es-
se dicat *inclinationes natura, & sect. 3.
prorrh. com. 71.* humorum consideran-
dàm *inclinationem*, ad quam videlicet
fiat partem; cùm rursus *inclinatio* sem-
per κατ' ἴξιν, id est, secundum rectum
dirigatur, documentum hoc optimum
est, quo iubemur abscessus futuros ex-
pectare versus eam partem, quæ cum
parte prius patiēte rectitudinem quan-
dam habet. Atque ita habes modum
præcognoscendi, num dextrorsum, an
sinistrorsum abscessus futurus sit.

Utrùm verò sursum, an deorsum,
accipe ab Hippocrate, qui 2. progn. 66.
id in peripneumonia præcipuè docet
præcognoscere, inquiens: *Abscessus fiunt,
bi quidem ad infernas regiones, quibus ali-
qua inflammatio circa hypochondria ad-
sit, nam hypochondria inflammata iam
inducunt è pulmone descendisse ma-
teriam, quæ protinus magis descen-
det,*

det, & ad inferna dilabetur: Ille verò ad supernas, quibus hypochondrium quidem molle, & doloris expers sit, difficultas autem spirandi aliquo tempore facta, desierit sine occasione aliqua. Si verò materia ad hypochondrium non descendat, quod indicat hypochondrij *λειτουργία*, mollities, & *ἀναισθησία*, doloris vacuitas, & tamen *ἀπνοια*, difficultas respirandi, sine manifesta causa cesset, signum est aliorum, nempe sursum materiam tendere: si difficultas, inquam, respirandi cesset, non quidem omnino, nam in peripneumonia semper adest, (at tunc increuerat, & solito maior erat) fiatque sine manifesta causa derepentè minor; in aliis verò morbis, in quibus difficultas respirandi non necessariò adest, si adsit, & postea cesset, nec malum ad hypochondria dilabatur, ad superna ascendit, atque ad glandulas, vel quæ retrò aures, vel quæ sub mento sunt, se recipiet.

Porro si frigidi, & crassi humoris signa adsint, decubitùs ad partes inferiores prædicendi sunt, ideò Hippocrates 3. progn. 23. *Si febris prorogetur saluè affecto homine, quod humorem frigidum,*

frigidum, crassæque naturæ indicat, abscessum expectari iubet *ad aliquem articulum, maxime inferiorem.*

Hoc tamen signum suam exceptionem habet : nam Hippocrates 2. *progn.* 67. in peripneumonia, qui affectus à calido fit humore, laudat *abscessus qui ad crura sunt.* Ad crurane humor calidus? maxime : ubi natura valde robusta humores etiam tenues, contra naturam eorum propensionem ad loca inferiora, & quoad potest, procul à membris nobilibus detrudit. Nonne natura robusta poterat excretionem moliri? poterat quidem, si omnino victrix exultaret, hoc est, coctione peracta. Verùm Hippocrates non supponit hos abscessus, cocto humore apparere, sed vel crudâ adhuc existente materiâ, vel saltem semicrudâ : inquit enim. *Abscessus qui ad crura sunt, in pulmonibus vehementibus, ac periculosis, omnes utiles sunt; optimi verò, qui, ubi screeatio iam in mutatione est, sunt.* Dixit, *in mutatione est*, insinuans abscessum optimum apparere, cum incipit coctio; abscessu autem apparente, coctio prosequitur. *Eccircò adiungit : Si enim œdema ac dolor*

dolor fiat, & scretio pro flana purulenta existat, ac foràs excernatur, ita securissimè, & homo supererit, & item abscessus citissimè citra dolorem desistet. Quasi dicat, apparente cedemate, & dolore, hoc est, abscessu, sputi concoctio in melius abibit, & pro flana fiet purulenta: ex quo duo bona sequentur, vnum securitas à morbo, alterum facilis sanatio abscessus. Pergit tandem: *At si excretio non rectè excernatur, nec urina videatur bonum habere sedimentum, periculum claudicantis in articulo, vel multi negotij imminet.* Hoc est, si tota materia inconcocta decumbat in articulum, neque pars aliqua cocta per sputum expurgetur, periculum est ne in malos abscessus abeat, & pars putrefacta decidat, aut amputetur, vnde necesse sit patientem claudicare.

Itaque materia non frigida potest à natura robusta, ante coctionem, propelli ad inferiores partes: potest & à non admodum robusta, in superioribus abscessus moliri. Hoc patet exemplo in febribus quæ *κατὰ μέρος* appellantur, hoc est, *lassitudinaria*, quippe in his 4. *aph. 31 in articulo, & circa maxillas potissimum*

issimum abscessus fiunt. Hoc verò contingit, (inquit Galenus, in com.) propter eam quæ in corpore est caliditatem, relata multitudine ad caput; mox inde suscipientibus illis, qui circa maxillas adenes sunt; sicuti qui circa inguina, & alas sunt, quando ad illas partes multitudo pervenerit.

In conualescentibus etiam est cognoscendi modus, in quam partem humor decumbat, ex 4. apb. 32. Quibuscunque resurgentibus ex morbis, siquid laboraverit, hîc fiunt abscessus. Quod etiam contingit aliis, antequàm incidant in morbum, 4. apb. 33. Si ante morbum aliqua pars laboraverit, hîc morbus firmatur.

C A P. VI.

Abscessus qui boni, qui pravi.

QUAMVIS cùm Hippocrates 1. epid. sect. 2. text. 35. 36. ait: *His succedebant abscessus, aut maiores, quàm ut ferri possent, aut minores, quàm ut prodesseut quicquam,* Galenus hanc sententiam ad abscessus per effluxum trahat; nihilominus longè magis abscessibus per

per decubitus, potest accommodari: quippe paruitas, aut magnitudo, in abscessu per decubitus, non solum consideratur iuxta paucitatem, aut multitudinem fluentis materiae, (in quo abscessus per effluxum, & per decubitus conueniunt) sed etiam in maiore, aut minore loci, in quem decubitus fit, capacitatem.

Itaque abscessus ἀξιόλογος, id est, æstimabilis, plures debet habere conditiones: prima est, ut sit ἀντίρροπος καὶ ἰσορροπος, id est, æquilibris seu æquiualens. Nam & magnitudine potest, & paruitate suâ nocere: *Magnitudine*, siue magnitudinis nomine intelligas magnam circumferentiam, seu malignitatem, seu partis præcipuæ læsionem (quæ sunt tres morbi magni acceptiones) semper æger à priore morbo fatigatus, abscessui ferendo est ineptus. *Paruitate*, quâ abscessus ἡμίρροπος, id est, semiflui, nec rependentes, morbum superstitem relinquunt, ægrum superstitem esse non sinunt. Ideò Hippocrates 2. progn. 9. ait: si verò digiti, ac pedes omnino nigrescant, minus perniciosi sunt. Damnauerat prius liuorem in unguibus,

& digitis, nunc minùs damnosum esse ait, nigrorem *in digitis simul*, *& pedibus*. Nonne nigrities liuore-deterior est? ita sanè: nam liuor via est ad nigritiem. Cur ergo magis damnat liuorem, quàm nigredinem? Nempe quia liuor supponitur esse in vnguibus, & digitis, quæ non habent satis amplam recipiendæ materiæ capacitatem; digiti verò simul cum pedibus habent. Ita vt quamuis ratione materiæ, nigrities deterior sit; ratione loci, liuor, tanquam abscessûs minoris quàm oportet, damnetur.

Esto tamen, vt materia totos occupans pedes, minùs praua censeatur, quàm si exiguum occuparet locum. Cæterùm cur tumor aliquis in febre, potest immensitatem materiæ febrem facientis exhaustire? An quia materiæ aliqua portio, quâ natura exoneratur, illuc decumbit, exonerata verò natura potest aliam rursus transmittere, quæ partim discussione, partim suppuratione educitur: pars alia in priore minera remanens, non tanta est, quin possit à natura iam suo munere fungente emendari?

Adhuc restat dubitandi ratio : nam sic quilibet minimus locus sufficeret ad recipiendum naturæ impetum, & subinde non est cur in abscessu damnetur particula minùs capax. Hoc non admittam, nam priorem naturæ sese exonerantis impetum particula exigua non capit, ac proinde datur palindromæ occasio. Quòd si Moscho 7. *epid.* contigit, ut oborto in superiore palpebra hordeolo, à calculoso affectu, cui obnoxius erat, liber penitus euaserit : id accidit, quoniam natura partis incapacitatem, numero abscessuum compensauit : quippe & iuxta aurem, & infra in ceruice, bubones secundum rectitudinem apparuerunt.

Altera conditio, quæ communis est omnibus euacuationibus, est, ut quoad fieri possit, fiat κατ' ἵξιν, id est, secundum rectum, saltem ut nunquam fiat ἀνὰ πάλιν, id est, ex aduerso. Adeò autem potens est rectitudo, ut 1. *epid. sect. 3. agr. 7.* Metoni, qui die quintâ absque signis coctionis iudicatus est, sanguine fluente secundum rectum, indicatio perfecta facta fuerit. Erat urina nigra, & nigrum contentum, signa lienis affecti,
fluxit

*Fluxit sanguis ex sinistra nare largus,
merus.*

Tertia conditio, quæ etiam communis est abscessibus per effluxum, est ut fiant præcedente coctione. Sed quomodo in abscessibus præcedet coctio, si per *tenuēs crudasque urinas diutius mittas* significantur? Non negat Hippocrates 2. *progn.* 34. post has urinas crudas, alias coctas apparere, quibus abscessus significetur: quippe *citra coctionē, nec abscessum, nec aliam quampiam indicationem rectè fieri posse*, Galenus ait 3. *epid. sect. 1. com. 5.* Sed quænam coctio requiritur, ut abscessu morbus iudicetur? Profectò non perfecta: Verùm sicut non omnimoda cruditas esse debet, ita nec exacta coctio; etenim si ad optimam coctionem respicias, urinae, quæ (ut Galenus tradit 1. *proorrh. sect. 3. com. 71.*) secundum naturam habent, atque præter id pendens album continent, coctum morbum esse indicant absque abscessu. Oportet igitur (adiungit ille) eas nec prorsus incoctas, nec absolutè coctas esse, ubi natura abscessum factura sit. Esto igitur ut initio sint tenues, atque omnino cru-

dæ,

æ, & tales diu perseverent & tandem tamen, si iudicatio per abscessum futura est, oportet eas aliquid de tenuitate, & subinde de cruditate remittere. Hoc Pythionis exemplo comprobatur, 3. epid. sect. 1. egrot. 1. *Vrina à primo ad octauum usque diem tenues, decolores, quæ suspensionem habebant nubilosam. Decimo sudavit, sputa subcocta, iudicatus est, urina circa iudicium subtenues. Quadragesimo à iudicio die suppuratio circa sedem, & stranguriosus factus est abscessus.* Si rectè animaduertis, priùs urinae fuerunt tenues, circa iudicium autem subtenues, hoc est, minùs crudæ; sequuta autem fuit iudicatio per abscessum iuxta sedem.

Quarta conditio, vt abscessus non ἀνὰ πρῶτον, id est, sursum fiat, sed κατὰ πρῶτον, id est, deorsum: sic Hippoc. 2. epid. sect. 1. *Optimi autem potissimum sunt, qui deorsum vergunt.* Et hæc conditio eadem est cum alia, quâ abscessus laudat, quibus à nobilioribus ad minùs nobiles partes fit decubitus: quippe infernæ partes ignobiliores sunt, infernæ (inquam) vt Hippocrates declarat 2. progn. 34. *quæ septo transuerso inferiores*

feriores existunt, hoc est, *inferiores absolute iuxta situm*, quem omnes partes in corpore habent. Si enim *non absolute dicas, sed respectu habito ad superiores laborantes*, errabis: nam multoties contingit, partem inferiorem quidem esse, sed abscessum periculosiorem, E. g. si à collo ad pulmonem humor decumbat, si ab hepate ad tenes, vel vterum; in quibus casibus (ut vides) pars ad quam decubitus fit, inferior est, verumtamen quæ periculosius ægrotat.

Quod ergo legis apud Hippocratem 2. *epid. citato*, eos abscessus laudabiles esse, *qui infra morbum fiunt*, intellige, dummodò pars ad quam materia decumbit, sit minùs periculo obnoxia. Hoc declarat exemplo: *Velut varices, & lumborum gravitates ex supernis*. Itaque si ratione partis non adsit maius damnum, sanè ratione motus semper inferior locus aptissimus est: quippe humoris, (præcipuè crassi) pondus ad inferiora vergit.

Sunt autem partes infra septum transuersum ignobiliiores: quia suprà membra animalia, ac vitalia sunt, à quibus naturalia, quæ sunt infrà, nobilitate

te superantur. Adeò autem ignobiliora loca contemnuntur, vt, licèt ex abscessu claudicet ægrotus, nihilominus in pede eueniat, optatur; melius enim est partem ignobilem pati, & ægrum claudum remanere, quàm affici partem nobilem, & ægrum ad interitum deduci. Audi Gal. 6. epid. sect. 2. com. 14. dicentem: *Ideò ut plurimum abscessus in superioribus excitati, difficiliore sunt, quòd membra illa maius quàm inferiora discrimen afferant, cum utraque eodem affectu vexata sunt: siue enim cerebrum, siue guttur, aut gula, aut pulmo, aut pectus, aut cor, inflammata sunt, mortifera aegritudo est; membris infra iecur inflammatis, pauci admodum pereunt, potissimum si recta curatio adhibeatur.*

Forſitan ex historia Moschi, quem diximus ex hordeolo in palpebra superiore, & aliis tumoribus iuxta aurem, & infra ceruicem obortis, à calculoso affectu fuisse liberatum, accipies occasionem dicendi, aliquando etiam decubitum ad superiora vergētem, laudabilem esse: nam à renibus, ad oculos, aures, ceruicēque, quid nisi materiæ ascensum cognoscimus? Verùm

non fuit ad hos abscessus transmissa materia illa, quæ in renibus negotium faciebat, sed quæ è cerebro in renes solita erat cadere: cerebrum namque, quod pituitæ metropolim appellauit Hippocrates, multorum morborum (saltem eorum qui pituitosi sunt) causa est, ac proinde potuit deriuatio materiæ pituitosæ à cerebro, ad partes vicinas quidem, sed inferiores prodesse.

Demum hoc ignobilitatis nomine, & propensione naturæ, laudantur omnes externæ partes: quippe hæ & ignobiles sunt, & promptam naturam habent, quæ interiorum magis sollicita, malum ad exteriora depellit.

Sed & quinta conditio, huic adhæret, vt scilicet materia fluens *quàm longissimè à morbo abscedat*, 2. epid. citato. Hoc enim non fit nisi à natura valente, & rectè suo munere fungente; atque ita bonum est signum: bona etiam causa, quoniam quæ procul fiunt, non præstant priori morbo fomentum; quæ verò proximè, semper fumando conseruant prioris morbi vehemementiam, & *mala vicini pecoris contagia ledunt.*

Denique

Denique sexta, & vltima conditio, communis etiam aliis, est *conferentia, & tolerantia*: quod Hippocrates ita pronunciat 4. *epid. Maturi in morbis abscessus an indicent, signum, est, si febriculosa existentia non febricitant, & difficilis tolerantia existentia, facile ferunt.* Quasi diceret, ut abscessus sint indicatorij, hoc signum est: nempe si aderat febris, & aufertur febris, & quæ difficilis tolerantia erat, fit facilis.

Verum hinc se offert dubitatio: Nam isti abscessus indicatorij, *maturi* dicuntur ab Hippocrate, hoc est, suppurati, (nam reuera suppuratio in abscessibus expetenda est.) At in suppuratione 2. *aph. 47. dolores, & febres fiunt.* Quomodo ergo possunt febrem soluere, dolorémque, ex quo difficilis tolerantia sequitur, mitigare? Possunt quidem: quippe febris ad suppurationem accedens, ephemera est; dolor autem non perseverat: quare expectandum est, donec tempus transeat, quo materia suppuratur. Hoc transacto, nec febris, nec dolor, si abscessus iudicatorius est, amplius debent remanere; si symptomaticus, tunc malignior redditur febris, & do-

lor fit maior. Dolor prauum est symptoma, cui, si adsit materiæ in coquendo contumacia, nihil deterius, ratione abscessûs, euenire potest; febris autem, quoniam iam eam non esse ephemeram pro hypothesis statuimus, praua erit, ex Hippocratis decreto, 4. aph. 55.

C A P. VII.

Quæ crisis sit melior, per effluxum, an per decubitum.

Poteris ex superius dictis colligere, eas materiæ transpositiones, quæ principium nouarum affectionum afferunt, esse damnabiles: tales verò sunt ex, quæ per decubitum fiunt; quippe in loco, in quem decumbit humor, noua incipit ægrotudo. Hinc igitur constat, crises per decubitum esse minus optandas, quàm per effluxum: maximè, quia ex priore morbo, ægrotum, morbus succedens, defatigatum accipit, quod Hippocrates adnotauit in libello de affectibus. Vbi mihi videretur crisin per decubitum hac ratione damnare, nam præterquam quòd ægrotum,

ait, imbecillitate à priore morbo contractâ, posse perire, antequàm posterior desinat: adiungit inferiùs, *indicari in morbis est, cùm morbi augeſcunt, aut marceſcunt, aut in alium morbum tranſeunt, aut deſinunt.* Horum verborum explanationem ſic accipe: Crises fiunt, vel ad melius, id eſt, cùm morbi *marceſcunt*, ad peius verò cùm *augeſcunt*, ad ſanitatem cùm *deſinunt*, ad mortem, cùm *in alium morbum tranſeunt*. Quod quamvis perpetuum non ſit, eſt tamen eo nomine verum, quò iam dixerat, *præ imbecillitate perit, antequàm alter morbus, qui poſterior acceſſit, deſinat.*

Eſt & alia ratio, quæ criſin per decubitum, tanquam imperfectam, minùs laudabilem, quàm criſin per effluxum nobis repræſentat, nempe quia, vt manet exploratum, ad criſin per decubitum ſatis eſt, ſi morbum faciens materia ſemicocta appareat, ad criſin per effluxum requiritur perfectà coctio. Itaq; cùm duplex ſit criſis, κατ' ἐκκρίσιν, per excretionem, & κατ' ἀπόβασιν, per decubitum: illa omnes habet conditiones, quæ ad bonam criſin requiruntur; hæc autem, quantumvis morbum ſoluat, &

in die decretorio fiat, nihilominus duobus nominibus imperfecta censeatur, tum quia fit non præcedente perfectâ, sed imperfectâ coctione, tum etiam quoniam ægrotantis labores non finit, sed testatur adhuc nova molestia, E.g. si in pedem decumbat humor, ex Hippoc. documento, *periculum claudicationis, & maioris negotij.*

C A P. VIII.

Parotides rarò prodesse possunt.

OMnes ferè pravi abscessus conditiones insunt iis, qui retrò aures protuberant. Sunt, fateor, ibi glandulæ, & cavititas illa emunctorium cerebri appellatur. Verumtamen venæ, arteriæque ferè innumeræ iuxta transeuntes calorem impertiuntur, & subinde dolorem, quare minùs tutus est humoris, in hanc partem receptus. Præterea locus est in vicinia cerebri, & in superiore corporis arce: Cuncta hæc bonis conditionibus aduersantur: quippe materia in hoc spatio neque multa, neque sine reuersionis periculo, neque deorsum,

deorsum, neque procul à parte affecta, se recipit. Non, (inquam) multa: quoniam vt Galenus ait 1. *prorrh. sect. 3. com. 68. parotides affectu minores sunt; sine periculo reuersionis, propter vasa multa, multum propinqua; non deorsum, quoniam (vt ibidem Galenus adiungit) per parotides non fit ad inferiora deuolutio, sed morbus remanet in altissimæ arcis parte, nempe in auribus; non procul, quippe cum fiant retro aures, locus iste, cum cerebro vicinitatem maximam habet. Nihilominus aliquando profunt, vt propterea Cassius *probl. 30. eas διδύμους*, id est, *geminos* appellet, fausto salutis ostento: velut enim duo sydera, *Castor, & Pollux*, gemini fratres, desinente in serenitatem procellâ apparent, ita aliquando secum parotides ferunt sanitatem.*

C A P. . I X.

Conditio quæ requiritur, vt parotides sint utiles.

SI de parotidibus, quæ febribus accidunt, loquamur, vt utiles esse
H 4 possint

possint, necesse est, non solum earum materiam supputationem subire, sed simul febrem facientem humorem coctionis notas de se præbere. Si enim alterutrum ex his desit, infida est, quæ per parotides iudicatio fit. Possè autem febrem desinere, parotidibus non suppuratis, sed aliâ evacuatione, ita Hippoc. 1. epid. sect. 2. text. 81. *Tubercula secundum aures, quæ in febribus cum dolore extuberant, nonnullis, cum febris decretoriè sedatur, non resident, neque suppurant.* E contrario suppuratis parotidibus febrilem materiam adhuc esse crudam, ostendunt Cratistonaestès, & Pictoris ancilla, inferiùs eodem lib. text. 48. qui obierunt, quia (ut est opinio Galeni) causa februm, quæ intra venas continebatur, nõ erat cocta, quamvis parotides essent maturæ: Tunc addit, *posse fieri quapiam in parte priuatim coctionem, toto morbo non cocto.* Porro parotides suppurare, semper optimum est; è contrario) ut in Coac. habetur) *tumores circa aures in longis morbis non suppurantes, lethales.* Et quamvis addiderit, *alui verò his deorsum feruntur,* intelligas oportet, id non esse necessarium,

sarium, sed additum duntaxat, quoniam alui fluxus superueniens est vna salus; præter quam non est sperare aliam. Nec sola alui fluxio biliosa parotidas soluit, sed vt ex 1. *epid. sect. 2. text. 81.* addidit Hippoc. *dysenteria, vel in crassus urinis residentia.*

C A P. X.

Quid habeant parotides ab aliis abscessibus diuersum.

PEculiari vocabulo abscessus, qui retrò aures protuberant, parotides appellantur, nomen fortitæ, à loco vbi fiunt, ὑπο τοῖς ὠτί, id est, *iuxta aures*. Habent autem aliquas condiciones ab aliis abscessibus diuersas, quarum prima hæc esto. Alij fiunt (vt superius dixi) ex materia frigida; parotides ex mediocriter calida, quæ ad caput suo impetu fertur. Dixi, *mediocriter*, nam ea quæ valde est calida, & subinde tenuis, καὶ ἐκπύου, id est, *per excretionem* egreditur, sicut frigida *per abscessus*; ex quo relinquitur, vt quæ in medio caloris & frigoris est, sit apta efficiendis parotidibus.

Quòd si dicas; 6. *epid. sect. 2. com. 18.* rubeum colorem futurarum parotidum signum esse; vnde constare videtur, eas ex calida materia, quæ rubedine significatur, fieri; quod etiam confirmatur, quia hoc colore in facie apparente, si sanguis ex naribus fluat, tunc parotides non apparebunt; sanguis verò iste, qui liberat à parotidibus, parotidum materia foret, nî per nares exiret. Respondeo, rubedinem suam habere latitudinem: hunc autem ruborem, qui parotidas significat, non esse valde saturatum, ex eodem! Galeno conicio, qui non dixit esse *rubeum colorem*, sed *bonum colorem*. Nomine autem boni coloris, cum accipio, qui mediocriter est tinctus; bonitas quippe in mediocritate consistit. Si rursus dicas, causones indicari aliquando per parotidas, scito id ratissimum esse, & quando contingat, iis contingere causonibus, qui illegitimi quidem sunt, ut voluit Galenus 4. *acutor. 11.*

Secunda: Alij abscessus si suppurant, sine totius corporis periculo accidunt. Dixi *totius corporis*, quia suppurati possunt ex prauitate materiæ, partem

rem aliquam cui insunt, corrumpere, unde periculum claudicationis eis tribuit Hippocrates. At parotides etiam suppuratæ interficiunt. Ided Vallesius, non inani coniectura, suspicatur Cratistonaactem, & Pictoris ancillam periisse, facto maiore abscessu quàm ut ferri posset, & lethaliter putrescentibus quibusdam particulis, quod periculum in vicinitate cum cerebro fundamentum habet.

Tertia: alij abscessus fiunt per expulsionem; parotides autem sunt velut quædam *πρωϊστικὴ, ἢ ἐρωγίς*, id est, *euomitio, & eructatio*. Hoc satis constat, quia parotides, cum non fiant sine naturæ robore, si expulsionem fierent, ad longinqua mitterentur; at mittuntur ad proxima, quoniam non expulsionem, sed quadam, ut sic dicam, eructatione pullulant. Hoc verbum *eructare*, accipio ab Hippocrate, qui *l. prorrh. sect. 3. text. 76.* inquit: *in capitis dolore coma, & surditas, abscessum aliquem post aures eructant.*

Quarta, ex his Hippocratis verbis sumitur, nempe præcedente somnolentiâ, futuras parotides significari. At di-

ces, in somnolentia materia frigida est & crassa, in parotidibus non item. Imò verò, inquam, parotides mediocrem (vt dixi) materiam habent; somnolentia, licèt pituitosam, non tamen omnino crassam, sed à calore liquefactam: hinc æstate pomeridiani accidunt somni, soluto scilicet pituitoso succo, & leniter cerebrum irrigante. Quando autem Galenus in 1. *prorrh. sect. 3. com. 76. in calidis magis capitis dolorem, in frigidis verò surditatem* reperit: calidas, & frigidas dicit, hoc est, inclinantes ad calorem, vel ad frigiditatem.

Quinta, & valde peculiaris parotidum conditio, est posse ptyalismo suppleri: sic Hippocrates 1. *prorrh. sect. 3. text. 75. tussicula cum sputatione abscessum post aures tollunt.* Atque hæc sunt, quibus parotides ab aliis abscessibus dissentiunt, sumpta ex rei natura.

Sexta, & vltima conditio parotidum, contraria omnino aliorum abscessuum conditionibus, accipitur ex curatione, quam Galenus nobis traditam reliquit 3. *de comp. med. sec. loc. capite* huic rei dicato, nempe 3. nam in aliarum inflammatarum partium curatione

ne , apocrousticis , hoc est , repulforiis seu repercutientibus remediis utimur : atque id maximè , cum neque malignum sit , neque multum , quod influit ; neque corpus humoribus ex aquo redundet ; sic namque spongia sola ex posca imposita incipientes inflammationes repressit , neque quicquam ex eo totum corpus fuit offensum. Verùm in parotidibus , ipsum contrarium facimus , pharmaca attractoria adhibentes ; atque si hac nihil memorabile efficiant , etiam cucurbitulas affigentes , aut fomentis assiduis utentes , & quæ sequuntur.

CAP. XI.

In quibus parotides cum aliis abscessibus consentiant.

Sunt etiam aliqua , in quibus parotides cum aliis tumoribus præter naturam consentiunt. Primò , quia omnes , & criticè possunt , & symptomaticè evenire. Secundò , suas habent , sicut reliqui abscessus , indicationes , diuersas à febrium indicationibus. Tertiò , durât etiam post febres. Quartò ,

tò, palindromæ, vt alij abscessus, parotides sunt obnoxia, parotides quidem magis, ob superius dictam rationem. Quintò, quoniam licet locum habeant iuxta membrum princeps, videlicet iuxta cerebrum, est tamen locus ille emunctorium suscipiendis excrementis destinatum. Sextò, abscessus siquãdo in acutis fiunt, (heri, non esse impossibile dixi) non minus quàm parotides, per epigenesin, & magis diffusionem putredinis, quàm naturæ motu fiunt, ita vt tunc non ad metastasin, sed ad epigenesin (de quâ satis diximus) reduci debeant. Hoc tamen dogma non est infallibilis veritatis: potest enim aliquando natura ἀνακάθαρσιν, *anacatharsin* moliri, (nempe per sputum) nec sufficere, quare aliam ad sui conseruationem viam quærit, & parotidas euomit. Quando autem Galenus in peripneumonia abscessum negat: si frequentiam negat, admittendus, si omnino abscessus spem auferat, omnino est deferendus.

CAP. XII.

Neutra parotidum conditio.

INterdum possunt parotides, ratione
materiæ fieri indifferentes, hoc est,
nec omnino bonæ, nec penitus praviæ:
hoc accipe ex 1. epid. sect. 1. text. 10. ubi
parotides describuntur, quæ *obscura*
omnibus evanescebant: neque enim ex
his malum aliquod remanebat, quo-
niam *non suppurabant*; neque rursus ex
eisdem bonum aliquod accidebat, quia
non erant indicatoriæ. Itaque ut Hip-
poc. ait, *extincta omnibus sunt citra in-*
cōmodum; adde tu, *non tamen cū utilita-*
te. Hæc autem neutra conditio paro-
tidibus adest benignis, ut erant istæ:
utpote quæ sine febre apparebant;
nam aliæ vel febres habent consecuta-
neas, vel sunt consecutaneæ febrium.
Si ad eas febris sequatur, febris ista,
febrium ex bubone rationem subit:
nempe *ex bubone febres omnes oritur, ma-*
la, præter ephemeræ: quamvis epim bu-
bo duntaxat soleat appellari tumor,
qui est in inguinibus, nihilominus ad
omnes

omnes tumores præter naturam potest hæc sententia trahi, dummodò animaduertas, rariùs in parotidibus, quàm in aliis abscessibus febres effe-
diarias: partis enim situs membro principali propinquus, non sinit fe-
brem non malignari. Si verò parotides ad febrem sequantur, tunc eas habent
difficultates, de quibus suprà. Relin-
quitur, ut si nec febres antecedant, nec
sequantur, à materia fiant vaporosa (ut
Galenus *ibidem* notat) quæ faciliè eua-
nescit.

C A P. XIII.

De bubonibus pestilentibus.

Quamvis bubo (ut diximus) propriè
inguen dicatur, tamen usus obtri-
nuit, ut omnis tumor in emunctoriis
enascens, siue sit in inguinibus, siue
sub alis, siue retrò aures, hoc vocabulo
significetur. Porro per febres pestilen-
tes apparentes bubones, magis ad epige-
nesin, quàm ad metastasin referam. Si-
quidem nullum ex iis leuamen, nulla
naturæ victoria, sed infelix omen, eo-
rum

num est apparitio : tunc enim & vires languidiore, & morbus ferocior sese ostendit. Cur autem post bubonis apparitionem, soleant in pestilentibus omnia fieri graviora : existimo causam esse, quoniam prius, dum venenata materia intra vasa erat inclusa, consortio sanguinis, & spirituum aliquantulum coerceretur ; eadem verò extrà effusa, ἀχαλίνωτος, id est, effrænis redditur, totâque suam pestiferam conditionem, nullo prohibente, exercet. Hinc est, quòd in his non conueniunt repellentia, sed semper attrahentia, vt virus in abscessu consistens, omni ingenio, & vi, omnibus machinamentis extrahatur : Nam malignitas in tumoribus præter naturam, apocrousticis vti nos vetat.

Porro de pestilentibus bubonibus Hippoc. loquutum existimo, cùm 6. epid. sect. 2. text. 10. ait : *Abscessus, veluti bubones, signum quidem sunt germina habentium, tum aliorum, tum præcipuè viscerum : maligni autem sunt hi.* Sanè βλασύματα germina sunt, quæ ex arboribus propter nimiam fœcunditatem pullulant : sic autem appellantur bubones pestilentes,

tes, qui non exoneratam naturam, sed materiam redundantem significant: & quemadmodum germina cum pullulant, arbor nihil minuitur, cum secantur aut arescunt, augetur; ita bubones pestilentes si appareant, morbus non fit minor, si euanescant (euanescent autem sæpissime) euadit maior. Pulchra metaphora, & Hippoc. autore digna!

C A P. XIV.

Abscessus vniuersales, alij per modum plurium, alij per modum vnius.

INter τὰ ζυμώοντα χάρια, loca euacuationibus conferétia, *cutim vniuersam* recenset Gal. 1. aph. 21. quam propterea vniuersale emunctorium iure possumus appellare: quicquid verò ad eam decumbit, vniuersalis abscessus nuncupabitur. Is autem vel in myriades diuisus est, vel continuus: Græci omnia quæcunque in cute efflorescunt, communi vocabulo ἐξανθήματα ἢ ἐκθύματα, *exanthemata* seu *ecthymata* appellant;

hærent; ut nobis non constet, an eorum seculo varij cutanei affectus floruerint, nempe morbilli, variolæ, puncticulæ, quorum cognitio iam ab Arabum temporibus ad nostra usque manauit. Præterea etiam sani, qui tamen sunt cacochymi, abscessum istum ad cutem patiuntur, si videlicet antequam cacochymiam deponant, forti utantur exercitio: iccirco Hippocrates 6. *epid. sect. 5. text. 34.* Si impurgatus, inquit, laboraueris, ulcera erumpent: quia exercitio, quicquid in corpore latet, ad cutem propellitur; ubi prauus latet humor, mordax atque ulcerans, cutem facit ulceribus sordescere. Sunt autem diuersi horum ulcerum effectus, pro diuersitate humoris quo constant, ut ex Galeno potes addiscere, 2. *de sympt. caus. c. ult.* Quippe tenuis, salsus, immotusque succus in iis est, qui pruriunt; paucus, tenuis, mordens, & immotus in ulcerosis affectibus; multus, salsus, crassus, & immotus in lepris, & scabie; paucus, tenuis, & mordax, cum exiguo motu, in horroribus. Quod si vel vehementius mouetur, vel copiosior, mordaciorve est, concutientem rigorem infert, non horrorem: maximum

maximum quidem , qui plurimus est , & mordacissimus , & vehementissimè motus; minimum verò , qui propter unum aliquid horum mediocriter auctum , ex horrore in rigorem transire facit

C A P. X V.

De morbillis.

MOrbillorum materia tenuis est, sed facilis: propterea febrem quidem excitat valde magnam, non tamen perniciosam; quippe humor tenuis ingentem excitat flammam, sed quæ non magno negotio discutitur: Exemplo tibi sit febris diaria in spiritibus accensa, in qua calor ingens est, non valde acris, & parum durat. Sic in febre ex morbillis, quæ si non admodum morbosum inueniat in corpore apparatus, synochus sine putredine est, & ad diarias reducitur, nulla adsunt praua symptomata, sed cita discussio, & solutio sine periculo. Mihi quidem nullum contigit vidisse, qui ex hoc malo periclitaretur, præter vnum, qui punctículas admixtas habebat, quales
in

in febribus valde malignis apparere solent, vt non ex morbillis, sed ex punctulis periisse dicendus foret. Non negabo posse retrocedentibus morbillis ægrum interire, vix tamen retrocessum citra ægri culpam agnosco, vt si aëri se exponat, aut aliquem alium errorem committat, à quo si caueat, res in tuto est.

C A P. XVI.

De Variolis.

DE Variolarum causa materiali decertatio est non parua : quippe ex Arabum secta omnes, & ex nostris quamplurimi, hoc malum ad reliquias excrementitias sanguinis menstrui, quo infans in utero fuit nutritus, referunt. Aliis hoc impossibile videtur. Cæterum ne tibi cramben recoctam præbere videar, cum hoc argumentum satis superque in meo *de Meteoris Microcosmi* opere tractauerim, ab hoc labore libens supersedeo, præcipue quia à præsentè instituto valde alienæ sunt disceptationes, & controuersię, quas seorsim

seorsim agitare, magis consentaneum est. Vnum duntaxat in mentem reuocabo, Variolas inter morbos cutaneos reponi; quia id quod in iis manifestè se prodit, est cutis fœdatio: nihilominus in dissectionibus, ferè semper reperiuntur viscera, non secus quàm cutem, his tuberculis conspersa, lienem, iecur, pulmones, pancreas, & reliquas interiores sedes hac labe infectas.

Magnum in omni euentu periculum huic malo adest. Si paucae exeant variolæ, diminutæ euacuationis suspicio urget; si multæ, corruptionis: nam tabo suffocatus æger inter fœtores, & dolores vitam finit, & ante mortem morticinium quoddam toto corpore exhibet, vt rectè dicat Fernelius 2. *de abdit. rerum causis*, cap. 12. corpus sic affectum non aliter contabescere, & macie, nigrorèque torrerì, quàm si menses quatuor è furca pependisset. Multi oculis confossis, prorsus occæcati postea viuunt; multis etiam cicatrices indelebiles remanent; aliqui vlceratis intestinis dysenterias grauissimas patiuntur; omnes faucibus, & asperâ arteriâ oppressis rauci fiunt. Principio
febris

febris ingens, coma, delirium, convulsiones, faciei rubor, quo tempore venam secare utilissimum esse, experimento edoctus testor, atque profiteor. Postea secernente naturâ venenum, quoad potest, ad cutem transmittitur. Apparent prius rubræ asperitudines, quæ paulo pòst albescent: tûc si melius habere æger videatur, sanguinis missio non habet locum; sin adhuc plenitudinis notæ persistant, cur omittetur hoc auxilium? num quia timetur ne materia retrocedat? tantùm abest vt futurus sit iste retrocessus, quin potiùs ob naturâ à sarcina exoneratam potentiùs ad externa eiicietur, sed hoc obiter. Fit in corpore veneni coacervatio, quæ longo tempore non offendens latet, postea secernitur aliquibus citiùs, aliis verò tardiùs. Aliqui visi sũt, & mihi vnum videre contigit, qui intra vterum matris hoc malo correptus periit. Alij vix nati eodem laborârunt. Aliis iam pueris, adolescentibus, & quod rarissimum est, etiam senibus, hoc contigit infortunium.

Cùm autem variolarum ad cutem transmissio

transmissio sequestratione veneni fiat, crisis censenda est. Ne tamen in hac crisi coctionem antecedentem expostules : venenum non concoquitur; præualet venenum in hoc malo, & (vt Fernelius bene adnotauit) pauca putredinis in vrinis signa apparent. Estne crisis ad malum? immò ad bonum: nam si æger saluandus est, hac expulsione saluabitur. Quod si natura sub magno symptomatis pondere ingemiscit, nec tantum onus ferre potest; si symptomata, ex halitu, & vapore venenosi ichoris, ita grauiâ sunt, vt occidant; si denique expulsio, quæ à natura sine cognitione fit, (quippe non ducitur intellectu) aliquas partes occupauit, quarum ratione æger periclitatur, hoc non tollit quominus euacuatio sit facta, iuxta naturæ, causam morbificam foras propellentis, institutum.

C A P. XVII.

Comparatio inter Variolas, & Morbillos.

IN aliquibus quidem conueniunt morbilli cum variolis: vt quòd yter-
que

que morbus sit epidemicus, vterque cutaneus, vterque contagiosus, vterque pueris familiaris, vterque magnam febrem habeat adiunctam: maiorem quidem morbilli, vtpote ex materia magis tenui; maligniorem variolæ, quippe ex materia magis veneni participæ. Verùm hoc non tollit morbillis minorem, quàm variolis prauitatem subesse. Epidemicè grassantur etiam morbi salubres, vt catarrhi, præcipuè illi qui Anno 1581. per vniuersam Europam fuerunt peruagati; fuerunt insuper contagiosi, nam morbi etiam suapte naturâ carentes contagio, vt dysenteria, & alij, si epidemici fiant, euadent contagiosi, tribuente illis Cæli dispositione contagij vim. Sunt morbilli morbus infantium, sed non ita communis vt variolæ. Itaque decipi existimo Auicennam 1. 4. tr. 4. cap. 8. qui dum inter hæc duo conuenientias quærit, morbillos facit parum inferiores dignitate, hoc est, malignitate, morbillis: signa bona in morbillis esse ait, cap. sequente, sicut signa salutis variolarum: nam ille qui est velocis processionis, & apparitionis, & maturationis, est saluus.

Sic ille, qui frustra morbillis maturationem tribuit: quippe morbilli non maturantur, sed resolutione evanescent. Decipitur etiam, cum ait, morbillos minus accidere oculis, quam variolas, immo unum ex signis morbillorum, est oculorum rubedo. Maius damnum oculis inferunt variolæ, quia in ulcera convertuntur; nihilominus quamvis uterque affectus in oculis pariter sese prodatur, morbilli magis. Fit insuper morbillus ex materia magis biliosa: ideo ob tenuitatem pungit asperam arteriam, & tussim, siccam excitat, & nares mordicans movet sternutamenta: fit (inquam) ex magis biliosa, sed non putrida, qualis est febris variolarum, quæ plenitudinem simul, & cacochymiam habet comitem. Plenitudo ostenditur in dolore lumborum, & capitis gravitate; cacochymia in vomitu bilioso, & porraceo, in aliisque pravis symptomatibus.

CAP. XVIII.

De Variolarum prauitate.

ADedò maligna est , & pestilenti proxima variolarum materia , vt plena fide testari possim , me in quadam pestilenti constitutione animaduertisse , initio pestis , cùm adhuc malum non se omnino proderet , variolas fuisse peruagatas ; postea , ingrauescente peste , cessasse , quæ tamen in pestis declinatione redierunt , ita vt cùm venenum pestilens adhuc in principio vires non haberet , & in fine iam declinasset , locus esset huic malo , quod pestis quoddam rudimentum appellabo. Hoc Arabes ferè omnes videntur intellexisse , siquidem , inter futuræ pestis præsagia , variolas reponunt : Et iccirco Aui-cenna postquam egit de febre pestilente , statim agit de variolis , & morbillis : de variolis , quia feбри pestilenti sunt proximæ ; de morbillis , propter conuenientiam quam diximus habere cum variolis.

CAP. XIX.

De Puncticulis.

Febbris quædam valde maligna, & aliquantulum contagiosa, quam meritò Fracastorius inter verè pestilentes collocat, secum multoties affert symptoma, vario modo sese prodens, quod ad qualitatem mutatam referunt aliqui; ego verò in excretis toto genere præter naturam repono. Est autem symptoma hoc, macularum prouentus per vniuersam cutem: quas ideò vario modo se prodere dixi, quia nunc in principio morbi, cum ægrotantis malo; nunc in statu, cum utilitate eueniunt. Interdum rubræ, interdum liuidæ, & aliquando ad nigredinem accedentes apparent. Aliquando plurimæ, aliquando pauciores. In lumborum regione, quæ vena amplissima perreptat, maior est earum prouentus. Copiosæ etiam visuntur in thorace, propter exuberantiam caloris; & in brachiis, propter venarum propagines, ut. hinc liceat cognoscere earum materiam è venis transmitti.

transmitti. Harum materiam dicunt aliqui esse vaporem, dixissent melius vaporosam: nam humor quidem est, sed tenuissimus, qui si rubedinem præ se ferat, non valde recedit à forma sanguinis, & subinde non magnam sapit malignitatem; sin liuorem, nigroremve, ut plurimum exitium secum affert.

An morbus sit nouus, certant recentiores. Occasionem dubitandi præbent Græci, qui omnes cutis efflorescentias generali nomine exanthemata appellantes, nullum discernendi vario-
las à morbillis, & vtrumque à puncti-
culis, de quibus agimus, locum reliquere. Scio nouas ægritudines aliquando emerfisse, & alias posse nouiter emergere. Scio insuper hanc febrem anno 1528. per vniuersam Italiam fuisse peruagatam. Aliqui ad Hippocratis historias adeunt, & putant se in iis has maculas reperire: Verumtamen omnes efflorescentiæ, quas antiquissimus Medicinæ pater describit, aut asperitudines esse ait, aut saltem culicum mor-
sibus similes: ut hinc constet, eius fuisse conditionis, ut cutem eleuarent; maculæ verò istæ cutim non eleuant,

neque culicum, sed potius pulicum moribus assimilantur.

Papulæ autem, quas Hippocrates 1. *epid. sect. 2. text. 38.* ait in quadam constitutione apparuisse *parvas*, quæ non essent excernendis morbis, statim evanescentes, magis videntur fuisse variolæ, aut morbilli, quàm puncticulæ: siquidem (ut ille adiungit) *pueros ablaetatos arripiebant.* Silenus autem secundus ægrotus primi libri, *habuit papulas cum sudore rubentes*, sed papulæ istæ erant *varis similes*: vari autem sunt tubercula, quæ pubescentibus in facie oriuntur, vulgò dicuntur *coffi*; hi autem cum puncticulis nihil commune habent. Item 3. *epid. sect. 3. text. 51.* sic scriptum reliquit: *Carbunculi æstate multi, & alia quæ putredo vocantur, papula item magnæ, herpetes multis magni.* Istæ etiam papulæ differunt à puncticulis: nam puncticulæ valde exiguæ sunt; papulas autem illas magnas fuisse narrat. Inepiè quidam *magnas* exponit, hoc est, univèrsam corpus occupantes, quasi inter magnas, & multas, nulla sit differentia. Præterea Galenus ait papulas illas vocari *ἐκθύματα* ab *ἐκθύειν*, quod est *ἐξορμᾶν*

& constare ex humoribus, qui si tenues sint, exulcerationem efficiunt; si crassi, in tumorem pellem attollunt: quorum neutrum puncticulis inest. Tandem asperitudines miliares pruriginosæ, 2. *epid. sect. 3.* non sunt puncticulæ: siquidem hæ neque cutem reddunt asperam, neque pruritus excitant.

Itaque natura, foras humorem à quo molestatur, transmittere satagit, & impetu expulsionis materia ob tenuitatem suam in minimas partes diuiditur, ut cutis hoc tenui humore quasi aspergi videatur: rectè aspergi, dixi, ut significarem hunc humorem tenuem, velut aquam, facile posse in minimas particulas diuidi: sic aliquando ex vaporibus coneretis, miliares sudores videre contingit. Atque hæc est vna ex rationibus, ad demonstrandum materiam puncticularum non esse merum vaporem; nam si esset, in sudorem concreceret, neque humoris à quo eleuatur, tincturam retineret.

Quæres, an liceat apparentibus puncticulis sanguinem mittere? quamuis autem hoc quæsitum ad therapeuticen spectet, ac proinde sit præter hu-

ius libri institutum ; nihilominus non tacebo rudem, & nulla ratione fundatum timorem eorum, qui tunc ab hoc remedio abstinere, cum tantum absit, ut impediatur venæ sectione puncticularum exitus, quin potius adiuuetur, dummodò grauatae naturæ signa adsint : quippe hoc auxilio à sarcina quâ premebatur exonerata, suis commodis potest longè melius incumbere. Sed hoc obiter. Quod verò ad præsentem rem facit, est scire, febrem quæ à recentioribus *purpura* appellatur, in qua maculae, de quibus agimus, apparent, non esse eam, quam Galenus 6. *epid. sect. 1. com. 19.* pemphigodem appellat. Nam in illâ Galenus tubercula admittit, & Thucydidis auctoritate utitur, qui in pestilentia suo ævo grassante, fuisse narrat *corpus subrubrum, liuidum, tuberculis exiguis & ulceribus efflorescens*. Itaque in hodiernis papulis, nulla datur intumescencia. Si autem ad vocabuli etymon attendas, *πίμφιξ pemphix* dicitur bulla, & febris pemphigodes, bullosa. Erat igitur, ut ait Thucydides, in illa peste, corpus *ulceribus efflorescens*, cui consonant Lucretij carmina.

Et simul ulceribus quasi inustis omne rubere

Corpus, ut est per membra sacer cum diditur ignis.

Falluntur igitur Fabius Paulinus in *annotationibus ad Thucydidem*, & Horat. Augenius 2. tom. *suarum epist. lib. 4.* & alij, qui ex antiquorum scriptis elicere volunt, has maculas priscis fuisse cognitae, quod certè non constat, nec constare potest, iuxta vocabulum vniuersale quo vsi sunt, appellantes omnes efflorescentias exanthemata.

C A P. XX.

Abscessus vniuersalis per modum vnius.

SEd iam ad vniuersalem abscessum, qui cõtinuitate est vnus, me confesso, & statim auriginosus sese offert, cui transmissibiliosi humoris ad vniuersam cutim causam præbet. Nec verò omnes eius causas pertractabo, sed solum assumam eam auriginem, quæ febricitantibus accidit, hanc verè vniuersalem abscessum possis appellare.

Porrò si accidat ante septimam diem, *malum* dixit Hippocrates, 4. *aph.* 62. quod decretum neq; Plinius *lib.* 26. c. 12. neq; Auerroës 4. *coll.* c. 43. recipiant. Scimus (inquit Plinius) *vixisse aliquos etiam ab hac desperatione.* Verùm desperationis vocabulo Hippocratem calumniatur: nam magnus Senex non dixit *θάνατος*, id est, lethale, sed *κακόν*, id est, malum; neque verò etiamsi lethale dixisset, adhuc moriendi necessitatem, quam Plinius desperationem appellat, vox illa importaret: quippe, ut Galenus 6. *aph.* 60. adnotavit, *mortale ab Hippocrate dicitur interdum de iis, qui ex necessitate sunt morituri, interdum de iis qui magna ex parte.* Deinde Hippocrates ieteritiam damnat, quæ euenit ante septimum. Plinius Hippocratem dixisse ait, *à septimo*, id est, *post septimum*: quod falsum est: imò verò Medicinæ parens inferiùs 4. *aph.* 64. die septimo, nono, vndecimo, decimoquarto, diebus decretoriis, ieteritiam superuenientem laudat, nî simul dexteri hypochondrij durities, hoc est, nî malus aliquis affectus iecori accidat. Insuper, adeò idem decretorium veneratur, ut etiam

etiam ante septimum, nempe die quarto icteritiam, si cum rigore accidat; commendat 4. *acut.* 81. Quippe febris, quæ à bilioso, & valde mordaci humore fit, morbus est peracutus, & ante septimum, suum decretorium habet. Iudicatio autem in illa die quarta facta per rigorem, ut sit bona, subsequentem expulsionem habere debet; est autem expulsio ad cutem per icteritiam; hoc est, per vniuersalem abscessum.

Quæres, an die quartâ duntaxat icteritia cum rigore sit bona? Erit etiam bona postea, dummodò æger debilis non sit, & febris soluatür. Hoc Hippocrates non negaret: nam tunc boni abscessus conditiones subiret: sed ille hoc solum dixit, quod dubium videri poterat. Dixerat prius icteritiam ante septimum, malum; dicit nunc, posse aliquando ante septimum esse bonum, videlicet si cum rigore fiat, quia subit vicem expulsionis factæ post rigorem: quippe tunc rigor causam solvere dicitur, ex Galeni animaduersione, cum ad rigorem euacuatio aliqua subsequitur.

Cæterum icteritia sine rigore, ante septimum, conditionem habet earum

mutationum, quæ symptomaticæ dicuntur. Quod si icteritiam etiam ante septimum diem euenientem euacuatio aliqua sequatur, æger liberabitur : non quidem quia icteritia tunc temporis ex se est salubris, sed quia subsequens euacuatio liberat à periculo : Quemadmodum parotidibus accidit, quæ alioquin periculosa superueniente alui fluxu, aut copiosa mictione, nihil periculi inuehunt. Itaque iure optimo aphorismus, quem præ manibus habemus, *Icteritia ante septimum, malum, additum* habet in nonnullis codicibus, (ut Galenus fidem facit) *nisi humores alui prodeant* : volentibus his qui hæc adiciunt, per aluum bilem expurgari. Et hoc additamentum, ex eodem Hippocrate est acceptum : etenim accidisse narrat 1. epid. sect. 2. text. 3. *Quibusdam morbum regium sextâ die, verum his purgatio per vesicam, aut aluus turbata profuit, aut larga sanguinis eruptio, velut Heraclides, qui decumbebat apud Aristocyden : nam huic, & ex naribus sanguis erupit, & aluus turbata est, & per vesicam purgatus est, vigesimâ die iudicatus est. Non velut Phamagora. seruus, cui*

nihil

*nihil tale factum est, & mortuus est. Nec solum moriuntur, quibus deest excretio, sed quibus accidit superflua: sic Hermippus multum excreuit, adeò ut viribus vim euacuationis non sustinentibus, obierit. Itaque ut salubris sit icteritia, imò ut sit secura, necesse est ut euacuatio sequatur, quæ nec sit diminuta, nec superflua, sit tamen liberalis; quæ tamen vel sit ἰσόρροτος, vel ἰσόρροτων non valde excedat. Iam patere arbitror, quâ lege possit icteritia esse utilis in omni regione, ut vana sit excusatio, quam Auerroës, magis Hippocratem accusans, quàm excusans, affert, inquiens: *Possibile est quòd viderit interris suis crises venientes per icteritiam ante septimum, esse malas.* Valeat inutilis, imò inanis isthæc excusatio, quâ magnus Hippocrates non indiget: neque enim suis duntaxat Cois, sed vniuersi Orbis habitatoribus communem, & ratione, experimentoque fundatam tradidit Medicinam.*

CAP. XXI.

De palindrome.

Nihil tam horrendum in morbis, quàm τὸ παλινδρομέειν, id est, *palindrome*, siue *recursus*: quando scilicet tam Medico, quàm ægrotō, exacti iam morbi fallax specimen illudit, & portum se tangere arbitranti, maiores aquarum assurgunt montes. Duplīter palindromes vocabulo utitur Hippocrates: aliquando enim recidiuam significat, sed minus propriè, ut cū dicitur in *Coacis*: ὕδρω· ὁπρὸς θεραπείαν· ἰνδιδύς, καὶ παλινδρομέων, ἀνέλπιστο, id est, *hydrops*, qui ad curationem remisit, *recurrens*, *desperatus* est. Quia si aquam hydragogo aliquo medicamento extrahas, venter detumescit, & æger à molestiis, quibus propter inundationem premebatur, veluti in portu, respicit. Nihilominus, si malum recurat, hoc est, reuertatur, recidiua erit, significans causam non fuisse abolitam, eamque tumorem aliquem internum, præcipuè in jecore esse, qui curationem non admittit.

Cæterum,

Cæterùm , præter hanc significatio-
nem, quæ (vt dixi) valde impropria est,
dicitur propriè palindrome , recursus
humoris : & iste adhuc duobus fit mo-
dis, vno minùs proprio, quàm alio: nam
si recurrat ad partem diuersam ab ea;
à qua fluxus cœpit, non ita propria est
palindrome , sicut alia , in qua humor
ad suum fontem recurrit. Omnes ta-
men isti tres modi sunt valde periculo-
si. Primus , quoniam *ἰσχυρότερος* mor-
bus priore deterior est , vel eâ saltem
ratione, quòd ægrum suscipit defatiga-
tum. Secundus , solùm potest esse lau-
dabilis , si materiæ orgasmo quo cor,
aut aliud membrum princeps fuerit
laceffitum , eodem orgasmo materia
recurrat aliorsum. Erit etiam laudabi-
lis , si fiat post damnabilem , ex: gr: si
materia ab abscessu ad cor recurrat,
deinde à corde transmittatur iterum ad
abscessum. Nec verò istam laudabilem
palindromen impossibilem iudicato:
quippe licèt vt plurimùm , interiora
maiores habeant viam ad retinendum,
quàm exteriora ad attrahendum ; ni-
hilominùs materia turgens , vt ad ex-
teriora recurrat , naturam, cui custodia
sanitatis

sanitatis incumbit, habet adiutricem. Alioquin priùs per metastasin, 6. apb. 25. *erysipelas ab internis ad externa, bonum; postea per palindromen, ab externis ad interna, malum.* Quæ sententia vniuersalis quidem est, vt Galenus ibi annotauit, & *erysipelas* pro exemplo affertur: ideò idem Galenus, 1. *prorrh.* sect. 1. com. 1. vniuersali sermone ait: *quæcunque tubercula, aut pustula, ex imo ad cutem enata recurrerunt, grauissima omnium sunt.* Tertius, quia materia recurrens ad suum fontem, (quæ propria palindrome est) reperit ibi phlogosin, & empyreuma, nempe facilem apparatus ad nouum incendium, maiore vi quàm priùs, excitandum. Significare etiam potest, irritum materiæ impetum, quem Galenus 1. *prorrh.* 61. *ôpulus* appellat, & ad communissimum theorema criticorum non decernentium: reduci potest, quasi natura iam valuas sanitatis attingens, à limine reducat. Vt si phreniticus incipiat, parotidibus ortis, mitescere, mox iisdem euanescentibus, ferocior quàm antea, redatur. Quid mirum? humor recutrens prioris fomitis locum reperit adhuc intemperie

intemperie imbecillitatēque laborantem. Ita quibuscunque resurgentibus ex morbis, siquid laboravit, hic sunt abscessus. Si qua pars corporis antea laboravit, ibi morbus firmatur, 4. apb. 32. 33.

Dupliciter potest tumor præter naturam evanescere: vel resolutione, si concurrant omnes resolutionis causæ; humoris tenuitas, partis raritas, circumfusi aëris calor, admoti medicamenti potentia. Vel per palindromen, hoc est, recursum ad interna: & hoc accidit, vel propter materiæ orgasmon, irrequietamque naturam, ut si sanguis sit, ad vasa magna; si bilis, ad partes supernas; si pituita, ad ventrem, & primariam regionem: Vel sequens inclinationem naturæ: sunt enim aliqui, quibus facile ad ventriculum confluxus sunt, alij quibus ad caput, alij ad cor, mulierumque nonnullæ quibus facile ad vterum materia vertitur: vel etiam ob astrorum directiones, quæ magis hoc, quam illud respiciunt membrum. Non solum palindrome fit ex abscessu per decubitus, sed etiam ex abscessu per effluxum: qui enim aëri se exposuit sudans, retrocessu materiæ occisus est; qui etiam alui

alui fluxu sanabatur, si fluxus destitit, recurrente materiâ perit; cui etiam pleuritico materia per sputum cœperat euacuari, palindrome factâ, nova pleuritis fuit excitata; & in *Coacis*, *suppressa intempestivè dysenteria* palindromen facit, scilicet recurrente materiâ: quæ si sit *αἱματώδης*, sanguinea, magis recurrit ad viscera: quia hepar vicinum, venæ cavæ situs, & distributio, & partium respirationi inserviētium peculiaris infirmitas id facit: *χολώδης*, biliosa; ad articulos. Quamvis enim bilis, suapte naturâ sursum ferri soleat, propter calorem, & substantiæ tenuitatem; tamen propter acrimoniam, ab omnibus partibus, præsertim nobilibus reiecta, quàm longissimè fieri potest, propellitur, ac tandem, ubi viscera robusta sunt, in imbecillioribus articulis firmatur, ad quos, propter tenuitatem, facile penetrat, cum etiam pituitosis, crassisque humoribus eò decumbentibus, misceri, quasi pro vehiculo, soleat.

Fit etiam palindrome ex suppressis hæmorrhoidibus, ut habetur in 6. *aph.* 12. Palindromen etiam patiebatur ille,

ille, cui (vt narrat Hippocrates lib. de humoribus, in fine) intestinum in dextra parte dolebat, & ubi articulari morbo correptus est, quietior erat; postquam autem hic curatus fuit, magis dolebat. Galenus existimat id euenisse, quoniam duobus doloribus non eundem locum infestantibus, maior minorem obscurat, 2. aph. 46. Sed non recipienda est isthæc interpretatio: nam quorsum Hippoc. id quod commune est omnibus doloribus, in vno particulari, tanquam rem admirabilem narrasset? Adiungit idem Galen. forsan auctorem loqui de cæci intestini dolore: sed cur de aliis non loquitur? nonne potest ex omnibus, per venulas, & obscuros meatus materia transmitti? Num quia materia erat crassa? at poterat esse tenuis; quippe colicus dolor, etiam ex causa tenui fit: & præterea materia crassa, tum agitatione, tum medicamentis calidis tenuior redditur. Imò crassa etiam materia transsudat à venis in arterias, vt admittit idem *de plenit. cap. 11*. Immo ergo transmutationem istam ab arthritide in colicum dolorem, appellat ænigma, indignum vt eius explicatione

tione defatigetur.

Demum non solum facti iam abscessus, cum periculo recurrunt, & multoties cum pernicie, verum etiam ea signa, quæ *ἀντίσημα* appellantur, quasi febrem rependant, eique opponantur. Quicquid ergo futurum abscessum, qui tamen non sequatur, significat, palindromes suspicionem affert: ideo in *Coacis* Hippocrates inquit: *quæ signa abscessum enunciant, si abscessus non sequatur, malignum*: non dixit malum, nec mortale, sed *malignum*, insinuans pravi moris esse, viæ semel inceptæ non insistere; quod etiam imbecillitati potest aliquando attribui: verum neque sic quidem minus est malum. Signa autem futuri abscessus superius diximus, præcipuum tamen semper est dolor. Is cum in aliqua parte valde urget, iam ibi materiam adesse ostendit, quæ licet manifestum abscessum non extollat, nihilominus continuum solvit, aut saltem grauem inducit intemperiem, aliter non doleret. Quando verò dolor repente cessat, quid aliud indicat quàm metastasin materiæ in alium locum? Dixi repente, nam si resolutione

resolutione evanescat, sensim id fiet. Porro Larissæ Caluus 3. *epid. sect. 3. agr. 5. cui dextrum femur doluit repente*, poterat ex dolore, futurum in dextro femore abscessum coniectare: *tertio femur dolere desit*, quid inde accidit? nempe, recurren- te materia ad cerebrum, & cor, (potius ad os ventriculi, quod veteres cor nominabant) *mentis alienatio*, & *turbatio*, multumque sese iactavit, quarto ad meridiem perit. Potest tamen, (vt suprâ dictum est) ad hunc recursum materiæ à parte in qua dolor erat, ad partem nobiliorem, sequi iterum recursus à parte ista nobiliore ad externam, siue per decubitum, siue per effluxum. Per decubitum, vt si Caluo mentis alienatione laboranti accidissent parotides. Per effluxum, vt si contigisset aluum solui, aut urinam copiosam mingi, aut sudores excitari, aut sanguinem è naribus fluere. Hoc dixisse volui, vt Medicus generosus addiscat, non esse in materia valde mobili, & irrequieta desperandum, sed instandum, & pro viribus innitendum, si forsam ad palindromen perniciosam, palindrome utilis consequi valeat. Interim

terim tamen ab Hippocrate. 3. prorrh.
75. accipe, dolores absque indicatione so-
lutos, inutiles esse: dixit inutiles, quia nun-
quam possunt esse boni. Sed vel mor-
tem, si prava signa adsint; vel si desint,
diuturnitatem secum afferent.



STEPHANI



STEPHANI
RODERICI
CASTRENSIS

LVSITANI,

QVÆ EX QVIBVS.
LIBER QVARTVS.

CAPVT. I.

*Quæ mala supra mala necessariò
eueniunt.*



ORBI, quos morbis
aduenire hætenus dixi-
mus, ita accidunt, ut pos-
sint non accidere: quip-
pe priore morbo manẽ-
te, alterius superuentus, quem epige-
nesin appellauimus, & vnus in alte-
rum

rum mutatio, quæ dicitur metastasis, & omnis abscessuum turba, non habent infallibilem euentum, sed quibusdam adueniunt, aliis verò non. Sunt autem præter hos, alij, qui necessario dicuntur euenire, *necessitate*, vel simpliciter, vel ex hypothesi. Simpliciter voco, si ita adesse debeant vt impediri nequeant, vt 7. *aph.* 58. *quibus cerebrum concussum est, necesse est mutos fieri.* Hoc autem contingit, vel quia concussione cerebrum ab vna parte in aliam distrahitur, ita vt partes circumvicinæ dirumpantur, & in hoc casu patiens restituitur: vel quia concussum cerebrum dirumpitur, & conuellitur, & tunc desperata res est: quippe tunc cerebrum in propria substantia continui solutionem patitur, quæ sanari nequit. Dolor autem à concussione non percipitur: quoniam facultas sentiens perditur.

Alterum exemplum habes 6. *aph.* 50. *quibuscunque præciditur cerebrum, in necesse est febrem, & bilis vomitum superuenire.* Quod intellige dictum de vulnere, tum cerebri, tum membranarum eius. Nam membri principalis inflammatio

flaminatio febrem habet comitem. Fit etiam in vulnere illarum partium maximo, ex quo bilis, quæ omnium humorum tenuissima & leuissima est, commota & agitata, ad ventriculum fluit, & ad os ventriculi refluit, vnde facile reicitur. Additur in *Coacis*: *Neceſſe etiam eſſe in cerebri vulnere, partem aliquam corporis ſyderatam fieri, hoc eſt, reſolutam*: Reſolutio autem fit in ea parte, quæ vulneratæ parti reſpondet: fit etiam in parte oppoſita. Contingit etiam pro reſolutione convulſio, aut eiſdem, aut oppoſitæ partis, cuius rei cauſas exactè mihi videtur rimatus Andr. Laur. in *q. anat. l. 10. q. 5. & 6.*

Exemplum neceſſarij ex hypotheſi, habetur 6. *aph. 58. ſi omentum excidat, neceſſariò putreſcit.* Hoc eſt, ſi pinguedo illa, quæ dicitur omentum, vulnerato epigaſtrio, per aperturam vulneris, extra peritonæon exierit, neceſſariò putreſcit, nempe ex hypotheſi, niſi ſtatim fuerit reductum: nam hæc pinguedo extrà prominens breui temporis ſpatio putreſcit; ſi verò breue illud ſpatium præuenias, liberabitur à putredine.

Exemplum aliud tibi proponam, in quo necessarium utroque modo reperio: Videlicet, si nervus dissectus fuerit, convulsionem facit, & necesse est ut dissectus neque coalescat, & fortiter inflammetur. Nervus dissectus, nempe non totus, nec in directum, sed pars eius in transuersum, propter acutissimum sensum quo pollet, dolorem infert acerbissimum, ex continui solutione: hoc quidem simpliciter necessarium est; ut similiter est simpliciter necessaria ad vulnus cum dolore, inflammatio. Cæterum fortis inflammatio, & convulsio, propter multos ichores attractos, quibus nervus repletur, & in latitudinem augetur, in longitudinem decurtatur: hæc (inquam) duo ita necessaria sunt, ut possint Medici industriâ, præcautionis beneficio evitari. Plura exempla studiosus reperiet, hæc tamen sufficiant ad præsentis doctrinæ explanationem. Vnum duntaxat libet advertere, Hippocratem inter morbos, qui necessario morbis adveniunt, reponere febrem, quæ superuenit rigori: quia scilicet rigorem sine febre antiqui non cognouerant, quod Galenus de temp.

rig. palpit. c. 7. refert ad illius temporis
 frugalitatem: *Ne mireris*, (inquit ille)
si apud veteres Medicos scriptum inue-
nias, febrim, comitari necessario rigores,
 qui sine frigore obveniunt externo, ex ipsa
 corporis dispositione prodeuntes. Nihil
 enim tale veteribus, nec balneis tot post
 cibum, nec vitâ otiosâ videntibus, accidit.
 Hoc autem tempore ambo hæc frequenti in
 usu habita, etiam rigorem hunc, qui quòd
 excalfieri nequeat, irrendiquant & appella-
 tur, excitant, nouum quoddam & peregrin-
 um symptoma, propter victus nouitatis
 rationem. *autolololoq. flonon loup. lóí*
lloq. nomat mío, mureloque. luy. lóí
 2: *mubila* **CAP. II.** *ad mab*
muf. l. mabibio. omila. omomimq.
Qua mala supra mala consultiò
eueniunt.

Naturam consultiò operari dici-
 mus: quoties sui compos est, &
 circa morbos, ea quæ agenda sunt, ac
 si iudicio regetur, agit: consultiò
 enim aliquid fieri, & iudicatò, idem
 est; iudicatò autem fit, quicquid criticè:
 inde enim criscòs nomen est acceptum;
 nam cum quispiam vulgaris perturba-

tionem, quam æger in die contemptabili pateretur, adesset, iudicium de ægro-
tantis vita fieri exclamavit: similitu-
dine ductâ à forensibus causis. Igitur
consultò fit, quicquid fit ad bonum:
quippe natura, cum sui compos est,
consultò agit. Fieri etiam aliquo mo-
do dicemus aliquid consultò ad ma-
lum, non quod iudicatò fiat, sed quod
non fiat fortuitò: multa enim sunt,
quæ ex priuatione sui oppositi deno-
minationem suscipiunt. Dicimus v. g.
mare quietum, non quod quietum sit,
sed quod non est procellosum: simili-
ter ver temperatum, cum tamen cali-
dum sit, sed non valde calidum: &
permittente aliquo quidpiam factum
existimamus, quia fit eodem non re-
nuente; unde receptum est apud Iuris-
peritos, *qui tacet, consentire videtur*. Eo-
dem modo crisis præva, quæ ex prævis
signis in die indicatorio fuit præsigni-
ficata, & in indicatorio fuit facta, di-
cetur facta consultò: non quod natu-
ræ consilio, sed quod non fortuitò, sed
ex suis causis præcognitis fiat. Neque
verò aliquid consultò in morbis fa-
ctum dixerim, nisi quod est criticum:
si est

si est ad bonum, sit naturæ consilio; si ad malum, morbi victoriâ.

C A P. III.

*Quæ mala supra mala fortuito
eueniunt.*

FORTUITO aliquid fieri dicimus, cum aliter ac sperabatur accidit, siue à natura, siue à Medico, siue quomodo-
cunque aliter id fiat. Fortuiti isti euen-
tûs, alij sunt ad bonum, alij ad malum.
Vis scire quomodo in naturæ operi-
bus possit casus iuuare? considera mu-
lierem vomitu sanguinis laborare, cui
si contingant menstrua, sanguineus
vomitus cessabit, iuxta *aph. 32. lib. 5.*
Considera rursus mulierem, cui men-
strua deficiebant, cui si diarthoea, aut
dysenteria superueniat, huic, ex magno
ad egerendum conatu, menstrua pro-
fluent. Casus etiam sanitatem offert,
vt accidit illi, qui referente Marcello
Donato, in tempore sagittâ fuerat vul-
neratus, & post quintum annum, dum
frigidâ per æstatem os collueret, innu-
meris sternutamentis concitatis, fru-

stium sagittæ digiti mediij longitudine, acie ferreâ, per nares eiecit. Similiter fuerunt aliqui, quorum historias reperies apud Pareum in *introductione ad Chirurgiam compendiarium*, cap. 23. qui in fluvium prolapsi à quartana convalescerunt. Sicut & phreneticus, qui per fenestras se præcipitem dedit, ac subito resipuit; & melancholicus, qui ut Gordonius scribit, vulneratus fuit in capite usque ad cranij fracturam, & quamdiu vulnus fuit apertum, tamdiu mentis dilucida habuit intervalla; clauso autem vulnere melancholia rediit.

Fit etiam euentus fortuitus ad malum, ut si quando in pleuritide, in qua tussis opportuna est, ut materia nocens expellatur, nihilominus tussiendo vena in thorace rumpatur, & ita ex bona causa præius sequitur effectus. Vel etiam, si natura per hæmorrhagiam è naribus velit ardentem febrem solvere, & tunc pars sanguinis viam narium relinquens, ad palatum conuertatur, & vel suâ multitudine suffocet, vel ad pulmones descendens suppurationi, ac tandem phthisi occasionem præbeat.

Medicus similiter ad bonum & ad
malum

malum fortuitò agit, ita vt vnum intendens, aliud longè diuersum, aut potius contrarium eueniat, vt possit illud Horatianum dici,

— amphora cœpit

Institui, currente rotâ cur vrceus exit?

Ad bonum, vt si pharmaco purgante mulieri exhibito, egerendi vi, menstrua, quæ antea delitescébant, appareant. *Ad malum*, vt si dum pharmacum per inferiora purgans exhibes, vomitum prorites, à quo vena in thorace rumpatur; aut si in febre intermittente, exhibito medicamento purgante, materiæ portione ad venas tractâ, reddatur continua; aut si ex simplice tertiana, deductâ parte materiæ in alium focum, fiat duplex; aut si bilis, in causione, pharmaco educta, vias per quas transit, hoc est, intestina exulceret, & dysenteriam efficiat. Idcirco sapienter, vt solet, Hippocrates, *qua per fortuitum successum Medici agros curantes faciunt*, iubet considerare.

CAP. IV.

*Anticeat Medico sterilitatem
inducere.*

NON est vna duntaxat huius quæ-
siti ratio, sed plures. Vniuersale
tamen præceptum, ante omnia mente
tenendum est, ex D. Paulo, *epist. ad Ro-
man. c. 3. non sunt facienda mala, vt eue-
niant bona*, quod etiam iis, quæ inferius
sunt inquirenda, inseruiet. Cæterum
prius se offert mulier, foecunda quidem,
sed quæ ne adulterium, quod absente
marito vult committere, innotescat,
concupiendi in vtero facultati libenter
renunciabit. Medicum consulit, auxi-
lium, vt ab ingravidatione præserue-
tur, expostulat, mercedem liberalissime
offert. Quis iam erit auarissimus ille
Medicus, & propriæ conscientiæ pro-
digus, qui huic nefariæ prauitati, se ad-
iutorem, immò auctorem præbeat?
Deinde offeratur alia mulier, quæ iam
semel, aut pluries in partu est pericli-
tata, nec iam ampliùs hoc discrimen
subire vult, sterilitatem cupit, remedia
quærit.

quærit. Huic etiam ea denegabo: nam possibile est, ut aut mutatione ætatis, aut præcedentium partuum crebritate, uterus, pariendi tempore, magis lubricus fiat, & impedimenta cessent, quæ partum difficilem reddebant. Si verò hac spe non acquiescat, melius est ut eam timore à concubitu cessare, quàm sterilitatis remedia quærere, persuadeat.

Tertiò, alia erit, quæ ob vitium conformationis, vel alium affectum præternaturam, si grauida fiat, non potest, absque manifesto vitæ periculo foetum vsque ad maturitatis tempus gestare, num huic sterilitas inducenda est? Aui-cenna 2. 1. tract. 2. cap. 17. audacter assentitur: inquit enim: *Medico quandoque necessarium est, prohibere imprægnationem, in parua, super quam time-tur de partu; & in ea in cuius matrice est egritudo, & in ea in cuius vesica est de-bilitas: videlicet in parua, quæ in tene-ra adhuc ætate constituta est, ut timor sit ne in partu succumbat.* Narrat Ari-stoteles 7. polit. cap. 16. mulieres Træ-zomenum sæpe sub partu occubuisse, quodd tenellæ nimis conceperant, & ad-jungit: *Est autem adolescentium consun-*

Etio improba, ad filiorum procreationem;
 in cunctis enim animalibus iuueniles par-
 tūs imperfecti sunt, & fœmina crebrius
 quàm mares, & parui corporis gignuntur:
 quocirca necesse est, hoc idem in homini-
 bus provenire. Huius autem coniectura
 fuerit, quòd in quibus civitatibus consue-
 tudo est, adolescentes mares, puellasque
 coniugari, in iisdem inutilia, ac pusilla
 hominum corpora existunt; in parum quo-
 que laborant magis puella, ac pereunt plu-
 res. Forsitan etiam Auicenna dixit in
 parua, hoc est, in muliere, quæ exiguam
 obtinet molem corporis: nam hæc
 non habet amplitudinem meatus ute-
 ri, respondentem uteri capacitati. Dein-
 de in ea, in cuius matrice est agritudo:
 quippe potest esse agritudo, siue sit vl-
 cus, siue tuberculum, siue aliud quid-
 piam, in ea matricis parte, quæ conce-
 ptionem non impediat, attamen ge-
 stationis, & magis parturitionis tem-
 pore acerbissimos concitet dolores,
 quibus tolerandis vires non sufficiant.
 Tandem, & in cuius vesica est debilitas:
 quia scilicet foetus suo pòdere vesicam
 aliàs debilem distrumpens, interitui oc-
 casionem præstabit. Aëtius, tetrab. 4.
 serm. 4.

serui. 4. cap. 16. paulò aliter quàm Auicenna; tres periculi causas in parturiendo enumerat, cuius verba sunt: Quadam mulieres etiamsi concipiant, in partu tamen periclitantur, siue ob uteri paruitatem, ut ob id foetum perficere non possit; siue ob colli eiusdem angustiam, siue quòd tuberculum, aut tale quiddam in eiusdem ostio exortum est, quod partum impedit. Et propter hæc tria, non veretur statim sese accingere ad impediendum conceptum; & ulterius progrediens, si mulier concepit, ad corrumpendum foetum. Verùm de corruptione foetus inferius est dicendum; de sterilitate procurandâ nunc dicam.

Medicamenta, quæ tum Aëtius, tum Auicenna describunt, quoniam è directo conceptionem impediunt, non videntur sine impietatis nota posse à Medico in usum trahi. Dices forsan, nò tam impietatem esse, mulieri sterilitatem inducere, quàm pietatem, eisdem, ne in mortis periculum incidat, præcauere. Profectò si præcauere possem, sanando ea mala, quæ futurum partum periculosum efficiunt, id libenter agerem. Verùm in-

curabilia sunt, inquit. Ac ego tunc quæram, an aliâ viâ possit mulier periculum effugere, ne cogar ad medicamenta sterilitatem inducentia manum mittere. Potest quidem. Sed quam viâ? nempe abstinendo à concubitu. Instabis, concubitus non esse factum duntaxat ad sobolem procreandam, sed etiam ad extinguendum libidinis æstum. Marito licitum est cum vxore sterili (siue sterilis sit à morbo, siue ab ætate) coire, ne impellente veneris stimulo scortator fieri cogatur. Mulieri etiam, ex Diui Pauli decreto, *i. ad Corinth. cap. 7. melius est nubere, quam viri.* Quapropter cessante spe suscipiendæ prolis, non adhuc cessat coniugij necessitas: Esto, coëat vir cum vxore, quam scit sterilem esse, vel quam nouit ultra parturiendi ætatem esse constitutam; neque curabo an eam iuuenem acceperit, an vetulam: vnum duntaxat considerabo, nempe hunc concubitus nullam naturæ violentiam inferre, quæ tamen, remediis: foecunditati aduersantibus, infertur. Itaque Medicus naturæ minister, & adiutor, nihil magis effugere debet, quam vt eiusdem fiat inimicus,

& destructor. Ne tamen in me prouerbium iactetur, *ne sutor ultra crepidam*, non licet hîc ampliùs theologizare; neque etiam mulieres steriles, quas miraculo concepisse sacra pagina narrat, in exemplum sunt trahendæ, sed aliæ potiùs quæ fœcundæ fieri possunt, diligenter adiuuandæ, ad quod munus utrùm valeant mandragoræ, quas Rachel sumpsisse fertur, non est hîc locus disputandi.

C A P. V.

De sterilitate, quæ venarum sectione inducitur.

CUm de sterilitate, quam Medicus suis auxiliis inducere prohibetur, agerem, venit mihi in mentem aliquarum venarum sectio, quæ si infœcunditatis suspicionem inicit, non est temerè tentanda. Inualuit inter mulieres opinio, ex sectione venarum pedum reddi fœminas steriles: quod fortan ex Hippocratis doctrina, in libello *de locis in homine*, non sat bene intellectâ originem habet, siquidem ve-

nae causæ processum describens, adiungit: *Disperditiones in femoribus facit, & ad tibias intus fertur in malleolos. Ha infœcundum faciunt hominem, cum fuerint sectæ, & in magnos digitos desinunt.*

Animaduertere tamen oportet, prius ab Hippocrate esse dictum, *aliæ duæ venæ à vertice iuxta aures; deinde harum duarum venarum diuarcationes per collum ad septum transfusum, inde ad inguina, & femur, tibias, & malleolos, tanquam per parenthesin esse positas: vt rursus venis, quæ sunt iuxta aures, adiungat, hæ infœcundum faciunt hominem, cum fuerint sectæ.* Poterit tamen aliquis existimare, non inanem esse mulierularum opinionem, siquidem venæ istæ, quæ in talo, aut iuxta magnos digitos secantur, magnum habent cum membris genitalibus consortium: & in mulieribus quidem, ab utero euacuant; in hominibus, etiam ab illis partibus quæ generationi inserviunt. Vnde magnis pedum digitis Constantinus Africanus, & alij, emplastra aduersus sterilitatem applicant. Hoc de frequenti sanguinis missione si intelligas, non leui duceris fundamento:

fundamento : refrigerantur namque membra genitalia crebrâ sanguinis extractione; si verò rarò, & urgente necessitate id fiat, nihil timendum, immò sperandum est, vt sanguinis missione partes illæ contemperentur, & expurgentur, quod experimento est comper-
tum.

Certissimum verò est, Hippocratem non de venis pedum loqui, sed de iis quæ sunt pone aures. Quamuis autem sint eædem, nihilominus ex diuersitate locorum diuersas habent conditiones; nam iuxta aures possunt spirituum, aut seminalis materiæ influxum, si secentur, prohibere; quem non prohibent sectæ in malleolis. Sed an hæc sit causa, cur infœcundum hominem reddant, an quælibet alia, diligenter inquirendum est.

Hippocrates tum in *libello de locis in homine*, tum in *libello de aëre, aquis, & locis*, rem ita se habere affirmat, vt scilicet harum venarum sectio infœcunditatem pariat: Rationem verò cur id fiat, nullam assignat. At in *libello de genitura*, cur ita accadat, scriptum reliquit his verbis: *Quibuscunque verò*

iuxta

*iuxta aures vena secta sunt; hi coeunt
 quidem, & genituram emittunt, verum
 modicam, & debilem, & infœcundam.
 Nam plurima genitura pars à capite
 iuxta aures, in spinalem medullam proce-
 dit; ipse autem transitus, cicatrice sectioni
 inductâ, consolidatus est. Cum tamen
 hæc ratio pro hypothese habeat, semen
 à capite, siue à toto corpore diffundi:
 Avicenna qui similitudinem filiorum
 ad patres, ad descensum seminis ex om-
 nibus & singulis corporis partibus re-
 fert, eam amplectatur. Gentilis, qui li-
 cèt descensum seminis neget, conflu-
 xum tamen spirituum à toto admittit,
 eidem inhæret rationi: licèt enim, in-
 quit ille, semen non concurrat ex toto cor-
 pore ad generationem, nihilominus à qua-
 libet membro præcipuo accipit spiritum
 peculiarem, & ex multis spiritibus fit
 unus genitiuus, neque aliter posset fieri
 assimilatio filiorum ad parentes. Quia
 verò ex sectione venarum, quæ sunt post
 aures, deficit spiritus animalis, qui non
 potest descendere, hinc fit ut semen non
 habeat requisitam materiam ad spiritum
 genitiuum, & ex consequenti, non sit fœ-
 cundum.*

Parum ab hac Gentilis sententia, recedit Cardanus, à quo Septalius est mutuatus: sentit enim materiam seminis, & spiritus ad generationem aptos, quæ duo cerebrum suppeditat, impediri factâ cicatrice. Nam licet hæ cicatrice non impediatur fluxus materiæ seminalis à cerebro ad spinalem medullam, quæ cerebro contigua est; tamen per spinalem medullam, ob frigiditatem, minor copia spirituum deferretur, & idèò semen fit infœcundum. Postularet præsens occasio, ut ageretur quæstio, utrum semen excidat à toto: cæterum, ne omnia ubique repantur, supponito nec semen decidere ab uniuerso corpore, (quamuis id Polybius potius quam Hippocrates asseruerit) nec necessariam esse spirituum omnium congregationem, ut unus fiat spiritus genitiuus. Præterea licet cerebrum nihil omnino mitteret, non iccirco magis deficeret seminis materia, quam amputato brachio, aut crure. Quod si ex coitu magis caput, quam reliqua membra, debilitatur, id accidere dicendum est, tum quia cerebrum est exanguis, & magis sentit ex sanguinis defectu

defectu noxam; tum quia pars est extrema, & non habet aliam à qua, secundum indigentiam, trahat; tum denique quoniam in cerebro multi necessarij sunt spiritus, ad cōgitationes, & reliquas animales functiones obeundas; quapropter læditur ex quolibet spirituum defectu.

Vallesius existimat cerebrum refrigerari, quia obductâ cicatrice impeditur ascensus spirituum vitalium à corde, ex quibus fit spiritus animalis; cerebro autem debili existente, vniuersi corporis vires enervantur: propterea, sicut cerebrum spiritu vitali priuatur, ita semen animali, & subinde infœcundum redditur. Verùm probare debuerat, fieri spirituum vitalium ascensum per has venas; forsitan non venas, sed arterias esse, quæ secantur, existimauit, quod in Hippocratis doctrina discernere est impossibile: siquidem venarum nomine arterias comprehendit. Ita est, sed cum, in *libello de locis in homine*, de venarum diuicationibus, quæ venæ cavae inseruntur, agat, non potest non de venis intelligi: quippe arteriæ alterius sunt consortij. Addit alteram

rationem.

rationem idem Vallesius, quasi priori non acquieverit: dicitque fortasse simul cum venis illis præscindi nervulū, quem Vesalius se in multis vidisse affirmat, descendentem à sexta conjugatione ad vasa feminalia. Cæterum dum ignoramus, quem usum nervulus iste præstet ad coitum, ratio hæc non est admittenda, præcipuè quoniam id quod in multis Vesalius vidit, videtur non vidisse in omnibus, ac proinde non potest vniuersali rationi præstare fundamentum. Tandem tanquam necessarium supponit, id quod fortuitò, & ex errore fit, nempe nervuli sectionem, quando vena secatur.

Andreas Laurentius non admittit, ex harum venarum sectione sequi infœcunditatem: quippe hæ venæ externæ sunt, adsunt autem interna vasa insigniora, per foramina cranij ad cerebrum excurrentia: & quamvis per externas venas (ait ille) ferretur semen, adhuc cicatrix obducta non impediret semini transitum: si enim sanguis crassior, per hæc vasa fluit ac refluit, cur semen spiritibus turgens eadem via non penetrabit? Externas,

nas, has venas esse contendit, non tamen id ex anatomia probat; nec Vesalium refellit, qui harum venarum descriptionem prosequutus, eas ad interna penetrare affirmat. Ceterum licet cicatrix non omnino impediat seminis spirituumve transitum, possunt Laurentio aduersarij respondere, satis esse, quod aliqua pars duntaxat impediatur: siquidem, ut inquit Hippocrates in *libello de genitura*, qui sectas habent has venas, coeunt quidem, sed modicam, debilem, & infœcundam genituram emittunt. Cum ergo non priuentur omnino coeundi potentia, non omnino impeditus debet esse transitus. Poterit tamen aliquis adhuc obistere, Hippocratem non de infœcunditate sola, sed de impotentia agere: siquidem in *libello de aëre, aquis, & locis*, ex sectione harum venarum, Scythas ait cum vxoribus coire non posse. Fateor, sed Scythæ non solum venas secabant, verum sanguinis profusione sese omnino refrigerabant, adeo ut præ spirituum inopia obdormiscerent, & postea resurgentes impotentiam ad coitum sentiebant.

Cum verò Andreas Laurentius neget hanc sectionem esse infœcunditatis causã, alias querit, cur Scythę sint infœcundi, & tres elicit ex Hippocrate: prima est frequens equitatio, altera ischiaticus dolor, tertia sanguinis profusio. Has ego omnes admitto, immò, & plures alias. Et quod attinet ad priorem, licet Aristoteles *sc. Et. 4. prob. 12.* eos qui equitant, libidinosiores euadere affirmet, ad moderatam equitationem id retulisse censendus est; Scythę verò continuo equitatu lassantur, quod ex eodem libello addisces, ex lassitudine autem, maxime circa genitalia, gonorrhœa ut plurimum procedit, sic Aristoteles *5. probl. 31.* de lassatis, inquit semen per somnum effluere. Paulus etiam *lib. 1. cap. 35.* lassitudinem vnã causam esse docet abolendę Veneris. Altera causa, coxendicũs nimirum dolor, infœcunditatem potest efficere, quia, ut ait Laurentius, nihil æquẽ ac dolor corpus infirmit, & humores corrumpit. Adde tu aliam rationem, videlicet eundem dolorem mûsculos, & neruos femoris, coxarũque, genitalia attingere, & posse inter

ter hæc consensum dari, unde, vt constat ex sacra pagina, Gen. 24. & 47. pactum; aut iusiurandum fiebat, manu femori impositâ, quia ibi generandi vis adest.

Tertia, nempe sanguinis nimia profusio, corpus relinquit exangue, & præ inopiâ spirituum, debile, ac impotens ad coitum; quod si impotens; certè & infœcundum. Hæc omnia ita se habent: quibus poteris adiungere quartam causam; hoc est, braccas strictas quibus vtuntur; hæ enim, vt equitationi sunt accommodæ, ita generandi muneri nocuæ, quippe genitalia his compressa, nec augentur, nec nutriuntur, ac subinde atrophîâ laborant.

Verùm quàmuis ob has causas Scythæ sint ad coitum inepti, addidit nihilominus Hippocrates venarum post aures sectionem. Siquidem narrat, eos à frequenti equitatione, coxendicos pati dolores; tunc adiungit: *medicantur autem sibi ipsis hoc modo*; à principio morbi utraque venam retrò aures incidunt; quo factò, sanguine multo promanante, somnus eos corripit præ imbecillitate, sicque

sicque obdormiscunt, quorum quidem aliqui depulso somno sani exurgunt, aliqui verò minime. Atque mihi sanè videntur, eâ medicatione seipsos perdere; bene enim retrò aures sunt, quas si quis secet, sterilitatem inferet iis quibus secantur: quare id etiam ipsis ex earum incisione accidere certum est. Ex his colliges, venarum post aures incisionem, iuxta Hippocratis doctrinam, esse causam sterilitatis: hoc autem omnibus in uniuersum commune erit; Scythiis autem, qui ex eadem sectione sanguinem multum profundeabant, non solùm sterilitatem, sed impotentiam etiam acquirere, peculiare erat. Præterea, cum & in libro de genitura, & in libro de locis in homine, nullâ Scythiarum mentione factâ, venas quæ post aures sunt, sectas sterilitatem inducere, scriptum sit, non est cur Laurentius infœcunditatem ad solam equitationem, coxendicum dolorem, sanguinisque fluxum referat, sed Hippocrati assentiatur, ex hac sectione infœcunditatem agnoscenti, alias si hominem proli incumbentem hac sectione perderet, non impunè id faceret.

Neque verò Galenus aduersatur, ut ei Auicenna imponit, qui 4.1. *doctr.* 5. cap. 20. & 24. 3. *tract.* 1. c. 3. aliquando Galenum id negasse, aliquando ancipitem fuisse, scriptum reliquit: nulloibi quidem Galenus, venarum post aures sectione sterilem hominem reddi, aut admittit, aut negat. Suspiciatur cum Cardano, Septalius, forsitan hoc scriptum à Galeno in *commentario ad libellum de locis in homine*, quem in *catalogo de libris propriis* commemorat, ad nos tamen non peruenit. Sed quis affirmabit, Auicennam hunc commentarium vidisse? forsitan idem Auicenna Galeni verbis fuit seductus, quæ ita habent 6. *epid.* sect. 5. *com.* 22. *non tamen de secunda vena præceptum verum esse mihi persuadeo*; est autem præceptum, *cum adsunt cedmata, vena in auribus posteriores scindenda sunt*. Vocat Hippocrates *cedmata*, fluxiones in crura decumbentes, in quatum curatione sectionem venarum post aures non probat Galenus. Hoc autem quid commune habet cum infœcunditate, quam eandem sectionem inducere, ab Hippocrate alibi dicitur? Ex his colliges, fatue

fatuè Augenum *de sanguinis miss. lib. 9. cap. 9.* Auicennæ non acquieuisse, & Galenum rectè sentire dixisse, & ab Hippocrate discessisse, & infœcunditatem ab hac sectione fieri negasse, nullâ aliâ permotum ratione, nisi quia experienciâ constat, nihil eiusmodi contingere. Sed quisnam, precor, hoc expertus est? testes illè in re magna, qualis est aduersatio magno Seni, adducere debuerat.

Existimo ergo, veram esse doctrinam Hippocratis, & venarum post aures sectione, infœcunditatem induci, cuius rei nullam aliam causam esse crediderim, quàm cerebri imbecillitatem ab hac sectione contractam: quippe non superfluente in cerebro nutrimento, propter cicatricem, harum venarum, transitum sanguinis impediens, debilitas oritur; semper autem cerebri debilitas, siue ab hac, siue ab aliâ quavis causâ procedat, nervosum, musculosumque genus debilitat, & spirituum animalium paupertatem inducit. Quapropter, & penis erectio valde pigra & imbecilla fit, & semen paucum turget spiritu. Hippocrates autem,

tem, qui ex hac sectione infœcunditatem induci scripsit, non negavit posse etiam steriles reddi homines à quacunque aliâ causâ cerebrum debilitante.

C A P. VI.

An liceat Medico abortum medicamentis prouocare.

Contingit nonnunquam fœminas, quæ delicto concepérunt, maiore delicto velle fœtum perdere, & socium criminis sibi asciscere cupiunt Medicum, quem pretio corruptum iri sperant, precibus vrgent, & vt sub specie euitandi mali, malum committat, persuadere conantur. Absit tamen vt animus ingenuus, auaritiæ laqueis irretiri se sinat, vt in tantum incidat facinus. Non est mei muneris concionatorem agere, satis iam medicinam facientes sanctorum Patrum admonitionibus sunt instructi, sacrarum synodorum, summorumque Pontificum decretis admoniti, ac Iurisconsultorum legibus cohibiti, quarum mentionem

tionem facit Galenus *lib. an animal sit,*
cap. 5.

Existimauit Aristoteles, non turpi,
sed leui de causa, videlicet, *si multitudo*
tanta prolis alicui contigerit, vt duplica-
tus sit filiorum numerus, licitum esse an-
teuenire, *vt non concipiantur.* Liceat au-
tem viro Ethnico ita sentire, Christia-
na pietas aliter fieri postulat, vt supe-
riùs demonstraui. Adiungit Philoso-
phus: *nam postquam concepti sunt, aut*
sensum, aut vitam acceperunt, nefas est
contingere eos. Cæterùm his verbis duo
tempora denotantur, primum est *post-*
quam concepti sunt, hoc est, simulatque
embryo in vtero coagulationem subiit
nondum tamen habet animam; al-
terum vbi *aut sensum, aut vitam accepe-*
runt, nempe cùm iam est animatum:
quippe ab anima sensum, vitamque
accipit. In vtroque tempore conce-
ptum perdere nefas est: in vtroque
enim fit læsio, minor tamen, antequàm
foetus sit animatus; nam tunc non ho-
micidium, sed homicidio proxima
culpa censetur. Postquam verò ani-
mam accepit, qui eum perdiderit, non
potest ab homicidij crimine excusari.

Sunt qui à periurij crimine Hippocratem liberare contendant, qui in suo *iureiurando* se nulli vnquam mulieri pessum foetus corruptorium daturum pollicitus fuerat, & tamèn in *libello de natura pueri*, psaltriæ consilium dedisse fatetur, vt saltu septies repetito sex dierum conceptum in terram proiiceret. Dicunt isti, iurasse quidem probum virum, se nunquam foetum medicamentis corrupturum; ac sex dierum conceptus, genitura adhuc erat; non foetus. Cæterùm an ita à periurio liberetur, non sat scio: vnum tamèn non ignoro, conceptum, licèt adhuc non informatum, perdere nefas esse. Quare ne Hippocrati, viro ab omni prauitate alieno, hæc nota iniuratur, satius est dicere, libellum *de natura pueri*, inter spurios, tum ob hanc; tum ob alias rationes, recenseri.

Prohibebatur in Diuina lege, *Exod.* 21, tam informem, quàm formatam iam foetum corrumpere; sed non parum utrumque poenâ: etenim formatum perdere, homicidium erat; ac proinde occisor morte plectebatur; informem corrumpere, non adhuc homicidium erat.

erat, ac proinde damnum illatum pœnâ pecuniariâ puniebatur, iuxta æstimationem parentis; quod licet vulgata lectio non omnino manifestè nobis tradat; traditur tamen manifestissimè in translatione Græcâ, & ita verba legis intelligunt; cum D. Augustino, multi facti auctores, statuentes peccatum esse graue, non formatum adhuc fœtum disperdere; homicidium verò, si iam formatus perdatur. Idèd graues pœnæ iis statutz sunt, qui genituræ siue inanimati fœtus exitum remediis sollicitant, vt asserunt Siluestrina, Toletus, & specialiter constitutio Sixti V. edita Romæ anno 1584. quod diffusè admodum pertractat Poncius aduersus Fienum contrarium asserentem.

Sed iam magis ad medicos fines libet accedere, & considerare, an mulier, quæ in partu solet periclitari, licitè possit abortum, ad cuitandum periculum, procurare. Aëtius assentitur, nec mirum, qui enim ob hanc causam, sterilitatem inducendam admisit, admittit etiam ob eandem abortum. Auic. 21. 3. tract. 2. cap. 12. sic ait: *Quandoque abortus in quibusdam horis necessarius est, de*

quibus est illa, quæ est cum prægnaus est puella parua, supra quam timeatur mori ex partu; & de illis est, cum in ore matricis est nocumentum, & additio carnis stringens super fœtus egressionem, quare interficit; & de illis est apud mortem fœtus in ventre prægnaus. Rhafis 9. contin. caput peculiare scriptum reliquit, cuius inscriptio est, de abortu prouocando, & probibendo. Longè maiore impietate Theodorus Priscianus lib. 3. cap. 6. ita inquit: Quemadmodum pro conseruanda arbore rami arescentes abscinduntur, & naues pressa onere, cum magnâ tempestate huc illuc agitantur, remedium est onus deponere, ut ex damno illo videantur habere remedium: ita si fœmina, propter vitium uteri, aut atatis impotentiâ, periclitentur ex partu, & imminet vitæ periculum, oportet vitam emere ex partiûs iactura. Sic ille, quasi arborum regeneratio, aut mercium æstimatio, cum vitâ hominis debeant comparari. Sanè, quoniam causæ ab auctoribus narratæ, non certam mortem, sed duntaxat periculum minantur, non est tentanda certa infantis mors, ut vitæ matris dubiæ consulamus. Solùm si fœtus iam mortui

signa

signa adsint, extrahendus est; viuis autem nequaquam enecandus.

Maiorem dubitationem infert prægnaus acuto morbo laborans, cui valde Hippocrates timeret, ne abortum faciat. Nonne acutus est morbus, qui à materia turgente fit? maximè, & adeò acutus, vt in eius curatione, hoc est, purgatione, nihil sit cunctandum. At turgentem materiam, in muliere prægnaute, non audet magnus senex educere, nisi in iis mensibus, in quibus abortus non valde timeretur; hoc est, à *quarto vsque ad septimum*. Vnde constat, magis animum ad grauiditatem, quàm ad acutiem morbi conuertisse, & conseruationem foetus curationi morbi acuti prætulisse. Similiter si grauida mulier sanguinis missione opus habeat, quæ in *omnibus febribus*, teste Galeno 11. *meth. cap. 17. præstantissimum remedium est*: venam secare, permittit primis mensibus, quando scilicet foetus adhuc exiguus non multum postulat alimentum, & sic ab extractione sanguinis paruum suscipit detrimentum: At verò si foetus sit maior, sanguine misso sequitur abortus; quare

videatur insinuatæ, tunc temporis à sanguinis missione esse abstinendum. Plura reperietis apud authores, præcipuè duos neotericos, Petrum Garciam in suo *libro de loc. affect. in fine*, & Ioannem Baptistam Siluaticum in suis *contr.* 81. qui multa in hanc rem congerunt.

Potrà hæc sententia; prædictis auctoribus non solum pietati Christianæ, sed medicis etiam documētis videtur consona: quippe, & remedia abortum facientia violenta cum sint, mulier graui morbo oppressa non tolerat, & periculo ex morbo, periculum ex abortu adueniens, ad interitum deducit. Nihilominus libenter hos auctores interrogarem, si morbo acuto lethalia adsint signa, eritne mulier certæ morti relinquenda, an potius anceps remedium tentandum? Mihi non dubium est, potius esse matris vitæ consulendum, nullâ habitâ vitæ foetus consideratione, quàm iniusto quodam timore, ab omni remedio prorsus cessare, ut cum matre simul infans deperdat. Quæ enim erit spes vitæ foetus, si mater moriatur? Numquid confugies ad partum Cæsareum? At dum graui-

da

da mulier morbo acuto laborat, foetus non adhuc maturus est, ac proinde non vitalis. Nec verò ita facilis res est partus Cæsareus, ut ex eo infantis liberationem queas sperare. Remedium fa-
teor abortire faciens violentum est, & id mater morbo acuto oppressa vix sustinebit. Ita est, hoc tamen solum probat remedium esse anceps, quod præstat tentare potius, quam ægrum certæ morti relinquere. Abortus per seipsum laboriosus est, & labor iste labori ex morbo additus fit intolerabilis; sed non desunt virtutem corroborantia auxilia, & variae spiritum reficiendi viæ; & dum hæc aguntur, non omnino spes extinguitur: exstingueretur autem, si Medicus omninò à remediis abstinuisset. Moribunda filia mea ex morbo acuto, cum in tercio gestationis mense constituta esset, die decimaquarta, sine ex vi morbi, siue ex euacuationibus factis, abortiuit, & euacuatione sanguinis post abortum sequuta, à morbo evasit. Dubius eram, an illi abortum prouocarem, immò ad prouocandum inclinabam, nec alia spes erat, præoccupauit natura: quam si aliàs Medico

imitati licet, in hoc casu cur non licebit?

C A P. VII.

An Medico liceat febrem inducere.

Vniuersale malum febris, quæ fit calore innato igneam ferè naturâ, in corde, adepto, per vniuersamque, corpus demandato, perniciofa res est, ita vt nulla perniciosior corpori contingat. Forsitan idè videbitur alicui, nunquam febrem posse tutò excitari, præcipuè cum certus esse nemo queat, an excitata febris intra ephemerarum limites se contineat: possumus namque in eum corporis apparatus incidere, qui accenso igne malignitatem sapiat. Si verò dicas, naturam multoties frigidos morbos, superueniente febre sanare, vt sunt apoplexiæ, cōuulsiones & ab ebrietate obmutescentiæ; Medicū verò naturæ imitatore eadem viâ progredi debere: scito, Medicum naturæ, consultò, non verò coactè, fortuitoque operantis imitatore esse: dum

dum igitur febre morbum curat, vel coactè, vel fortuitò id agit. Cura porrò coacta tunc recipitur, cum aliter agere non possumus: si verò eò vsque expectemus, iam ægrum debilem reperiemus; debilem verò ægrum, superueniente febre debilem reddi, & oneri ferendo ineptum esse, quis est qui non videat? Itaque ægrotanti iam priore morbo conflictato, febrem inducere, nihil aliud est, quàm malum malo addere; hoc autem rectæ rationi opponitur. Tandem natura, quoad potest, febrem respuit, eique reluctatur: naturæ quis aduersabitur?

Hæc si rectè considerentur, Medicum admonent, ne ex professo febrem inducat, non tamen cum omnino dererent, ut præ metu futuræ febris, desinat morbos frigidos calidis remediis tractare. Contingat alicui corripui apoplexiâ, cuius causa est frigidus, crassusque humor cerebri ventriculos occupans, num Medicus præ timore futuræ febris, à remediis causæ mali obuiantibus abstinēbit? Est profectò gravissimum malum febris, sed quo aliud gravius possit accidere: præstat

autem ex magno periculo hominem, quamvis per media pericula, liberare. Incidet, inquis, Medicus in morbosum apparatus, ex quo fuscitabitur maligna febris. Esto, sed adhuc magis ex apoplexia, quàm ex maligna febre pateriens periclitabitur. Instas adhuc, in ultimo exterminio virium, languorem maximum adesse. Aduerte tamen, morbum priorem, nempe apoplexiam, convulsionemve esse morbos exactè peracutos, qui intra paucas horas, ne dicam dies, terminantur. Quamvis autem febrem post alium morbum excitare, malum malo addere dicatur, nihilominus tunc febris est malum, quod habet rationem boni. Proinde tentanda est isthæc curatio, quæ licet coacta, utilis tamen esse potest. Porro natura, quæ non ducitur ratione, semper illud damnum, quo in præsens molestat, cupit effugere: propterea febrem abhorret, quando febris vrget. Medicus aliter se gerere debet: quippe ratione duce operatur: ideo interdum media eligit laboriosa, ad finem optimum consequendum. Caueat tamen Medicus, ne periculosa ista auxilia aggredia-

tur,

tur, quin prius ægrotantis consanguineos, & amicos moneat, posse ex medicatione istâ febrem fuscitari, posse item febrem fuscitatam vtilem esse: quod si non accidat, hoc vnum sciant, ægritudinis statum, remedium istud expostulare, nec esse alium euadendi modum.

Commemorandus hoc loco est aphorismus 44. sect. 6. *Quibus ex stillicidio urina, ileos supervenerit: in septem diebus pereunt, nisi febre superveniente, satis urina fluxerit.* Putant aliqui Galenum falsum fuisse, se hanc sententiam non intelligere: verum isti aut oscitanter Galeni contextum legerunt, vel calumniandi animo armati, eius verba susceperunt. Refert ille opinionem quorundam, dicentium iliacum dolorem ex inflammatione ortum habuisse, & vnam tantum spem habere solutionis; inflammationis cessationem, cum qua etiam febrem sedari est necessarium: bonum igitur signum solutionis earum, quæ sunt in ileo passionum, esse febrem vel remissam, vel solutam. Hanc expositionem damnans, ait, *inclinis esse, se fatemur nos ignorare,*

quæ in aphorismo Hippocrates dixerit.

Cæterùm Galenus veritatem aphorismi non negat, quamvis an legitimus sit, non audeat pronunciare: Sed iliacam passionem à frigidis humoribus posse ortum ducere admittit, & superueniente febre, & vrinarum euacuatione iuuari. Sed cùm ab vrinæ stillicidio ileon superuenire Hippocrates dicat, putârunt aliqui ex repletionē vesicæ comprimi intestinum ileum, & ita dolorem fæcūmque retentionem in ea parte fieri. Hoc Galenus reiicit: quippe multos se vidisse ait, quibus ex vrina retenta, vesica intumuit, nec proinde iliaca passio fuit subsequuta; deinde vesica, si in tumorem attollatur, solùm potest rectum premere intestinum. Tandem non magis ex vesicæ repletionē potest quispiam ileosus fieri, quàm mulieri grauidæ ex repletionē vteri idem poterit accidere.

Fuchsius aphorismi verba violenter trahit: siquidem existimat Hippocratem velle, si stillicidio vrinæ, quod ex frigidis crudisque humoribus ortum habet, ileos succedat, septem diebus ægros mori; si verò non succedat ileos, sed

sed febris, tunc si urinae succedit fluor, non moriuntur, sed liberantur. Verum si quis aphorismi verba consulat, reperiet non iis hanc interpretationem conuenire.

Mihi quidem videtur sententia non admodum intellectu difficilis: etenim urinae stillicidium, ex humoribus crudis collum vesicae occupantibus fieri, nemo est qui nesciat; multiplicato vero per epigenesin malo, possunt iidem crudi humores intestina tenuia obstruere, ac subinde voluulum, seu iliacam passionem excitare: febris autem, quae affectus est calidus, potest utriusque mali causae (quae utrobique eadem est, nempe frigida) aduersari. Si igitur febris superueniens, id quod optatur efficiat, hoc est, humores crassos attenuet, lentos incidat, cognoscetur ex fluxu urinae, qui non contingit, nisi causa mali superata. Itaque requiruntur, ut hominem, & urinae stillicidio, & ileo oppressum liberent: febris quidem, tanquam causa; urinae fluor, & tanquam causa, & tanquam signum: videlicet tanquam causa, quia vesicam liberat ab illo opere; tanquam vero signum,

signum, quia indicat attenuatam iam
esse pituitam.

CAP. VIII.

*Quando morbum morbo curare
conueniat, quando non.*

Forsitan existimabit aliquis perpetuæ veritatis documentum esse, ut quos morbos post alios natura in ægrotantis bonum excitat, eosdem debeat Medicus excitare. Verùm res non ita confusè, sed adhibitâ distinctione est excipienda; nam in primis natura coacta non est imitatione digna, E.g. cum versus partem dolentem vicinas partes comprimit, ut ei suppetias ferat, & sanguinem, spiritusque in subsidium mittens, inflammationi præstat occasionem. Hoc quidem non liberè facit, sed ab instinctu quodam facere cogitur. Deinde non est imitatione digna, in iis quæ in bonum eueniunt, tanquam signam, non autem tanquam causam, ut multa, horrenda quæ crisi antecedunt, delicia, iactationes, vigilæ, ad quæ cuncta sequitur in morbi indicatione

dicatione solutio ; num Medicus hæc etiam symptomata excitare conabitur, vt in bonum ægrotantis cedant ? minime. Sicut è contratio aliquæ euacuationes à natura malæ censentur, ab arte verò bonæ, vt euacuatio atræ bilis *αὐτομάτως* ; mala ; *ἐκφραγτικὴς* autem ope cathartici, bona. Cur ? nempe quia atra bilis ; si exeat, prauam corporis dispositionem indicat ; si pharmaco educatur, corpus à grauissima morbi causa liberatur.

Quæres, an in febre ardente, in qua bonum dixit Hippocrates 4. *aph.* 58. rigorem, sit rigor à Medico excitandus ? Scito, adhuc in ea febre rigorem, tanquam transmissæ materiæ signum laudari : nam rigori, non vult Galenus solutionem febris attribuere, sed euacuationi post eum enenient. Quorsum ergo rigorem excitabit Medicus ? At dices, Celsus *lib. 3. cap. 9.* non in ardente, sed in febre lenta diuturna, infusione frigidaæ aquæ, & olei, horroré excitauit. Cæterum hoc fecit non methodicè, sed curatione quadam, quam fortuitam iure appellabo ; inquit enim : *Nonnunquam etiam febres lente sine vl-*

la remissione corpus tenent, ac nec cibo, nec ulli remedio locus est. In hoc casu Medici cura esse debet, ut morbum mutet: fortasse enim curationi opportunior fiet. Sæpe igitur ex aqua frigida, cui oleum sit adiectum, corpus eius pertractandum est: quoniam interdum sic euenit, ut horror oriatur, & fiat initium quoddam noni motus. Sic ille. Nec est præter rationem, animi perturbatione humores pigros excitari, excitatos curationi magis cedere, quod iam in metastasi ab anima ad corpus diffusè comprobauimus.

Verum itaque est id, quod prius ceperam dicere, nempe quando morbus, qui bonæ causæ rationem habet, à natura fit, posse etiam fieri à Medico. Quamuis autem opponas, morbum qui superuenit grauiorem esse, nam Celsus febrem lentam excitatâ acutâ febre curat; nihilominus potest morbus esse leuior, curatu tamen difficilius, ac proinde ad facilem curationem necessarium erit, morbo grauiore inducto leuiorem curare. Sunt tamen aliquæ rationes, quæ nos ab hac curatione morbi morbo, dissuadeant, quibus

quibus respondere erit operæpretium.

Inprimis licet ascites, teste Galeno 4. *aph.* 11. ex maiore frigiditate quam tympanites fiat; est tamen ex Aëtij sententia, *tetrab.* 2. *serm.* 2. tympanites ascite periculosior, quoniam tympanites non admittit curationem, datur enim medicamentum quod aquam, non quod flatum educit; fit quoque in ascite, non in tympanite, paracentesis. Quis ergo, ut magis periculosa ægritudini, nempe tympaniti, succurrat, ascitem inducet? quod non aliter fieri potest, quam maiorem frigiditatem, quæ vitæ nostræ aduersatur, inducendo. Respondeto tympanitem, & ascitem non habere contrarias causas; at tunc solum morbus morbo curatur, cum causa unius causæ alterius contrariatur. Tympanites, & ascites, à frigiditate fiunt: à minore tympanites, à maiore ascites: si frigiditatem inducas, ascitem afferes, sed tympanitem non auferes. Præterea tam tympanites, quam ascites aquam, & flatum simul habent, sed à præpotentiore denominationem suscipiunt: dicitur namque ascites ubi aqua abundat,

dat, flatûs verò in minore sunt quantitate; tympanites verò, vbi flatu corpus turget, licet aqua non desit. Et sic in hoc morbo non admittimus curationem per alium morbum.

Secunda difficultas. In suffusionibus oculorum, densitudo eius humoris, qui locum pupillæ inter crystallinum, & corneam tunicam implet, visionem interturbat, sed nondum omnino impedit, vsquedum in eam, quam Arabes cataractam vocant, concreuerit, sed non antequàm concresecat punctiōi cedit. Si verò ad faciliorem curationem, concretionem medicamentis alimentisque procuraueris, quid efficies? nempe cæcitatem, ac proinde id medicamentis habebis, quod, vt non eueniat, medicamentis procurare debueras. Responde, Medicos oculos intransantia exostulare, vt concresecat humor, qui acu est extrahendus; attamen hi lucro intenti cæcutiunt, nec aduertunt cum quanto periculo res agatur: siquidem potest simul in oculo humor concresecere, & alius optico nervo adherere, ac fieri illud malum, quod à Barbaris *gutta serena* appellatur, & irremedia

remediabile est, propterea in hoc etiam casu abstinēbo à curatione morbi per morbum.

Tertia difficultas. Celsus qui morbis morbos curari velle videtur, adiungit : *Neque tamen ideò ista medicina non est temeraria.* Temeritatem Medicus euitare debet. Respondeo, temerariam esse curationem, quoties alià viâ neglectâ, hanc suscipimus; aut quoties antequàm periculum graue sit, ad hunc curandi modum conuertimur. Cæterùm si nulla adest via, sed vndique angustia, si periculum imminet, non est temeritatis, sed sani consilij proles. Ita tamen intellige, me velle ad magnum periculum hanc curationem reseruare, vt non existimes reseruandam esse ad tempus exterminij, cùm iam non constant vires; nam tunc miserabile est morbum morbo superuenire, siquidem ex Hippocratis edicto, *libro de affectibus* iampluries citato, *agro fatigato mors aderit, antequàm prior morbus soluatur.* **C A P.**

C A P. I X.

Morbus ex solutione continui morbos alios curat.

SI adamussim omnem curationem
examine velimus, pauca sunt re-
media, quæ simul nequeant morbi,
aut symptomata appellari. Vomitus,
symptoma est in excretis præter natu-
ram, sicut & diarrhœa, & dysenteria,
lienteria, & cœliaca. Sanguinis autem
missio continui solutione fit, & secum
symptoma affert, nempe fluxum san-
guinis toto genere à natura alienum.
Partes vrinus, & secamus, spe alicu-
ius utilitatis. Punctum neruum totum
præscindimus, quoniam ex punctione
convulsio timetur. Ita etiam totam ar-
teriam abscindimus, nec enim aliter
sanguis ab ea impetuosè fluens com-
pescitur. Suppuratum & hydropicum
vrinus, aut secamus: hydropico ma-
gis sectio, empyematico magis conue-
nit, vstio. Sectionis vstionisve partē si-
nistram, potius quàm dextram exoptat
Hippocrates. Locum verò in quo aper-
tio celebranda est, inter alios optimè
mihi

mibi videtur considerâsse Amatus Lufitanus, *cent. 1. curat. 61.* Fiunt etiam inustiones, apertionésve ferro candente in variis corporis nostri partibus, ad varios effectûs. Inprimis ad sanguinem compescendum, qui apertis arteriis, aut magnis venis effluxit. Deinde ad corroborandum, vt cùm membrum refrigeratum calefaciendo, aut humidum exsiccando, aut laxum coarctando, corroboramus. Vel ad euacuandum, cùm ex affecta parte materiam educimus, aut ad deriuandum, cùm è propinqua, aut ad reuellendum, cùm ex remota.

Cæterùm, quia frequens nostrâ hac ætate est deriuantium, reuellentiûmve cauteriorum vsus; quæ quoniam per totam vitam aperta relinquuntur, ita vt fontium scarutigines imitentur, fonticuli solent appellari, libet hoc loco an antiquis fuerint cogniti, & quam vtilitatem afferre possint, breuiter explorare. Thomas Fienus *lib. 1. de cauteriis, c. 13.* huius medici auxilij fatetur nusquam Hippocratem, & Galenum apertè mentionem fecisse; nihilominus non esse verisimile; ait, eos hunc

vsu

usum ignorasse: siquidem aliis qui non multo post, imò ante illos fuerunt, cognitus fuit. *Dioscorides*, (inquit ille) *Archigenes*, *Asclepiades*, *Antillius*, *Rufus*, *Possidonius*, eum non ignorarunt, qui *Galenus* tamen fuerunt antiquiores, & quorum ipse scripta legit, ac excerpfit. Hæc tamen *Fieni* verba peruicaciam sapere videntur, nam si *Galenus* antiquorum scripta excerpfit, ut reuera excerpisse ostendunt innumera remedia, quæ ipse in *libris de compos. medic. secund. loc.* & alibi passim, ex aliorum descriptionibus transtulit, cur nunquam istius auxiliij manifestam fecit mentionem?

Dicunt nonnulli, ex *libro de theriaca ad Pisonem*, c. 16, posse colligi, fonticulos non fuisse *Galenus* ignotos: qui quàm procul ab scopo aberrant, addiscant, quicumque verba ibi scripta legerint: docet enim quomodo rationalis Medicus se in curandis venenosis moribus gerere debeat. Curabit, inquit, vulnus illud non simpliciter, sicut methodici solent, sed illud illicò faciet, carnem circumquaque auferens, & ad rotunditatem redigens, ne facile cicatricem

tricem obducat, sed apertum longo tempore perseueret, saltem quadraginta diebus, quò rabidi canis venenum egredi queat. Addunt etiam alterum eiusdem Galeni locum, qui non magis quàm prior illis fauet, lib. 5. de comp. med. secund. loc. c. 9. Si batrachij siue ranunculi folia ei qui dentem dolet, in eiusdem partis brachium imposueris, dolore quidem liberabitur, brachium autem exulcerabitur, cuius curam, prout conuenit, facies. Sic Galenus, qui in vlcere à cane rabido, vulnus ampliat, & vsque ad quadragesimum duntaxat diem apertum relinquit: In vlcere autem facto à batrachio, ad liberandum eum, cui dens dolet, statim ad vlceris curationem festinat. Quid hæc commune habent cum fonticulis, qui per totam vitam aperti conseruari iubentur? Sed quorsum leues coniecturas in Galeni scriptis quærimus, quando ille vastissimus Medicinæ Oceanus, quæcunque nouit amplissimè declarauit.

Ad Hippocratem accedo, quem putat Fienus fonticulos cognouisse, quia suppuratos, hydropicósque vrere aut secare iubet, & diu vlcus apertum per-

manere ; nec considerat apertionem istam , esse in parte affecta , & durare per aliquot dies, & sic à fonticulorum conditionibus distare.

Avicenna lib. 3. *sen.* 16. *tr.* 1. *cap.* 7. pro tumore splenis cauteria multa inurit. Sed vbinam? nempe in splenis regione. At longè alia est fonticulorum ratio ; nam & coxendicos dolores profundioribus vstionibus in ipsa coxa factos memorat Hippocrates, & doloribus subuenit vicinarum partiû vstione. Hoc nemo sanæ mentis negabit, & vlcera facta diu aperta relinquenda esse, optimâ cum ratione admonemur, vt materia omnis exitum habeat. Cæterùm hodiernis Medicis familiares fonticuli alias subeunt leges : quippe cùm Hippocrates *ad Demetr.* grauissimorum malorum caput causam esse dixerit , isti omnium malorum intelligunt, atque ita Fernelij paradoxon, arthritidem à capite semper ortum ducere affirmantis , adèd receptum apud hodiernos manet , vt contraria opinio paradoxica euaserit. Propterea in omni catarrho , in omni capitis affectu, siue sit cephalæa, siue hemictania, siue epilepsia,

epilepsia, siue vertigo, alterum ex brachiis inurunt; si verò per consensum fieri suspicentur, ad crura accedunt, aut ubi etiam mulieres menstruorum paucitate, ablationeue laborant. Itaque nullus est morbus ex chronicis, cuius curationi vltimam manum per istos fonticulos non imponant. Quæram libenter, ista, siue deriuationem, siue reuulsionem appellent parum interest, per quas vias fiat? non per manifestas, hoc est, per vasa: nam cum fonticulos aperiunt, vasa effugiunt, & meritò, ne sanguinis fluxio sequatur. Ergo per occultos meatus, per quos, si fieri debet, rectitudo seruanda est, quam ab aliquibus contemni video; semper enim sinistrum brachium potius quàm dextrum exulcerant: nescio an Hippocratis consilio, qui dixit optandum in sinistris. Sed ille de apertione inter costas fuit loquutus, non de brachiis, aut cruribus.

Cætèrùm vlcusculum in brachio, aut crure, vndenam habet tantam facultatem trahendi ad se per occultos meatus humorem à parte affecta? Quis caput admonuit, vt ad illam partem

materiam mitteret? Respondebuntne id fieri propter dolorem? at dolor exiguus est & momentaneus; illi vero utilitatem ex fonticulo nonnisi post unum, aut duos menses euenturam sperant. Quod si dolor aliquid præstat, multo melius præstabunt ligaturæ, & cucurbitulæ, quæ maiorem & diutius perseverantem dolorem inferunt.

Quod attinet ad qualitatem humoris per vlcus exeuntis, nihil aliud est quam pus. Iam ergo non euacuabitur bilis, nec flaua, nec atra, vtraque enim non suppuratur; immodò nec pituita, cuius motus piger est, & in pus non abit, nisi prius in sanguinem conuertatur. Si quantitatem consideres, respice ad alia vlcera, quæ non manu Chirur- gi, sed à causa morbifica sunt facta: vtraque enim vno & eodem se gerunt modo. Undenam in vlceribus pus? nempe ex sanguine, qui ad particulam nutriendam concurrit; quam quoniam & intemperie, & continui solutione laborantem reperit, nutrire nequit: quare necesse est, ut sanguinis illa portio in pus vertatur. Dabis igitur mihi, in fonticulo, si non totum id quod egreditur,

egreditur, at saltem partem aliquam factam esse ex nutrimento particulæ ulceratæ; cum ergo parum sit, quod ex ulcere promanat, paucissimum derivationi attribuetur. Atque ita in 24. horarum spatio vix guttulam vnam pro hac necessitate habebimus. Miror sanè, cum natura amplissimos fabricauerit canales, per quos copiosissimè materia è cerebro educitur, nates scilicet, & palatum, per quos certum est materiam, quæ in cerebro redundat, transmitti, Medicos errhina, & apophlegmatismata, ab artis nostræ proceribus celebrata contemnere, ac (ve ita dicam) fontibus relictis, riuulos consecrari. Appellent illi sua ulcera fonticulos, fontes ego hos naturæ ductus appellabo.

Nec verò me quispiam à fonticulis omnino abhorreere existimet, frequentiam duntaxat damno, & indistinctum eorum usum. Fonticulos aliquando cum maxima patientis utilitate me aperuisse testor, atque profiteor. Adeò verò istius remedij usus apud vulgus increbruit, ut putent multi, eos qui fonticulos habent, posse liberalius ci-

bo, potuique indulgere, ut pote promptæ euacuationis iugem occasionem habentes. Cùm tamen certus sit spirituum impetum facientium, per illa foramina exitus: sunt enim spiritus adeò ad egressum è corpore faciles, ut si exercitio, aut æstivo calore corpore excalfacto, occulti meatus referentur, egressui spirituum viâ reclusâ homo debilitetur, quidni etiam aperto foramine? At si spiritus exeunt, functiones imbecilliores fieri par est, & coctiones diminutas. Quare ubi fonticuli adsunt, potius minuendus, quàm augendus est victus. Porro hæc mea dicta unusquisque sanâ mente accipiat: nihil enim magis alienum à meo animo est, quàm in medicina facienda sectis inhærere: quapropter nec is sum, qui fonticulos in omni morbo, immò in omni præseruatione recipiam, neque rursus, qui eos prorsus à Medicina relegandos putem. Nam respiciens ad qualitatem, ubi vaporosa est materia, aut si pituitosa saltem labi facilis: ad quantitatem, ubi graue est malum, & vndique conquisita remedia postulat: ad loca per quæ ducitur, ubi ea quæ natura fabri-

cauit, non satis patent, aut ubi fluxus per neruosum, musculosumque genus peragitur; ubi hæ concurrunt circumstantiæ, tunc præter reliqua auxilia, ne hoc quidem relinquendum, quod Aëtius insinuasse videtur, *tetrab. 3. serm. 4. c. 3.* postquam enim locum, instrumenta, & reliqua peragenda vstioni accommodata in ischiadicis pertractauit, pro coronide, quasi remedium istud contemnens, adiungit. *Apposuiimus autem de vstione, ne videlicet eius usus ignoraretur.*

C A P. X.

Cur plurima septica remedia, quæ extrâ cuti imposita vlcus efficiunt, intus sumpta non exulcerant.

A Periendis fônticulis, aut partibus quomôdocunque inurendæ, si candens ferrum æget perhorrescat, iis remediis uti poteris, quæ crustam possunt inducere: ea septica, hoc est, putrefacientia, dicuntur, seu caustica, hoc est, deurentia, quia non dissimilem

lem ab igne effectum producant. Contigit mihi cuidam bubone laboranti remedium septicum apposuisse, quoniam malum occultari desiderabat, verum amici cubiculum intrantes, carnes assas odore se percipere dicebant. Hoc tamen vnum animaduertito, ad corroborationem partis ignem esse aptiorem; cum verò fluxum materiæ desideramus, tunc vt pars imbecillior fiat, aptiora esse septica. Deinde in occipitio, aut quauis aliâ parte, quam ultra citràque consistere sine periculo non possumus, septica ista non conueniunt: quippe in eorum applicatione incertitudo est, non sicut in ferro candente, quod Chirurgi manu applicatur, nec ultra quàm par est, progreditur.

Dum verò remedia ista septica considerabis, statim se tibi offeret pulchra difficultas, videlicet cur multa quæ foris imposita exulcerant, intus tutò assumantur? vt sinapi, muria, allia, cepæ. Gal. 3. *de temper.* quatuor affert causas. Prima, quia tum in ventre concocta, tum in venis in sanguinem versa mutantur, alteranturque. Secunda, quia vno loco non permanent, sed in multas partes di-

uisa,

nisa, quoquo versùs feruntur. Tertia, quòd nō solum multis succis miscentur, sed etiam cibis, cum quibus assumuntur. Quarta, quòd celeriter eorum, & coctio, & partium separatio perficitur, ita ut quod conveniens in iis est, assimiletur; quod supernacuum, & acre, per aluum, urinas, sudorem excernatur. Hæ autem omnes causæ defunt, si eadem cuti imponantur, nam neque concoquuntur in cute, neque mouentur, neque permiscuntur succis, neque acres ipsorum partes ab utilibus secernuntur, sed inconcocta, & parti diu adhærentia, impermixta, & à partibus suis acribus non separata, quicquid agendum est agunt. Cæterum in his quatuor causis multa mihi occurrunt, quæ censurâ egere videntur.

Etenim quod attinet ad primam, licet verum sit, cocta & in sanguinem versa mutari in aliam naturam, nihilominus duo difficultatem ingerunt. Primum, quia dum coquuntur, antequàm cocta sint, poterunt ulcerare. Alterum, quoniam etiamsi mutantur, non omnino suas qualitates amittunt, ut ostendunt boues Indiani, qui cassiâ

nutriuntur, & eorum caro purgandi vim habet. Hoc etiam ostendit pestilentia, quæ ex cibis pravi succi pronebat tempore Galeni. Et quis dubitat, ob prauum victum congeri in corpore erodentes humores, qui vlcerata efficiunt? imò ipsemet sibi contradicit, qui in eodem capite ait: *Quòd autem si acrimoniam suam seruaret, interna quoque omnino exulceraret, ex iis quæ sponte accidunt vlceribus; intelligas. Gignitur enim non rarò, aliis ex vitioso cibo, aliis ex quapiam in ipso corpore corruptela, & putredine, vitiosus succus, quam cacoehymiam vocant. His aliquando interiorum aliquid vlceratur, magnâ tamen ex parte cutis (quoniam in hanc excrementa quæ in habitu corporis colliguntur, natura expellit) multis & assiduus vlceribus afficitur. Sic ille. Si igitur ex prauis cibis mordaces succi gignuntur, cur ait ille deponi coctione mordacitatem? Præterea oleum vitrioli, quod cuti impositum vlcerat, intus assumptum non exulcerat, & tamen non concoquitur. nam vitriolum nihil habet alimentosum. Quoad secundam, quòd scilicet in vno non permanenti loco, profectò antequàm*

antequàm in varias partes diuifa ferantur, per plures horas in ventriculo cominorantur, vbi mirum est quòd non exulcerent. Ad tertiam, quòd miscentur aliis cibis, & aliis succis, scio rusticos multoties solo allio vti in cibum, nec propterea offendi, sinapi etiam tutò sumitur. Ad quartam, quòd superuacaneum, & acre per aluum feratur, rationem reddere debuerat, cur guttula biliòsi humoris ad intestina delapsa exulceret; horum autem alimentorum partes acres per se separatæ, ac proinde validiores nõ exulcerent. Scitu etiam dignum est, cùm partes istæ acres per sudores exeant, cur cutim non exulcerent, cùm tamen mórda- ces humores per exercitia ad cutem transmissi, & in vapores conuersi vlcerent, vnde Hippocr. 6. *epid. Si impurgatus laboraueris, ulcera erumpent.*

Mirum sanè videri debet id, quòd problematis auget difficultatem, nempe aliqua corrodentia intus sumpta lapidem comminuere, carnes intactas relinquere, vti fructus ex Brasilica regione adueniens, esu suauissimus, cuius aqua stillatitia calculos in renibus

frangit, reliquis autem membris nullam imprimit noxam, fulminis in morem quod gladium comminuit, illarsâ permanente vaginâ, & pecunias colliquat, nec crumenam videtur tetigisse.

Hæc, & alia huiusmodi mihi persuadent, Archeum nostrum, seu Chymicum naturalem, interiùs vasa quodammodo vitriata esse voluisse, ut sic munita meliùs rebus vim inferentibus resisterent. Deinde etiam cuilibet particulæ facultates ministrantes eâ lege tribuisse, ut à nemine doctæ, velut si doctorem habuissent¹, consonantiam inter se seruarent, neque traheret attractrix, id quod ad expultricem pertinet, nec expultrix expelleret id quod spectat ad attractricem. Has ob causas, nempe tum ob lubricitatem partium, tum ob facultatum vigilantiam efficitur ut nihil nocuum visceribus adhæreat; sine adhæsu autem validissimo, nihil potest exulcerare. Et quoniâ hanc vim cum vi fulminum comparauimus, scito rationem, cur fulmen ratiores exterius posita relinquat, duriora intus abscondita inuadat, esse mobilitatem, motûsque

motusque celeritatem, ad quam Lucretius respexit *lib. 6.* inquiens.

Mobilitas autem sit fulminis, & gravis ictus,

Et celeri fermè pergunt sic fulmina lapsu.

Nec ab hac sententia aberrat Aristoteles, quia *3. meteor. c. 1.* ait: *si autem in ipsa nube multus, & tenuis extrudatur spiritus, sic sit fulmen, siquidem valde tenue fuerit, non adurens propter tenuitatem, quod Poëta clarum vocant; si autem minus adurens, fumidum vocant. Illud enim propter tenuitatem fertur, propter velocitatem autem praevenit pertransire, antequàm igniat, & moram faciens denigret.*

Quòd si pus, & acres humores exulcerant, id fit, quia viscositatem aliquam possident, quâ caustica hæc siue alimenta, siue medicamenta carent. Quòd si dicas, bilem non habere lentorem, & tamen ulcerare: respondebo, bilem non ulcerare per se, cùm quotidie ad intestina feratur, nec exulceret; exulcerat verò mucositatibus admixta. Itaque hinc addisces, ea quæ lapidem corrodunt, non corrodere

carnes , quia scilicet in lapide nulla est facultas expultrix , quæ adhæfioni resistat , sed medicamentum in se recipit , à quo destruitur. Oleum vitrioli labitur hac illac, & dum à natura tanquam quid maleficum expellitur , deferret secum etiam spiritus maleficos in corpore præexistentes, quos sympathico amore ad se trahit , & hac ratione malignis febribus confert. Si verò quæras, cur potest natura expellere oleum istud, non potest sine eo expellere spiritus præexistentes? Scito oleum prorsus esse à natura nostra alienum , æ proinde totis viribus, nullâ factâ morâ, ab ea pro viribus expelli. Spiritus verò in corpore geniti, ex sanguine licet corrupto, licet naturæ inimico, non ita violenter expelluntur? quippe natura, quoad potest, nititur sanguinem putredine infectum, cum quo adhuc affinitatem aliquam habet emendare: quod si non potest, tunc propellit , aut si inferior manet, vita cadit.

F I N I S.

L I C E N T I A.

Admod. Reu. D. Nicolaus Cinius,
Can. Florentinus, videat an aliquid
per hos libros contineatur, quod sit
contra fidem, aut bonos mores, &
referat. Die 8. Maij 1627.

A L E X. *Archiep. Florent.*

Ego Nicolaus Cinius Canonicus
Florent. perlegi hoc opusculum Excel-
lentissimi Stephani Roderici Castren-
sis Lusitani, in quo nihil inueni, quod
fidei Christianæ bonisque moribus ad-
uersetur, in cuius fidem hæc scripsi, die
23. Maij 1627.

F L O R. N I C O L. C I N I V S.

Canonicus Flor. m. p.

Imprimatur Florentiæ, si placeat
Reu. P. Inquisitori. Die 14. Maij. 1627.

A L E X. *Archiep. Florentinus.*

Imprimatur die 18. Maij 1627.

P. C L E M. Æ G I D I V S,

Inquisitor General. Florentia.

C O N S E N

CONSENSVS.

LIBRVM hunc inscriptum STEPHANI RODERICI *Castrensis*, &c. *Quæ ex Quibus*, Typis mandari, & in lucem edi sumptibus IOAN. CAFFIN, Bibliopolæ Lugdunensis, Ego Regis Consiliarius, & Procurator in Lugdunensi Præfectura non impedito. Lugduni die 24. Septembris 1644.

LORIN.



PERMISSIO.

VISO Procuratoris Regis consensu, suprâ dictum Librum à IOANNE CAFFIN Typis mandari permissimus, ac simul ne quis citra factam ei potestatem denuò excudar, interdicimus. Lugd. die 24. Septembris 1644.

SEVE.